




# बर' ड'

## THE BODO

जिदाइनथि बिसान : सेप्टेम्बर, 2016

दानथामारि लाइसि



बर' थुनलाइ आफाद





BVR-1422  
 29/5/17  
 31/44  
 ①-1993

थानाय 19 आगस्ट 2016 खालाराव  
 16थि सुबुंधिनि बाबु विरव ब्रह्म  
 गोसोखां सान फालिनायाव बाहागो  
 लानाय आलासि गेदेमाफोर।

थानाय 5 जुलाइ, 2016 खालारखालि  
 सिमेनसापरियाव जानो गोनां 56थि बर'  
 थुनलाइ आफादनि जथुम्मानि बानजाय  
 आफाद आरो मिरु आफादनि रायजोआरि  
 मेलनि सावगारि।



थानाय 20 आरो 21 आगस्ट, 2016  
 खालाराव ग'साइगाव बि.एड  
 फरायसालिमायाव खुंनाय साहित्य  
 अकादेमी आरो बर' थुनलाइ आफादनि  
 सावराय मेलनि बेखेवजेननाय मेलनि  
 सावगारि।

थानाय 27 जुन, 2016 खालारखालि  
 गुवाहाटी मुलुगसोलोंसालिनि मानिनां  
 लेडइ भि.चि. आरो बर' थुनलाइ  
 आफादनि गेजेराव जानाय सावरायनायनि  
 समाव लानाय सावगारि।







दानथामारि लाइसि : जिदाइनथि बिसान  
सेप्टेम्बर, 2016

**सुजु आफाद**

**बोसोनगिरि :**

ड० कामेश्वर ब्रह्म

**मासिगिरि :**

बिश्वेश्वर बसुमतारी

**गाहाइ सुजुगिरि :**

खगेन रामसियारि

**सुजुगिरिफोर :**

ड० सानसुमा खुंगुर बर'

किश'र कुमार बर'

रिपेन बर'

**बिखं महर :** अश'क

**साफायग्रा :**

एन. एल. पाब्लिकेसन्स

पानबजार : गुवाहाटी-1

जानबुं : 94350-11174, 98640-17197

बेसेन : 30.00 रां

**ना य खां बिलाइ**

❖ सुजुथाइ // 2

: रायथाइ :

■ हाग्रा गुदुनि मै : दान्दिसे नोजोर

✎ ड० तुलन मसाहारि // 3

■ "बर' सल'मानि बोहैथि दाहार : मोनसे सावरायनाय"

✎ ड० आदा राम बसुमतारी // 8

■ रावसोलायनाय आरो बर' थुनलाइ

✎ रिपेन बर' 14

■ साहित्य अकादेमी आरो

बर' थुनलाइ आफादनि सावरायमेल...

✎ बिश्वेश्वर बसुमतारी // 21

: खन्थाइ :

■ बेयाव रावबो मानसि गैया

✎ रत्नेश्वर बसुमतारी // 27

■ नार्सिसास

✎ देतसुं स्वर्गीयारी // 27

■ महर गैयै मोनसे गाब

✎ कानुन // 28

■ खन्थाइ आरो खन्थाइगिरि

✎ अनिल कुमार ब्रह्म // 28

: सुंद' सल' :

■ दाउथु बिखा

✎ उत्तम चन्द्र ब्रह्म // 29

■ साखिनाय

✎ अमृत खेरकाटारी // 31

: बिजाब सिनायथि :

■ बिजाब सावरायथाइ : समनि आइराखि

✎ खगेन रामसियारि // 32

■ बर' थुनलाइ आफादनि मावफारि

✎ कमलाकान्त मोसाहारी // 35



# सुजुथाइ...

'थार ओंथियाव लिरगिरि जानाया गोब्राब; गुबुन फारसे रेजें ओंथियाव लिरगिरि जानाया गोरलै।' -थुनलाइ सानथौगिरि आरो बिजिरगिरिफोरा बुंनाय बे खोथाखौ बिथा खालामना बर' थुनलाइनि आथिखाल बिथाथिखौ बिजिरसडेब्ला बेनि सिं ओंथिखौ जों हमदां हागोन। दिनैनिफ्राय द'जि/स्निजि बोसोर सिगां सासे लिरगिरि हिसाबै सिनायथि मोननाया बेसेबां गोब्राबमोन, बेखौ खायसेया खाफालनिसो खोथा होनना बुंनो नागिरो। बै समाव बर' थुनलाइनि फोथाराव गोसोनि सानस्रि एबा सानलाउरिखौ थुनलाइ महर होनानै फोरमायनो आरो फोसावदिंनो जुनै जेबो गोरलै राहा, थामहिनबा, बिजोंआनो गैयामोन होनना बुंजायो। आन्थोर गारै आन्थोर, जा गांफा-गांनै बर' रावनि लाइसि नडब्ला थुनलाइसि ओंखारदोंमोन- साफा सानै गोसो मोदोम गुदुं थुलुंगायांरि लाइमोनफोरनि नारा नाथा नाजानायाव बेफोरनि आयुआबो जोबोद अबथिरामोन। लिरोब्लानोथ' लिरगिरि जाया। बै लिरथाइफ्रा माबेबा लाइसियाव, नडब्ला बिजाब महरै, सेबखां जानांगोन। फरायग्रा एबा फरायसंग्राफ्रा बेफोरखौ फरायनांगोन; सावरायगिरिफ्रा बैफोरनि गोनांथि आरो गोथौथिखौ हमदां हानांगोन; फरायग्रा बयजोंबो बरायजानांगोन। 'बिबार' लाइसिखौ लाजेनानानै संदानोब्ला नैजि जौथाइनि गिबि खाव खोन्दोआव बर' लाइसिनि बिबाड आसि बिजौआव सानजानायमोन। बै समाव जाय लिरगिरिफ्रा थुनलाइ सोरजिना बै लाइसिफोरखौ समायफ्लेहोदोंमोन आरो दोहोनि खालामदोंमोन, बिथांमोननि साफा-सानैआसो उन बुब्लियाव गागि थुनलाइगिरि महरै सिनायथि आरो गनायथि मोननो हादोंमोन। जानो हागौ, बिथांमोननि थुनलाइ सोरजिथाइया थुनलाइआरि मानथाखोनि फालायाव जौगा फारसे उथ्रिसार जानो हादोंमोन।

आथिखालाव बर'नि लाइसि, खौरां लाइसि (खौरां बिलाइ?) नि बिबाड बांबोगासिनो। अदेबानि सिमान लानांगोन- दासान्दि बर' थुनलाइनि फोथाराव दानसेयारि लाइसि एबा थुनलाइ लाइसिया 'नोजोर' आरो 'बड'लेण्ड'नि अनगा गुबुन गांसेबो सोलिगासिनो गैलिया। बर' लाइसिनि आयुआ मानो एसेबां अबथिरा- बेखौ बिजिरसंनाया गुबुन मोनसे बिथिं एबा आयदा।

सा-नोजोरजों नायोब्ला आथिखालाव लिरगिरि जानो हानायनि गोबां गोरलै राहा बिजों ओंखारदों- इ-लाइसि (इ-मेगाजिन), ब्लग (blog), समाजारि बिजों (ससियेल मिडिया) आरि। बेफोर राहा एबा बिजोंजोंबो गाव गावनि सोरजिथाइखौ गुबुननि गेजेराव दैथायहरनो हायो। नाथाय माबादि फरायग्रा एबा फरायसंग्राफोरनि सेराव बैफोर लिरथाइया सहैयो- बैफोर लिरथाइनि थुनलाइआरि मानथाखोआ बेसेबां जौगाफारिनि जादों- बयजोंबो बरायजाथाव जादों ना जायाखै- बेफोरखौ लानानै साननांगौ जाना फैयो। लिरगिरि जानायनि बयनिखुइ गोरलै गुबुन मोनसे राहाया जादों- गावनि कमपिउटारावनो डि.टि.पि खालामनानै गावनि खरसायावनो गांनैसो बिजाब दिहुनना फरायग्राफोरनो रानथिंना होनाय। बिदि राहाजों लिरगिरि जानो थानाय बेलायाव साननांगौ खोथाया जाबाय- बै बिजाबा एबा लिरबिदाड थार फरायसंग्रा एबा बिजाब बिजिरसंग्रानि आखाइयाव गोलै हैदोंना हैयाखै मोनसे सन्देह थालाडो। जाउनाव गावनि सोरजिथाइया थुनलाइआरि मानदान्दायाव गाखोनो हादों ना हायाखै जेबो मिथिमोना जायो; आरो गावनि सिफिनि रां खरसा खालामना लिरगिरि जानो नागिरनाया जाफुंसार एबा उथ्रिसार जानो हाखो ना हायाखिसै बेखौबो मिथिमोना जाहैयो।

लिरब्लाबो लिरगिरि जायो- बिदि गोरलै ओंथिजों नायोब्ला मोनसे हारि एबा रावआरिनि गेजेराव लिरगिरिनि बिबाड बारायलांबाय थानाया थार। जोंनि बर 'फोरनि गेजेराव लेखागोरोंनि अनजिमाया बारायलांनाय सेर सेर लिरगिरिनि बिबाडबो एरलांनाया थार। अदेबानि थार ओंथियाव लिरब्लानो जाया, लिरथाइफोरखौ बिजाब महरै दिहुनब्लानो जानाय नड। फरायग्रा एबा फरायसंग्राफ्रा बे लिरथाइफोराव एबा बिजाबाव माबा मोनसे गोसो-गोबों मुहिनो हानाय गुन मोन्दांनो हानांगोन; आरो बेनि थाखायनो बेफोरखौ बायगोन आरो फरायगोन। बेफोर लिरथाइनि थार बेसेनथिया माबे बिथिडव दं आरो बेसेबां- थुनलाइ बिजिरसंग्रा आरो सावरायग्राफ्रा संदाननो, बिजिरसंनो एबा सावरायनो बैफोराव माबा मोनसे थानांगोन। थारैनो लिरगिरि जानाया जोनोमजों मोनफानाय मोनसे आखु; साननो हानाय गोहो, फरायसंग्रा गोसो बोदोरथि आरो सानस्रि फोरमायनो हानाय हारोंथि (लिरनायनि गेजेरजों) नि सायाव गुबैयै बेयो सोनारो। थेवबो जोडे बुंनांगोन- बर' थुनलाइ फेहेरनाय, जौगाहोनाय, गोसारहोनाय आरो मुलुगनां खालामनायनि थागिदायाव नांथाबजा नाजानानै, बांसिन बांसिन मुलुगनि जौगाफारिनि थुनलाइ फरायसंनानै, जोंनि बिमा रावआव, थामहिनबा, बर' रावआव थुनलाइ सोरजिनो जों सिगांलांबाय थानांगोन। चरैवति... चरैवति...





## हाग्रा गुदुनि मै : दान्दिसे नोजोर

ड० तुलन मसाहारि

**जागायजेननाय :** बर' सुंद' सल'नि सम्राट नील कमल ब्रह्म लिरनाय मुंदांखा सल' बिजाबफोरनि गेजेराव 'हाग्रा गुदुनि मै' बिजाबआबो मख'जाथाव। बे सल' बिजाबखौ लिरगिरिया थांनाय 1972 इं मायथाइयाव सुजुनानै दिहुनदोंमोन। बिजाबाव गासै मोन जि सल' मोननाय जायो। गोजौ माननि बैफोर सल'आ जादों-हाग्रा गुदुनि मै, मेगननि आखल : गोसोनि महर, जोंहा नडब्लानबा, अरनि बेगर, सोरांनि लामायाव, दाया सोरनि, रावनिबो रावबो नड, ओरैनो, गामिनि सिमां आरो बेहेर। बैफोर सल'नि अनगायैबो नील कमल ब्रह्मआ गोजौ थाखोनि गोबां सल' लिरबाय। गावनि बे हाबानि थाखायनो बिथाड बर' थुनलाइ आफादनिफ्राय रांसार बान्थाबो मोनखांबाय। थारै बुंनो थाडेब्ला बर' सुंद' सल'नि फोथाराव नील कमल ब्रह्मआनो सिगां गोदान दाहार लाबोदों। बिथांनि सल'फोराव प्लट एबा सल'बिथा, केरेकटाराइजेसन आरो प्रेजेन्टेसननि गोदान मोनसे स्टाइल आरो टेकनिकखौ नुनों मोननाय जायो। फरायगासेनि सावरायमाफोराव बिथांनि दोंफ्रोमबो सल'खौ बिजिरनो एबा सावरायनाया गोरलै हाबा नड। बुंबा बुंजोब हाया, सावरायख'हाया। ओंखायनो बे सावराय बिदाडव नील कमल ब्रह्मनि 'हाग्रा गुदुनि मै' सल' बिजाबनि मुंदांखा दोंसेल' सल'नि सायाव दान्दिसे नोजोर बोनो नाजानाय जादों। सावरायनां सल'नि मुडबो जादों बै मोनसेयानो— 'हाग्रा गुदुनि मै'। सल'नि गोनां मोननैसो बिथिंखौ दावसिन नोजोरजों नायनाय जागोन।

**सल'बिथा (Plot) :** नीलकमल ब्रह्मनि सल'फोराव फसंनाय बिथाया जेबो हेब्रे-माब्रे जाथायनि नड। सादा सिदा गामियारि समाजाव एग्रे-बाग्रे

गोरलैसोनानै थानाय समायना-रमायना गोमो-गोथां बायदि गाबनि खनखांनानै लाबोनाय। गामियारि एबा आबादारिफोरनि साधारन जिउ खुंनायनिफ्राय जागायनानै गोजौ थाखोनि लेखा-फरा गोरों, टाउन सहरनि जेथो गोनां जिउ खुंनाय समाजनि सुबुंफोरनि सुखु-दुखु मोननाय-मोनैखौ लानानैनो सल' बिथाफोरखौ फसंनाय नुनो मोननाय जायो। समाजनि मोजां-गात्रि जाथायफोर, समाजनिनो दावगानाय फावसायनायनि थार सावगारिफोरखौ बैफोर सल'बिथानि गेजेरजों गोजौ मान दान्दानि सानथ्र'हायै आबुं सल' सोरजिदों। लोगोसेनो बर' थुनलाइनि बाखिखौ गोगोम खालामनो हादों।

'हाग्रा गुदुनि मै' सल'खौ फसंनायनि बिथायाबो बैफोरनिनो मोनसे। बेवहाय लेखा गोरों नाथाय थों-गोथों गोसोनि सेंग्रा सत्यप्रिय आरो लेखा गोरों जेरैबो रोंखा-राखा गोखों गोसोनि सिख्ला सरमिलामोननि गुमुर मोनस'लायै गोसोनि जाथायखौ लानानै सल'नि बिथाखौ गायसननाय जादों। सरमिलाया थारैनो हाग्रा गुदुनि सासे हेलेंसि मै। जेसेनो होसोयो एसेनो खारो। फलान सत्यप्रियआ गावनि गोसोनि बोरला-थिरजों सरमिलानि गोसोखौ मैहुर खालामनो नाजाथाबब्लाबो फेलें जादों। गावहां जाब्लानो सरमिलाया हाग्रा गुदुआव थ्रोब थाखोमाहैयै। सत्यप्रियआ गावनि गोसोनि बाथाखौ सरमिलानि सिगाडव बुंनानै लानो सानथारब्लाबो बुंनानै लानो हाया। बबेबा समाव बुंहां जाब्लाबो सरमिलाया गावनि मुखुब हाबाफारिनि दहाय लानानै दाबसेथिं ब्लद ओंखारलाडे। उनाव सत्यप्रियआ हाफा-मुवा जानाडे। सत्यप्रियनि लोरबांधिया मोगथाडव नुजायो। नाथाय सरमिलानि लोरबांधिखौ जेब्लाबो हमनो हाया। मानोना,





बिनि गोरबोनि बाश्राखौ एला-खेला मानसिया मोनदांनो जोबोर गोब्राब। फोरोंगिरि सत्यप्रियनि साननाया मोगथाडाव जाफुंनायनि खाबु दंथारोमोन जदिसो सत्यप्रियआ गावनि बुंनंगौ बाश्राखौ सरमिलानि सिगाडव थाबैनो बुंनायमोनब्ला। सरमिलायाबो बिजोंनो हाबा जागौमोन। मानोना, सरमिलानि गोसोआ इनायनो गुवार, इनायनो गोथौ। रावखौबो मुगैया, मुजुवा। जायजोंखि हाबा जाया मानो गाबखौ आर जाहोनानै लानो हानायनि गुन दं। लेखा गोरों, साननो हनो गोरोंब्लाबो सरमिलायाबो खाफालखौ मानियो। खाफालाव जा लिरनाय दं बेखौ मानिनानै लाग्रासो सरमिलायाबो। जेखौ मोननो हाथावा बेखौ हास्थायनानै गोसोखौ दुफायनानै लानो सरमिलाया गोसो जाया। मानोना, मानसिनि सोलेरा हंमा एबा दुखुखौ जेब्लाबो लुबैया। नाथाय लेखा गोरों सरमिलाया गावनि मान सनमानखौबोलाय बोरै फाहायनो, बोरै बुंनानै लानो ? जायनि थाखाय सरमिलाया रावखौबो मोनैलाय गुबुन हारिनि हौवाजों हाबा जानांगौ जादों।

**आखल दानाय (Characterisation) :** नील कमल ब्रह्मनि आखु सोरजिनाय आदबा जोबोर बाख्नायजाथाव। मानोना, बिथाडा सल 'नि आखु सोरजिनायावबो गोदान मोनसे बिथिं सोरजिदों। आखु दानायाव बिथाडा जोबोर सांग्रां। सल 'नि जाथायखौ दावगाहोनो आरो जाफुंसारहोनो थाखाय बिथाडा नांगौ बादिनो आखु सोरजियो। सल 'फोराव सोरजिनाय बांसिन आखुफोरनि मावनाय-दांनायफोरखौ नोजोर होब्ला नुनो मोनगोन साफ्रोमबो आखुवा गोखों एबा फार गोनां। बैफोर सल 'खौ जों आखु गाहाय सल ' होननानै बुंनो हागौ। 'हाग्रा गुदुनि मै' सल 'नि आखु सोरजिनायाबो बैफोरनि जुदा नडा।

सत्यप्रिय आरो सरमिलाया 'हाग्रा गुदुनि मै' सल 'नि गाहाइ आखु। सानैबो बि.ए. पास। नाथाय सानैनि गेजेराव द्लाम फाराग दं। सत्यप्रियनि गोसोआ लोरबां-थोरबां। नाथाय सरमिलानि गोसोआ जेरैबो गोखों। गोजौ फरायसालिनि फोरोंगिरि सत्यप्रियआ लोरबां गोसोखायनो

गावनि मोजां मोननायनि बाश्राखौ सरमिलानि सिगाडव बुंनानै लानो हायाखै। सानो नाथाय खुगाया गेवा। साननाय हनाया मोजां, गुरै आरो सोद्रोम आखुनि। सरमिलाया नाथाय सासे लेखा गोरों महरै जेरै जानांगौ बिदिनो जादों। स्रां-स्रिं, खोथा-बाश्रा, गिनाय लाजिनाय, बुंगोन बुड, आवगायहां फावसायहां आखुवा सरमिलानि गहेना नडा। लेखा गोरों आरो फोरोंगिरि जालायनानैबो सत्यप्रियनि आसुं-आबुं आखला लोरबांथिखौ बेरखांहोदों। अदेबानि सत्यप्रियनि लोरबां आखला सरमिलानि गोखों आखुखौ फसंनायाव द्लाम हेफाजाब होदों। फारसेथिं सरमिलानि मावनाय दांनाय आरो खोथा बाश्राखौ नायोब्ला सरमिलाया थारैनो हाग्रा गुदुनि मासे मैजों समान। सल 'नि बिमुंजों गोरोंबफ्लेथारदों। रोंखा राखा लेखा गोरों हिसाबै सरमिलाया बुंनंगौ बाश्राखौ थोंजोडै-बुडे। साननाय हनाय आरो माबाफोर थांखि लानांगौब्ला गावनि presence of mind बाहायनानै मावफुडे। Knowledge is power होननाय बाश्राया सरमिलानि आखुनि गेजेरजों रोखा रोखा बेरखांदों। समाजा बिदि लेखा गोरों मानसिखौनो नागिरो। अदेबानि गोसो गुवार सरमिलानि आखलाव मोजांल' गैया; गात्रिबो दं। मोफ्लामनाय आरो खोरोंमनाय मोननैबो दं। थेवबो सानैनिबो आखुवा सल 'आव नांसार गोनां जादों। जायखि जाया सल 'नि जाथायजों आखल दानाया जाफुंसारदों बे थार बाश्रा। बेनो जादों लिरगिरिनि देरहासारनाय।

**बर' रावखौ मोजां मोननाय :** 'हाग्रा गुदुनि मै' सल 'आव बेरखांनाय मोनसे मख 'जाथाव बिथिडा जादों गावनि आंगो बर' रावखौ गोथार गोसोजों मोजां मोननाय। बर' रावखौदि मोजां मोनो बे बाश्राया 'अरननि लाइजाम' लाइसियाव सत्यप्रियआ सल ' लिरनायनि गेजेरजों रोखा रोखा बेरखांदों। सल 'नि गेजेरजों जों बुंनो हायो- बर' रावाआ आथिखालाव गोगलैसोनानै थानाय राव नंलिया। खन्थाइ, मेथाइ, रायथाइ, सल', सल 'मा लिरनो हानायनि मोनसे गोखों बिजों। सत्यप्रियनि सल 'खौ फरायग्रा, लिरगिरि आरो अनसायग्राफोरा बेखायनो बुंदों- 'बिथां



सत्यप्रियनि सल'आ बर' थुनलाइनि जारिमिनाव गोदान मोनसे लामा बेखेवबाय। सत्यप्रिय बिथाड दिन्थिबाय बर' रावजोंबो बर' समाजनि जाथायफोरखौबो लानानै गुबुन गुबुन थुनलाइनि सल'फोरजों बादि नांनो हाथावथाव सल' लिरजायो। बिथांखौ जों साबायखर होयो।' (बि. 10)। बे बाथ्रानि गेजेरजों सल' लिरगिरि नील कमल ब्रह्मनि गोथार गोसोजों बर' रावखौ मोजां मोननायनि सावगारिया रोखा रोखा बेरखांदों। लोगोसेनो गुबुनफोरखौबो मोजां मोननो थाखाय थुलुंगा होदोंजि। बेखायनो बर' रावजोंनो सल' लिरनानै मुंदांखा जानो हानायनि थाखाय सत्यप्रियखौ एरै बाखायबावदों- 'बिथां सत्यप्रियनि सल'आव प्लट, केरेकटाराइजेसन आरो प्रेजेन्टेसननि गोदान मोनसे टेकनिक नुनो मोनो- बेखौ जों दिनैसिम बर' थुनलाइनि रावनिबो सल'आव नुनो मोनाखै। बिथांखौ बर' थुनलाइनि 'मपासा' होननानै बुडेब्ला बांद्राय खर' फेदेरनाय जानाय नड होननानै जों सानो।' (बि. 11)

**सोलोंथाइनि आंखाल :** 'हाग्रा गुदुनि मै' सल'आव बेरखांनय मोनसेबाव गोनां बिथिड जादों सोलोंथाइनि आंखाल। जोंनि समाजाव दाबो लेखा फरानि बेसेन आरो गोनांथिखौ मोनथिनानै मोनाखै। जोंनि खाथिनिनो गुबुन गुबुन हारिफोरा लेखा फरानि गोथौ गियानजों अखां सायाव दावबायहैबाय। नाथाय जोंनि बर' हारिया दाबो दैखरनि एम्बु जानानै प्रसान्ट महासागराव थानाय बादि मोनो। लेखा फराखौ गिनाय आरो मुगैनाय मोनो। लेखा फरा गारनानै संसारनि मायाजों हाल-खदाल, दाउ-अमाजों दिन थांहोनायखौनो बर' हारिया साबसिन मोनो। गामि गफा, हाग्रा-बंग्रायाव रंजा-बाजा, हालो-दैलो थानानै मोजां मोनो। हिनजावफोरनि सोलोंथाइनि बाथ्राया बेसेबा गोजानाव। लेखा फरायाव आदोर गोनां बर' हिनजावफोरा फरायनो गोसो थाब्लाबो खाबु मोना, हेंथा मोनो। गाइनाय-फुनाय, मावनाय-दांनय आरो संसार जानायानो हिनजावफोरनि मावनां हाबा होननानै सानना लायो। लेखा गोरों हिनजावफोरखौ गुसेब गियाननि बर' हौवाफोरा

हाबा लानो गिसोगारो। साहस मोना नडब्ला मानोथो जैरैबो रोंखा राखा लेखा गोरों सरमिलाबादि बर' सिख्लाया गावनिखौ गारनानै मालाय हौवा सिफ एकजिकिउटिभ इन्जिनियार पि.के. लांथासाजों हाबा जानांगौ जादों? जानो हागौ बेखायनो सरमिलानि नोजोराव बर'फोरा दाबो लेखा फरानि गोनांथिखौ मोनथिस 'वाखै। बेखायनो सरमिलानि खुगानिफ्राय बाथ्राया स्रां-स्रां ओंखारदों- 'बि.ए.ल' पासखौनो रावबो हाबा खालामनो 'साहस' खालामाखै आरो एम.ए. ! एम.ए. फरायहैब्लाथ' सोरबा सोरबा आइ होननानैसो गाबजिसिगोन। -नोंसोरनि समाजनि बिहाव बिखुनजोफोरा बिहामजोखौ माइ गायनो गोरों, ना गुरनो गोरों, गोबोर गारनो गोरों, सबायखारि, साम'खारि संनो गोरोंखौसो लुबैयो। बि.ए., एम.ए. पास जानाय बिहामजोनिखुइ नाइन-टेन फरायनानै थानाय बिहामजोखौसो बिसोर 'प्रिफार' खालामो। बेखायनो गोसो थाब्लाबो हिनजावफ्रा बारा फरायनो लुबैया। (बि. 13)। Women Empowerment नि बाथ्राखौ जोंनि समाजाव बुंदोंब्लाबो मोगथाडव जाफुडाखै। सरमिलामोनबादि गोबां सिख्लाफोरा गोजौ सोलोंथाइ मोननायनिफ्राय गोजानाव थानांदों। जोंनि समाजा हिनजाव माहारिनि सायाव इनाय हाबा मावनायनि फोरमाना रोखा जादों।

ओरैनो सरमिलाया बर'फोरनि मेन्टेलिटिनि सायाव रागा जोंखांनानै दं। फारसेथिं सत्यप्रियखौ मोजां मोनदोंमोनब्लाबो सत्यप्रियनि लोरबां गोसोनि थाखाय जुलि जानायनिफ्राय दोरोदनांदों। बेनिबो सरमिलाहा खुद्रिनाय दंखायो। बर' समाजनि नोजोराव बर' हिनजावफोरा खालि मावनांगौ-दांनांगौ, संनांगौ-खावनांगौ, गायनांगौ-फुनांगौ। सम जा दाजा खालि हाबा मावनांगौ। बेयो गसिबो हौवाफोरनि नारसिननाय। सरमिलाया जादों संसार जानायनि जेबो Plan-policy गैथि बर' समाजाव हाबा जाखांनयनि उनाव गथ'-गथायजोंनो, मावनाय-दांनयजोंनो लेर लेर दिन थांहोनांगौ जायो। जेबो दावगानायनि हाबाफारिनि सायाव सानखांनो हां मोना।





माइ जिगाब जाबसिननायाव हाग्राया उरसोनानै थानांनाय बादि बर' हौवाफोरनि नारसिननायाव बर' हिनजावफोरा बायदि जेनाजो उरहाबनानै थानांगौ जायो। हौवाफोरनि थांखियाल' बेरखाडे। नाथाय हिनजावफोरनि मोनसेबो थांखिया बेरखांफेरा। बेखायनो गोसोनि अरगेंखौ हमथा हायियाव सरमिलानि खुगानिफ्राय बाथ्राया ओंखारबावदों - 'दा बादियाव हिनजावफोरा हाबा जाया होननानै पारलियामेन्ट आव रिज'लिउसन मोनसे पास खालामोमोनब्ला हौवाफोरा अबजेकसन खालामगौमोन ना खालामामोन ?'

**बर' हारिमुनि अलखद :** नील कमल ब्रह्मनि बे मोनसे सल'आव बर' हारिमुवा अलखदाव गोग्लैनायखौ नुनो मोनदों। बर' हारिमु आरो जौनि खाथिनिनो गुबुन गुबुन हारिमुजों मोगा-मोगि एबा culture conflict जादों। गुबुन हारिमुनि गाग्लोबनायाव जौनि बर' हारिमुवा नोरजिया जालांदों। ओरैनोब्लाबो गावनिखौ गारनानै मालायनिखौ नाजावनो खायफा बर'फोरा मोजां मोनखायो। बर' हारिमुनि हालोदा दिनै थैहां-बरबहां। हारिनिनो नेवसिनायाव बर' हारिनि आयदाफोरा सानफा एफा गोमोन थाइजौ खान्थालफोर बादि मोनफा मोनफा सिरिलांगासिनो। जौनि गोजाम हारिमुवा दानि गोदान हारिमुजों मनग्लाबजागासिनो। हारिमुजों लोगोसे जौनि सुबुं सोदोमस्रियाबो लासै लासै खहा जालांगासिनो। जौनि गाननाय-जोमनाय, जानाय-लौनाय थानायाव मालायनि हारिमुवा जायगा लाफैबाय जायनि थाखाय बर' हारिमुवा थावरिनो हाया जादों। गाननाय-जोमनायाव हौवा हिनजाव सिन गैला। जानाय लौनायाव जात-कुलनि बाथ्रा गैला। हारिनि आसारखान्थियावबो मोखा-खाया नांबाय। थारै बुंनो थाडेब्ला हारिमुनि मोनफ्रोमबो बिथिडवनो गुबुन हारिमुवा हाबसनफैबाय। बिदि थार सावगारिखौ जों बर' हारिमुखौ मोजां मोनग्रा सत्यप्रियनि बाथ्रानि गेजेरजों मोननो हायो। सत्यप्रियआ बुंदों- 'नोंसोर स्लिभलेस ब्लाउस आरो मिनि स्कार्ट गाननायखौ नुबा आंहा साननो गोसो जायो, जों गोदोनि गोजाम मुगाथिं- आदम आरो इभनि

मुगाथिं थांफिननो हमबाय। जौनि सोदोमस्रिया जेसेबां आवगायदों जों एसेबां बर्बर जालांनो हमदों।' (बि. 12)। नाथाय सत्यप्रियबादि गावनि राव-थुनलाइ आरो हारिमुखौ मोजां मोनग्रा लेखा गोरों सासेल' सेंग्राया गावनि हारिमुखौ मोजां मोनहाबनानै फोथानो नाजानानै मा जानो? सरमिलामोनबादि लेखा गोरों सिखि-सिख्लाफोराबो मदद होफानांगोन। बयबो खौसेयै नाजानांगोन। अब्लासो हारिनि हारिमु आरो सोदोमस्रिया मोजाडै थानानै थागोन। नाथाय मालायनि हारिमुखौ मोजां मोनग्रा, लोगोसेनो सोरबा इयांकि इंसि स रायलायनो मोजां मोनग्रा सेंग्रा-सिख्लाफोरा गावनि हारिमुनि हेंथायैसो गसंदों। गुबुननि बाथ्राखौ बुंनडज जौनिनो सरमिलामोनबादि मेगन गुनु, सिखि सिख्लाफोरानो गावनि हारिमुनि हेंथायै हब्रा-हब्रा बिग्रायखांदों। सरमिलायानो सानसे बुंदों- 'मा जायो नोंसालाय? जों जिखि गाना जिखि मोजां मोना मानो सुलु लाबाय थायो नोंसोरलाय? जों स्लिभलेस गानब्ला, तपलेस गानब्ला नोंसोर उथुमाइ मेवनाय मोनोब्ला मेगन खाथे खाथे थाबाय। नोंसोर...' (बि. 12)। ओरैनोब्ला लेखा गोरों मावनाय-दांनाया जाम्बा-जाम्बिफोरनि सायाव गोहोम गोग्लैयो। सरमिला आरो सानैसो सेंग्रा सिख्लाया टाउनाव थानानै एसे सियान जाब्लानो हारिया दावगाया। हारिमु आरो सोदोमस्रियाबो जौगाया। बिसोरनि इयांकि इंसि रायलायनो रोंब्लानो, स्लिभलेस गानब्लानो, तपलेस गानब्लानो हारिनि हारिमुखौ मुगैजाया। बेखायनोथ' सत्यप्रियआ बुंनंगौ जादों- सरमिलाया बयखौबो गावनि बादि सानो। गाव टाउनाव थानानै सियान जानायबादि गामिनिफोरखौबो सियान जाबाय सानो। हावाइ सेन्देल एबा खोरोम आथिडव सोनो मोनफेरै हिनजावबो जौनि बर' गामिफ्रावदि दाबो दं बेखौ सरमिलाया साना। गामिफ्राव दाबो जौनि बर' हिनजावफ्रा थइला गिजियाव आथिं गाहुनो, मोदोमाव गस्ला सोब्ला मेव-मेव मोनो। लिपस्टिक, स्न'-रुजवा माखौ होनो खोनाफेरै नुफेरै हिनजावबो गामिफ्राव नागिरब्ला दाबो बायहाजार नुनो मोनगोन।' (बि.11)।



**फोजोबनाय :** नील कमल ब्रह्मनि मोनफ्रोमबो सल'आनो मोगथां जिउजों सोमोन्दो गोनां। सल'नि जाथायफोराव समाजाव जाफ्लेबाय थाग्रा सुखु-दुखुनि मोगथां सावगारि। गोग्लैसोनाय बर' समाजनि मोजां गात्रिखौ आसि थुनानै होनाया नील कमल ब्रह्मनि सल'नि आखुथाय। बेल' नड हारिनि गेजेराव इयुनाव जाथावना जाथायफोरखौ सिनथायनो सल'नि गेजेरजों फोरमायनानै हारिखौ सामोल होयो। बिनिखायनो नील कमल ब्रह्मनि दोंफ्रोमबो सल'खौ फरायनो आरो बिजिरनांगौनि गोनांथि दं। बिथांनि सल'फोराव इयुन जोलैनि गोबां थुलुंगा आरो मदद होबोगासिनो आरो इयुनावबो होबाय थागोन। मानोना, बैफोर सल'आव हारिनि थाखाय बायदि बिथिंनि गुमुर हाबनानै दं। बैफोर गुमुरखौ नागिरनानै दिहुननाया

जोंनि मावनांगौ हाबा। 'हाग्रा गुदुनि मै' (1972) सल' बिजाबनि अनगायैबो जों लिरगिरि नील कमल ब्रह्मनि गोबां सल' बिजाब मोननाय जायो। बैफोर जादों- फुंखा (1978), सल'नि फुंखा (1980?), सिलिंखार (1984), मेम दाउदै (1995), बनलता (1997) आरो गोबां। बायदि समनि बायदि लाइसिफोराव लिरगिरि नील कमल ब्रह्मनि ओंथि आरो बिदै बरहा सल'फोरा गोसारनानै दं। बैफोरखौ बुथुम-बोथाम खालामनानै बिदै सोबनायनि खाबु दं। जायखि जाया सुंद' सल'आ गोदान मुगानि मोनसे थुनलाइनि आयदा महरै जोनोम मोननाय। बेखायनो गोदान मुगानि थुनलाइनि बिदै सोबग्राफोरनि आंखालखौ नील कमल ब्रह्मआ सुफुंनो हादों होननानै जों बुंनो हायो। □

### लिरगिरि बिथांमोननिसिम जोंनि खावलायनाय

- क) लिरबिदांफोरा सिखोन-साखोन हांखोजों लिरनाय जानांगोन।
- ख) फोसाव जानाय / फोसाव जायि लिरबिदांफोरखौ दैथाय हरफिननाय जानाय नड।
- ग) लिरबिदांफोरा 1000 (से रोजा) सोदोबनि गेजेराव जानांगोन।
- घ) राव सोलायनाय लिरबिदांब्ला गुबै लिरगिरिनि गनायथि बिलाइबो हरफानांगोन।
- ङ) सुजु आफादनि थिरांथायानो जोबथा थिरांथा जागोन।
- च) लिरबिदां हरनायनि थं : गाहाइ सुजुगिरि, बड', जे.बि. हागजेर भवन  
नयनपुर, गणेशगुरि, गुवाहाटी- 6





## बर' सल 'मानि बोहैथि दाहार : मोनसे सावरायनाय (Trends of Bodo Novel : A discussion)

ड° आदा राम बसुमतारि

(1) जागायनाय : "जुजाइनि अर" (1962 ना 1967?) निफ्राय जागायनायै बर' सल 'मानि आयुवा दासिम बाजि बोसोरनि बारबाय। सोरमांगा दैमा सेरनि बायदि गामिफोर जैरै-भुटियापारायाव जागायनाय अजय-आलाइसि मोननि फेलें मोजां मोनज्जायनाय समाजारि बिथानिफ्राय मेच (कचारी-बर') आरो बृटिसनि गेजेराव तरवाल-थुंग्रि आरो सिलाइ-कामाननि गेजेराव जानाय दावहानि बिथा सोरजि जाफैबाय। बेनो जादों जारिमिनारि सल 'मा "बिरगोसिनि थुंग्रि"। आखल सोरजिफोरनि गेजेरावबो खाफालनि सायाव सोनारनानै थाग्रा अजय-आलाइसिमोननि अनगायै गावनि खाफालखौ गावनो दानानै लाग्रा सांग्रां आलाइस्री (मनरन्जन लाहारीनि आलाइस्री सल 'मा) आरो चाइकलजिकेल केरेक्टर खारलुंनि गहेल आरो आरो मन्जुबाला देबी सल 'मानि मन्जुबालासिन मोनफैनो हाबाय। बेनि अनगायैबो दोरोडारि थामथि सुबुं सायारि सलफोरमायनायनि अनगायैबो सेथि सुबुंसायारि (मनरन्जन लाहारीनि 'जम') आरो सल 'मा मन्जुबाला देबी फोरमायनाय आदब नुनो मोनबाय।

आथिखालाव गुबुन रावनि थुनलाइयारि मुलुगाव सल 'मानि मासिया गोजोर गोर्ना जाबोनो ह'मदों। सल 'माफोराबो खन्थायारि महर मोननो हाबोदों आरो बेयो जाथोसे गनायजाथाव बिजों जाबोनो लादों। बर' थुनलाइयारि मुलुगावबो सल 'माया गुबुन रोखोम (General) थुनलाइयारि सोरजिफोरनिखुइ साबसिन मासि आवग्रिनानै दडु होननानै बुंजायो। खन्थाइनि उनावनो सल 'माया गोसारनानै दडु।

(2) मख 'जाथाव बर' सल 'मागिरिफोर आरो बिथांमोनिन सल 'माफोर : बर' सल 'मागिरिफोरनि गेजेराव बिबांखौ लानानै बांसिन-सल 'मा लिरगिरिआनो जादों (i) चित्तरन्जन मुसाहारी। बिथाड 45 गांसो सल 'मा लिरलांबाय। बिथानि मख 'जाथाव सल 'माफोर जादों-जुजाइनि अर (1962-67 ?), बिखाया गावयो खुगाया गेवआ, (1972), गार्लस हस्टेल (Vol. I, II & III, 1981, 83, 84) आं निलिमामोन, (1982), नौनि मेगनानो आंनि मेगन, कल गार्ल, (1988) बिलोगो (1988), फाखन (एबा मोगथां जिउनि आन्दोयाव (2001)।

(ii) मनरन्जन लाहारी बिथानि गा 'स्नि (7) सल 'माफोरा जादों- खारलुं (1976), हाइनामुलि (1985), रेबेका आलाइस्री (2003), दाइनी (2005), जम (2006) आरो फामि (2008)। (iii) धरनीधर औवारीनि मैहुर (1980)। (iv) नन्देसर दैमारीनि मख 'जाथाव सल 'माफोरा जादों- मन्जुबाला देबी (1980), (v) कातिन्द्र सर्गयारीनि मख 'जाथाव सल 'माफोरा जादों- जारौलि (1999) खोमसिनिफ्राय सोरांथिं (2002), सानमोखाडारी लामाजों (2002) लेखा बिलाइनि दिड (राव सोलायनाय, 2005) माराम जानाय थुंग्रि (राव सोलायनाय (2005), (vi) बिद्यासागर नारजारीनि मख 'जाथाव सल 'माफोर बिर्गोस्रीनि थुंग्रि (2004), मालतीनि दाव मैना (2014), खाचपुरनि हांमा (2005) गब्लानि साव (जारिमिनारी सल 'मा, 2005), जोहोलाव दैमालु, (2004), (vii) अरन राजानि हरै मारुआव गोसोम फैसाली, आन्दो मुलुग, गोर्बोनि थैसाम,



बोरिल, सिलिंखार साइनासालि, जोबथेसालियाव जुलि, रुगुं सौहायै साइखं, राफोदाय, ददेरे आरो गोदान आलायारन। (viii) जाराफाग्ला (नबीन औवारी) नि बिषनी लैथो बनलता (1997), (ix) निलकलम ब्रह्मनि सान्दो बावदिया, (1994), (x) बिष्णुज्योति कचारीनि-बांग्रि (1988), (xi) तिरेन बर'नि बिग्राइ आरो दैसाय (2005) गोसोजों गोसो (2007), (xii) दिगन्त लावारीनि फुंबिलि (2005) खोमसि हरनि सांग्रेमा (2008) गाथोननि लोगो (2008), जिउनि दायेरी (2003), सोरमि लांनाय बिबार (2003), (xiii) लेबेनलाल मोसाहारिनि जिलिद सोरखिनाय बिखा (2008), फागुनि सिरिनाय मान्दार (2008) गोर्बो (2007), (xiv) रीता बर'नि-गंसे अखांनि सिडव (2002), (xv) हरेसर बसुमतारीनि सोमहाबनाय बोरसि (2002)।

गोजौआव मखबोनाय सल'मागिरि आरो सल'माफोरनि अनगायैबो माखासे मानि दंबावयो, जायफोरखौ रायखांजोबनो हाजोबाखिसै। रायखां जानाय सल'माफोरखौ लानानै बर' सल'मानि बोहैथि दाहारखौ गाहायाव सावराय लांनाय जाबाय।

(3) बर' सल'मानि बोहैथि दाहारखौ लानानै सावरायलांनायनि सिगां बर' सल'मानि मोन्नैसो आखुथायखौ सावरायग्रोनो नाजानाय जाबाय। बेफोरनो जादों-बर' सल'माया जादों Omniscient Novel, बर' सलमाया Novel of Incidents आरो Novel of characteres, Omniscener नि ओंथिया जादों-जोबनो गैयै गियान (Infinite knowledge), गुवार खौरां मोनग्रा (Wide information)। Omniscient आ जादों जाय गासैखौबो मिथियो-बिनो जादों इसोर। बे सोदोबखौ सल'मायारि थुनलायाव बाहायनायनि जाहोनानो जादों-ओरैबायदि सल'मा जेराव सल'फोरमायग्रा (Narrator) गासैबोखौनो मिथिजोबगौ आरो गासैखौबो गावनि नोजोराव फैनाय बायदियैनो दिन्थिनो नाजायो। सल' फोरमायग्रा एबा सल'मागिरिया साफ्रोम आखलफोरनि सिडव हाबनो गोहो दड! साफ्रोमबो आखलफोरानो

बिनि आखाइ मुथियाव थानाय बायदिनो बिनि आखाय मुथियाव थानाय बायदिनो मोनफ्रोमबो जाथायफोराबो बि सोमजिहोनाय बायदि जायो। बियो फोरमायग्रा एबा रिपर्ट होग्राल' नडब्लानो बियो गावनि आखालफोरनि सिडव हाबनानै बिसोरनि सायाव उदाडै Comment होनो हायो आरो बिसोरनि आखल आखु, मावनाय साननायफोरखौ लानानै सुबुं माहारीनि जिउ खुंनायनि सायावबो बाथ्रा बुंनो हायो।

थामथि सुबुंसायारी सल' फोरमायनाय आदब थामहिनबा थोंजों एबा खन्थाइमायारी सल'मा (direct or epic novel) आरो सेथि सुबुं सायारी सल' फोरमायनाय आदब थामहिनबा जिउ खौराडारी (authobiographical) मोननैयावबो बे सोदोबा बाहायजायो। गांसे गांनैसोखौल' लानानै गासैबो बर' सल'माफोरानो बे सिरियाव गोग्लैजोबो।

नैथियाव, बर' सल'माफोरा जादों Novel of incidents आरो Novel of characters. बुंखानानै दोनजायो जे सल'माखौ गाहायै बे मोननै थाखोआव रानग्रोनानै दोननाय जायो। गिबि थाखोआव एबा Novel of incidents आव बिथा एबा जाथायफोरनि सायाव बांसिन आरो गाहाइसिनै जर होनाय जायो। उनावनियाव बेनि उल्टा, थामहिनबा आखलनि सायाव सिगांग्रो आरो गाहाइसिनै गोनांथि होग्रोनाय जायो। Novel of incidents आवबो गोबां आखल सोरजिफोर थायोब्लाबो-नाथाय सल'मागिरि जाथाय एबा बिथाफोरनि सल'मायाव जाथाया एबा एक्सनफोरासो गुबैसिन, आखलफोरा जाथायजों फैफानायसो, बिसोरो बिथा जौगानायखौ मददसो खालामफैयो। आखलफोरखौ बिथानो नांगौ बायदियैसो सोरजिनानै लानाय जायो।

गुबुन फारसे, Novel of characterery सल'मायावबो बिथा एबा जाथायफोर थायो, नाथाय बेफोराव सल'मागिरिया आखल सोरजिनि सायाव बांसिन गोनांथि होनायखौ नुनो मोनो। बै सोरजि जानाय आखलफोरानो बिथाखौ गादबनानै दोनो आरो बिथानि



जौसिनाव थायो । बे बायदि सल 'मायाव सल' एबा बिथा थानायखाय आखल सोरजि जादों बे नडा, बिसोरहा गावहानो उदाडै सिनायथि (existence) दड आरो जाथायफोरा बिसोरनि लेडइसो । Novel of characters आव बायदि आखलफोरखौ दानो एबा महर होनो थाखाय नांगौ जानाय बायदियै जाथाय आरो बुब्लिफोरखौ दानानै लानाय जायो । सल' दानायनिखुइ आखल दानायासो बे जाथोनि सल 'मायाव बांसिन गोनांथि मोनो ।

बर' सल 'मायाव बै मोननैबो जाथोनि सल 'माखौ मोननो थाडे । बिदिन्थि हिसाबै चित्तरन्जननि जुजाइनि अर, गार्लस हस्टेल, कल गार्ल, फाखन, मनरन्जननि हाइना मुलि, खारलुं, दाइनी कातिन्द्र सर्गियारिनि खोमसिनिफ्राय सोरांथि, धरनीधर औवारीनि मैहुर, सल 'माफोरा Novel of incidents. गुबुन फारसे, मनरन्जननि आलाइस्त्री, रेबेका, नन्देसर दैमारीनि मन्जुबाला देबी, बिद्यासागर नारजारिनि बिरगोसिनि थुंग्रि, जाराफाग्लानि बिषनी लैथो, चित्तरन्जननि बिखाया गावयो खुगाया गेवआफोरा Novel of characters.

नाथाय, सल 'माखौ बे नोजोरजों खावनै थुब्ला बोखावनाया हाथावथाव आरो गनाय जाथाय जानो हाया, मानोना माब्लाबा दोंसे सल 'मायावनो आखल आरो बिथा-मोननैबो समानैबो खारदों । बर' सल 'मा जेरै-आलाइस्त्री खारलुं, बिग्राइ आरो दैस्राय, बिरगोसिनि थुंग्रिफोराव बिथा आरो आखलखौ समानै खारनाय नुनो मोनो ।

## (2) बर'सलमानि :Trends

बर' सल 'माखौ नोजोर बोनानै गाहायाव होनाय Trends फोरखौ मोननो हायो । बेफोरो जादों-

- (i) समाजारी सल 'मा (Social novel)
- (ii) सैथोआरी सल 'मा (Relistic novel)
- (iii) जारिमिनारी सल 'मा (Historical novel)
- (iv) गोसो बिगियानारी (Psychological novel)
- (v) Prose rance.
- (vi) जोहोलाव गैजायै सल 'मा (Anti-hero novel or Novel without hero)

(vii) संजिर सल 'मा (Detective novel)

(viii) Novel of Manner.

गोजौनि मोनफ्रोमखौ बर' सल 'मानि बिदिन्थि लानानै गुसुखौ सावरायलांनाय जाबाय ।

3. (i) समाजारी सल 'मा (Social Novel) : समाजारी सल 'मायाव मोनसे समनि समाजनि आरो रांखान्थियारी हालोता जायगा मोनो । बे मुगानि समाज आरो रांखान्थियारी हालसालखौ महर होनो हानाय बायदियै सल 'मागिरिया सल 'मानि बिथा आरो आखलखौ दानानै लायो । सल 'मागिरिया थांखिनाय समनि सानखान्थि, समाज आरो रांखान्थियारी हालोतखौ फरायगिरिफोरनो दिन्थिनो आरो फोसाबनो नाजायो ।

बर' सल 'मायाव समाजारी सल 'मायानो बांसिन । गोबांनि गेजेराव मख 'जाथावफोरा जादों चित्तरन्जन मुसाहारिनि 'जुजाइनि अर', 'गार्लस हस्टेल' 'आं निलिमा मोन', 'फाखन', मनरन्जन लाहारीनि 'खारलुं', 'हाइनामुलि', 'दाइनी', 'आलाइस्त्री', धरनीधर औवारीनि 'मैहुर', नन्देसर दैमारीनि 'मन्जुबाला दबी' ।

3. (ii) सैथोआरी सल 'मा (Realistic Novel) : Realistic novel आ historical novel जोंनो एखे । सल 'मागिरिया थार जाथाय आरो सुबुंफोरखौ लानानै गावनि सल 'मानि बिथाफोरखौ दायो आरो आखलखौ दायो । बे बायदि सल 'माफोराव मोननाय सैथोया गुबुन थुनलाइयारि सोरजिफोराव मोननाय सैथोनिखुइ गुबुन रोखोमनि जायो । गुबुन थुनलाइयारि सोरजिफोराव मोननाय सैथोआ जादों सानबोलावरियारि सैथो । Realistic novel आव historical novel आव थानाय बायदि Reality थायो ।

बे बायदि सल 'माखौ बर' आवबो मोनो । बिदिन्थि हिसाबै तीरेन बर'नि 'बिग्राइ आरो दैस्राय', कातिन्द्र सर्गियारिनि 'खोमसिनिफ्राय सोरांथि', मनरन्जन लाहारीनि 'दाइनी' ।

(iii) जारिमिनारि सल 'मा (Historical Novel) : जारिमिनारि सल 'माया जाथोसे मुंदांखा सल 'मा Hudson



नि रावजों बंनो थाडोब्ला जारिमिनारि सल 'माया जादों: "to combine the dramatic interest of plot and character with a more or less detailed picture of the varied features of the life of a particular age." बेयो गामामायै दोंसे जारिमिन नड। बेयो जादों जाथोसे थुनलाइयारि सोरजि जेराव जारिमिनारि मुवा एबा जाथायफोरा सल 'मानि बेकग्राउन्ड हिसाबै बाहाय जायो। जारिमिनारि सल 'माया-दोंसे बानायनाय सल 'फोरमायो-जेराव जारिमिनारि आखलफोरा एरखां जायो आरो मबेबा दाथि जुग, राइजो (हादाबा) एबा सुबुंफोरा सल 'मानि बेकग्राउन्ड जानानै फैयो। गामामायैनो बेयो जादों- fact and fiction आ गलायमोन्देर जानानै थायो।

बर' थुनलाइ मुलुगाव दोंथामसो जारिमिनारि सल 'मा जों मोनो। बेफोरनि गेजेराव बिद्यासागर नारजारिनि "बिरगोप्पिनि थुंग्रि", "खासपुरनि हंमा", "गब्लानि साव" आरो "जोहोलाव दैमालु"। तिरेन बर'नि "बिग्राइ आरो दैसाय", आरो कातिन्द्र सर्गियारिनि सोमसिनिफ्राय खोरांथि सल 'मा गांनैखौ जारिमिनारी बर' सल 'मानि फारियाव सोफ्रानो हायो।

(iv) गोसो बिगियानारि सल 'मा (Psychological Novel) : गोसो बिगियानारी सल 'मा (Psychological Novel) आ गोदान थुनलाइनि रोखोमसे सल 'मानि दालाइ। इराजी थुनलाइयाव भार्जिनिया उलफ आनो गिबि गोसो बिगियानारि सल 'मा लिरगिरि।

Psychology नि बेखेवथिया मानसिनि गोसोनि हालोतखौ फोरमायो (at mostphere of human mind). Psychology आ मानसिनि गोसोनि खोमसि करिद्रखौ बिजिरो, जेराव बायदि रोखोमनि Sentiment, feeling आरो thought फोरा सोमजियो। बेनि गोनांथिया सासे मानसिनि गोसो इसिनि साननाय (in ward warking of the mind) खौ जाफुंसारै एरखांनायनि सायाव सोनारो। बेयो सासे मानसिनि गोसोनि हालोताव सोनारो। Psychological Novel आ अराइबो आखलनि सायाव सोनारो। बेवहाय बिथा दानाया गोनांथि मोना। बेनि सोमोन्दै

मिथिनांगौ फंनै बाथ्राया जादों-सेथियाव Psychological Novel आ सोरबा मोजोमथाव हौवा एबा हिनजावनि आइजोआरि आखल दिन्थिनायखौ लानानै नड। बेयो आखलनि इसिडारि सैथोखौ दिन्थियो। नैथियाव, Psychological Novel आ आबुडैनो बिथा गैजायै नड। बेहाबो मोनसे आयदा (Theme) थायो जायनि गेजेरजों गोसो इसिनि बोहैथि दाहारखौ फोरमायो। नाथाय बेयो सरासनसायै मोनबोबाय थानाय बायदि बिथा गैया।

बर' सल 'माया बेजों आबुडै गोरोबनाय सल 'मा मोनाब्लाबो मनरन्जन लाहारीनि "खारलुं" आरो नन्देसर दैमारीनि "मन्जुबाला देबी" खौ हमफानानै लाजायो।

'खारलुं' सल 'मा गाहाइ आखल सोरजि गहेला आगियाननिफ्राय गियान फैनायनि इसारा होग्रा (Gohel is a character from ignorance to knowledge) होननानै आं बुंबोखादों। अंक रोडैनि आनजाताव फेइल जानाय, बिए पास जानो हायै न'नि हाल-खदालाव गोसो जायै, उदालगुरियाव खारलांनाय, बेवहायबो ब्लकनि साखिखौ गारनानै अरुणाचलाव खारलांनाय-उनाव न'आव फैफिनानै बिफानिफ्राय निमाहा बिनानै बिफानि गासै बिबानखौ रुजुनफैनाय जाथायफोरा बाइजोआव जानाय जाथायफोर नडबालानो गहेलनि आखलाव सिडव जानाय जाथायफोर होननानै साननानै लानो हानायनि मोनसे सुजुग दड-आरो बे नोजोरजों सावरायलाडोब्ला "खारलुं" सल 'माखौ गासै Psychological Novel होननानै बाहागो खालामनो हायो। बेयो गहेलनि इसिडारी गोसोखौ लानानै नायबिजिरनाय होननानै सानजायो। बाइजोयारि जाथायफोरखौ गोनांथि होनायनिखुइ गहेलनि गोसोयारि जाथायखौसो बांसिन गोनांथि होदों होननानै सावराय जायो। बेनिखायनो बे सल 'माखौ बर'नि गांसे Psychological Novel होननानै बंनो हायो।

नन्देसर दैमारीनि "मन्जुबाला देबी" आ सेथि सुबुंसायारि आदबजों सल ' फोरमायजानाय। बे सल 'माखौबो Psychological Novel नि गेजेरजों सावरायनो हानायनि सुजुग दड। मानोना बेवहाय



बाइजोआरि जाथायजों लोगोसेनो मन्जुनि गोसो इसिडव हारि बासिलाइनाय, मुगैलायनाय बायदि जाथायफोरनि अरा दोहो दोहो खामदोंमोन एबा मन्जुनि गोसोनि इसिडरी सैथो एबा जाथायखौ बांसिन गोनांथि होबोनाय नुदों।

(v) Prose Romance : Prose romance आ इउरपनि गेजेर मुगा आरो 18 जौथाइनि उन मुगानि Gothic novel निफ्राय जौगाखांबोदों। Prose romance आव hero एबा villain आ समाजजों नेवसिजानाय जायो, बियो समाजारि फोनांजाबनायनिफ्राय बायजोआव थानाय सासे मुखुथा जायो। बेनि सल'मा (बिथाया) जारिमिनारि जाथायनिफ्राय जागाय बोयो। बेनि बिथाया बांसिनै Adventure रोखोमनि जायो। बे सल'मायाव मोगथाडव जाथावयै एबा Melodramatic जाथायफोरा सोमजियो। इंराजी थुनलाइयाव मोननाय माखासे Prose romance नि बिदिन्थिफोरा जादों- इमिलि ब्रन्टेनि "Wuthering Height" (1847) आरो डेनियेल डिफनि "Robinson crose" (1719).

बर' सल'मायाव मनरन्जन लाहारीनि "जम"आ Prose romance. नि सल'मानि गाहाइ आखल'दाबु'नि आखल सोरजिनाया Prose romance नि hero/villain जों गोरोबलायनाय। बेनि बिथाड दानायाबो Prose romance नि बायदि Adventure आरो Melodramatic जाथायफोरजों आबुं। बेनिखायनो बे गांसे Prose romance सल'मा।

(vi) जोहोलाव गैजायै सल'मा (Anti hero novel or Novel without hero).

Novel without hero सल'माया गोदानैसो जौगाखांबोनाय जाथोसे सल'मा। Thackery नि मुंदांखा सल'मा "Vanity Fair" आनो बेनि जागायजेननाय जेराव hero गैया। बेवहाय दड' सामौ आइजो आखु- Becky shop आरो Amelia sedly. बिसोर सानैयानो सल'मानि मोजोमनायनि गुदि फुंखा (Source of intarest). बेनि अनगायैबो Thonar Hardy नि 'Tess or the Durberrilles" आवबो हिनजाव आखलानो सल'मानि

गाहाइ।

Novel without hero एबा Anti hero novel आ जादों-जेराव गाहाइ-गाहाइ जाथायफोरजों रावबो हौवा आखलफोरा नांजाबफानानै थाया, एबा बेवहाय Central Mole figure थाया। फंसे बाथाखौ बुंनानै दोनखा जायोदि बे बायदि सल'मायावबो हौवा गाहाइ आखल थायो बियो माखासे गोनां बिफावबो लानो हागौ नाथाय दोरोडरि नोजोरजों बुंनो हाथाव नड। गोनां गोनां समफोराव हिनजाव आखलासो गोनांथार बिफावखौ लागोन, हौवाया एरसोनानै थानाय बायदि जागोन। बेनिखायनो मोजोमनाया हिनजावनि सायावल' जागोन।

बे बायदि सल'माखौ बर'आवबो मोननो थाडे। मनरन्जन लाहारीनि-"आलाइस्त्री", "रेबेका", चित्तरन्जन मुसाहारीनि "आं निलिमामोन", बिद्यासागर नारजारिनि "बिरगोस्त्रीनि थुंगि" नन्देसर दैमारीनि "मन्जुबाला देबी" फोर। बेफोर सल'माफोराव हौवा आखलनिखुइ हिन्जाव आखलफोरा बांसिन बिबान थानायखौ नुनो मोनो।

(vii) संजिर सल'मा (Detective Novel) : Detective Novel आव सल'मा मोनफा crime खौ लानानै जौगायो आरो जोबनायाव Criminal एबा Crime जों लोब्बा गोनां आखला हमजाहैगोन नडब्ला मिथिजा होगोन। जय Victim बियो बुथारजानायसिम दाइ मावयाखैबो जानो हागौ।

बे बायदि सल'मायाव दोंनै मोननो हायो बेफोर जादों जारा फाग्लानि "बिषनी लैथो" आरो चित्तरन्जननि "फाखन" मोगथां जिउनि आन्दोआव'।

(viii) Novel of Manners : Novel of Manner आ जादों जाय सल'मायाव मबेबा समाजारि थाखोनि आसार-खान्थि, राइज्लायलानाय, साननाय हनाय आरो मावनाय दानायफोरा सैथोयैनो Realistic Novel आव बेरखांनाय बायदि बेरखाडे। बेनि गेजेरजों बै ओनसोलनि बै हारिनि समाजारि राजखान्थियारि, रांखान्थियारि सावगारिफोरा रोखा-रोखायै दिखां जायो।



बर' सल 'मायाव बे बायदि गोबां सल 'मा मोनो । जेरै-चित्तरन्जननि "जुजाइनि अर", धरणीधर औवारीनि "मैहुर", मनरन्जन लाहारीनि "दाइनी", "हाइना-मुलि", नन्देसर दैमारीनि "मन्जुबाला देबी", कातिन्द्र सरगियारीनि- "खेमसिनिफ्राय सोरांथि" ।

(ix) जिउ खौराडारी सल 'मा (Authobiographical Novel) : सल 'मा लिरनायनि मोनथाम आदबनि गेजेराव Authobiographical आबो मोनसे । बेयो जोबोद मोजोमथाव । बे आदबाव सल 'मागिरिया सेथि सुबुं सायाव सल 'माखौ लिरलाडे । बियो सल 'मानि सासे आखल सोरजि जायो आरो बियोनो गाहाइ आखल सोरजि जायो आरो सल 'मानि साफ्रोम आखलफोरजों सिनायथि जानानै हायो । हादसननि बादिब्ला authobiographical Novel, आ जादों Imaginary authobiography. माब्लाबा माब्लाबा बेयाव लिरगिरिनि जिउनि सैथोआ जायगा मोनो । बुंनो थाडोब्ला सानबोलावरियारि दारि आयदाफोरा लिरगिरिनि ब्यक्ति जीउजों गोरोबफालाडे । अब्ला बे सोरजिया खावसे सल 'मा, खावसे जिउखौराडारि जायो । इंराजी रावआव डिप नि "Robinson cruso", Dickens नि "David

Coperfield", Goldsmith नि The vicar of wakefield", Thackery नि "Esmond" Charlotte Bronte नि "Jane Eyre" मोनहा authobiographical.

बर' सल 'मायाव authobiographical नि गासैबो आखुथाइ गोरोब जोबनाय मोनाब्लाबो सल 'फोरमायनाय आदबखौ लानानै मनरन्जननि "जम" आरो नन्देसर दैमारीनि "मन्जुबाला देबी" खौ authobiographical होनानै हमजायो ।

5. फोजोबनाय : आथिखालाव सल 'मा मुलुगाव गोबां रोखोमनि गोदान गोदान बोहैथि दाहार (Trends) जोनोम जाबोदों । नाथाय बर 'आव बैफोर दाहारनि सल 'माफोरखौ जों मोनजोबनो हाया । गोजौआव सावरायबोनाय माखासे दाहारफोरखौ मोनो होनानै सावरायोब्लाबो नाथाय गुबै ओंथियाव गासैबो आखुथाय गोरोब जोबनाय मोननो थाड आरो जोबथारनायाव बुंनो लानाय फंसे बाश्राया जादों- बर' सल 'माखौल' नड, गासैबो रोखोमनि थुनलाइयारि दालाइफोरखौ गुवारै बिजिरनाय (Research) नि गोनांथि जानानै फैबाय । आंनि बायदि बे सुंद सावरायनायजों बर' सल 'मायाव हाबनानै थानाय मोजां बिथिंफोरा मोखाडव नुजाफैया । □

दैमाया थैलाडे नाथाय बियो रेस गारलाडे । बिफां बोराया मुरुलाडे, नाथाय बियो गोदान जोलैनि थाखाय बेगर फोलाडे ।

—मन 'रनजन लाहारि



## रावसोलायनाय आरो बर' थुनलाइ

रिपेन बर'

जागायनाय : रावसोलायनाय एबा Translationनि सोमोन्दै गोबां बुंफुरलु मोननो हायो। सरासनस्रायै रावसोलानाय होनना बुडेब्ला जों 'बबेबा मोनसे रावनि लिरनाय एबा आयदाखौ गुबुन मोनसे राआव फोरमायनो लिरनाय एबा मिथिहोनायखौनो बुजियो।' अक्सफोर्ड इंराजि सोदोब बिहुंआव बे रावसोलायनायनि ओंथिखौ एरै बुंदों Translate- Express the sense of (word, sentence, book) in or into another language (as translated Homer in to English from the Greek)"

लेटिन सोदोब Translatumनिफ्राय Translation सोदोबा फैदों होनना गेदेमा लिरगिरिफोरा बुंनो नाजायो। बे Translationनि ओंथिया जाबाय मोनसे थि आयदानिफ्राय गुबुन फारसे लांनाय खामानि। बर' राआव बेखौनो रावसोलायनाय एबा दानस्लायनाय होनना लिरबोदों। भारतनि गुबुन गुबुन रावाव बेखौ गुबुन गुबुन गावबा गाव रावाव मिथियो। जेरै- असमिया, गुजराती आरो हिन्दी राआव- 'अनुबाद', बांलायाव- तर्जमा, कन्नड़- भाषान्तर, काश्मीरी- तर्जमा, मालायालामआव- विवर्तनं, तर्जमा, सिंधीयाव-तर्जमो, तेलुगुआव- अनुवादम, उर्दुआव तर्जमा बायदि बायदि।

रावसोलायनायनि जारिमिन : सरासनस्रायै दाथायारि बिथिनि फारसे नोजोर होयोब्ला रावसोलायनायखौ मोननै बाहागोआव राननो हायो। बेयो जाबाय-खुगायारि रावसोलायनाय आरो लिरनाय महरनि रावसोलायनाय। खुगायारि रावसोलायनाया सुबुं हारिनि जोनोमजों फैफानाय। सोदोमस्रि जौगानायनि सिगांनिफ्रायनो खुगायारि रावसोलायनाया जादोंमोन होनना बुंनो हायो। बेयो एरैबादि

जानो हागौ खुगानि रावजों एबा फावजोंबो सासेया गुबुन सासेनो गावनि गोसोनि बाश्राखौ फोरमायदोंमोन।

खुगायारि रावसोलानाया जोबोर गोजाम नाथाय लिरनाय महरनि रावसोलानायखौ जों लिरनाय महराव मोननो हायो। जायनि थाखाय लिरनाय महरनि रावसोलायनायनि जारिमिनखौ मिन्थिनो गोरलै जायो। जारिमिन बादिब्ला खू:गि: थाम रोजा बोसोरनि सिगांनो रावसोलायनाया लिरनाय महराव नुजादोंमोन। 'असिरिया' होननाय हादरनि राजा सेरगना बे रावसोलायनाय हाबाखौ मावहोग्रोंदोंमोन होनना गेदेमा लिरगिरिफोरा बुंदों।

जारिमिन बादिब्ला सोनाबारि हादोरफोराव गिबियावनो दोहोरोम बिजाब बाइबेल रावसोलायनायनि गेजेरजों रावसोलायनाय हाबाया जाजेनगोयो। थुनलाइ बिथिडव खू:गि: 240 आव होमारनि 'ओदिसिखौ' लेटिन राआव दानस्लायनायानो सिगांग्रो इउरुपनि थुनलाइ रावसोलानायनि फोरमान।

जोंनि हादोराव रावसोलानायनि दोरोडरि बाश्राखौ नोजोर होयोब्ला नूनो मोनोदि, गोजाम समाव गुबुन हादरनि रावनिफ्राय भारतनि रावाव रावसोलायनाया जायाखैमोन। रावसोलायनायनि फरायसंगिरि भोलानाथ टिवारिनि बादिब्ला गोजाम समाव भारत हादरा गियान बिगियाननि बिथिडव दावगानायमोन जायनि थाखाय रावसोलायनांगौनि गोनांथि जायाखैमोन होनना बिथाड बुंनो सानो। आरोबाव बुंबावदोंदि, गोनांथि जायोब्लाबो भारतारिया गोनांथि आयदानि सोमोन्दै साबसिनै बुजिग्रोनासो गावनि रावाव लिरफिनदोंमोन।

बिस्वनाथ आय्यारनि बादिब्ला गोजाम भारतआव संस्कृत रावनि जौगासारनाय समाव संस्कृत रावनि



पण्डितफोरा खन्थाइ एबा खन्थाइमा महराव लिरनाय बाथ्राफोरखौ रायथाइ महराव सोलोंसाफोरनो फोरेंदोंमोन । जायखौ बिथाड महर सोलायनाय रावसोलायनाय बुंदों । बिदिनो रावसोलायनाया जाजेनदोंमोन ।

जौनि बर' माहारिनि गेजेरावबो राव सोलायनाया गोदान नड । नाथाय खान्थि एबा थिरांथायारि सावरायनाया जोबोर गोदान । आथिखालसिम बर' रावजों लिरनाय गोदो-गोदायनि बर' राजा महाराजानि लिरनाय राव, बाथ्रा, महर नंगुबै बुरखांनो हानाय जायाखै । ड० मामनि रयसम गोस्वामिया बुंनाय बादिब्ला बर' महाराजानि राव सोलायहोनाय गुमुरखौ मिन्थिनो हायो । महामानिफा महराजानि थिननाय बादिब्ला माधब कन्दलिया रामायनखौ रावसोलायदोंमोन । नाथाय बर' राआव नड गुबुन राआवसो ।

आसामनि गोजामसिन थागिबि बर' फोरनि गोजाम समनि जारिमिनखौ बिजिरगिरिफोरा गोबां बान बुंथाइजों गेरेमसा बर' नि जारिमिन बुरखांनो नाजानायखौ नुनो मोनो । महिरांग दानबनिफ्राय लानानै राजा इरागदावसिम बर' राजा महाराजाफोरा रायजो खुंमारदोंमोनब्ला, नसुंसेरनि गुबुन हारिनि राइजोजों सोमोन्दो एबा रायज्जायनो रावसोलायनायनि हेफाजाब लानांदोंमोन बेयो रोखा । लिरनाय महरानो जा एबा रायज्जायनाय एबा बुंनाय महरानो जायार्थोंमानो बर' फोरनि रावसोलायनाय जारिमिना माब्लाबो रेजें नड ।

सोनाबारि इंराजि थुनलाइयाव बाइबेल रावसोलायनायजों रावसोलायनाय थुनलाइया जागायनाय बादि बर' थुनलाइयावबो आबुं बिजाब महरै रावसोलायनाया बृटिस खुंथाय समनिफ्राय सोनाबारि रावसोलायग्रानि गेजेरजों जागायनाया रासिन जादोंमोन होनना बुंनो हायो । बिदिनो बर' निफ्राय English रावाव Hodgson साहाबा बर' नि सल' बाथाखौ रावसोलायनाय समनिफ्राय (1845 इं: Miscellaneous Essays Relating to Indian Subject) आथिखालाव साहित्य एकाडेमि बान्था मोननो हानाय रावसोलायनाय बिजाब

गुबै लिरगिरि महास्वेटा देबीनि लिरनाय 'जाहारनि मोनथाइ' बिजाबसिम गोबां बर' राआव एबा बर' निफ्राय गुबुन रावाव बर' थुनलाइनि सोमोन्दोआ रासिन जाबाय । आथिखालाव बायदि बिथिंनि रावसोलायनाया हुरा हुरा जागासिनो । बेनि बर' थुनलाइनि थाखाय जोबोर गोजोनथाव रादाब ।

रावसोलायनायनि गोनांथि : सुबुं माहारिया बुहुमखौ गावनि न 'सुंसेरावनो मोननो हास्थायो । जायनि थांखियाव रावसोलायनायनि गोनांथिया बांनायनिफ्राय बांबोगासिनो । रावसोलायनायनि गोसारथिया बांनायजों लोगोसे बेनि सावरायनाय थांखिया रासिन जादों । गाहायाव सुंदयै बे गोनांथिफोरनि सोमोन्दै सावरायनाय जाबाय ।

क) रायज्जायनाय : राव सोलायनायनि गोनांसिन थिलिया जाबाय रायज्जायनाय । रायज्जायनायजोंनो सासे सुबुंनि गासै बिथिड सोमोन्दो गोनां । गुबुन रावारि सासेजों रावसोलायनाय नडब्ला जों आगानसेबो आवगायनो हाया । बेयो लिरनाय महर एबा बुंनाय महरल'बो जानो हागौ । सुबुंनि सोदोमसिखौ बे रावसोलायनायानो जौगाहोदों ।

ख) सोलोंथाइ : सोलोंथाइ आयदायाव रावसोलायनायनि गोनांथिया बयनिबो गोजौआव । सोलोंथाइजों लोबबा गोनां गुबुन गुबुन बिजाब, आगजु, दाजेमफोरखौ बाहायनो थाखाय रावसोलायनाया गोनांथार । मानोना मोनसेल' रावनि बिजाब फरायनानै गासै गियान मोनजोबनाया गोरलै नड । सोलोंथाइ होनाय आरो लानायाव गुबुन हादराव मा मा आयदा बिजिरसंना मोनदों बेफोरखौ बुजिनो थाखायनो रावसोलायनायखौ गोनांथार ।

ग) सुबुं फोनांजाब : सुबुं फोनांजाबनाय राहाया रावसोलायनाय नडब्ला आगानसेबो दावगानाया जाफुंसार जाया । आथिखालाव सुबुं बिजोंआ समजों गोरोबफाना जोबोरैनो दावगाबाय । बयनिखुइबो सुबुंनि खाथिसिन सुबुंजों सोमोन्दो थानाय बिजोड जाबाय रादाब फोसावनाय । बेयो लिरनाय-साफायनाय एबा नुनाय खोनानाय राहा गोनां बिजों जानो हागौ । रावसोलायनाय नडब्ला रादाब बुधुमना फोसावनाय राहाया जेब्लाबो



आद्रा जाना थागौमोन। लाइजाम लिरनाय, जासिथाइ, फोसाव बिलाइ, हांख्राइलाइ बायदिया रावसोलायनाय अनगायै जाफुंसार जाया।

घ) हादर गेजेरारि सोमोन्दो : हादर गेजेरारि सोमोन्दोनि थाखाय रावसोलायनाया जोबोर गोनांथार। बुंनाय महर एबा लिरनाय महरानो होन रावसोलायनायनि गेजेरजोंसो मोनसे हादरनि थान्दैया जायखि जाया बिथिडव गुबुन मोनसे हादरजों सोमोन्दो खानो हायो।

ङ) बिगियान एबा गोनोखो आयदा : आधिखालाव बिगियाननि दिहुनथाइजों सानफ्रोमबो जों मोगामोगि जानांदों। जायखौ रावसोलायनायनि गेजेरजोंसो बयनिबो थाखाय बाहायनायाव गोरलै जादों।

बिदिनथि महरै कम्पिउटार बाहायनायनि सोमोन्दै बिमा रावजों बिथोनफोरखौ रावसोलायनाय लोगो लोगो गुबुन राव बुजियै एबा फरायनो हायै सुबुंआबो बाहायनो हानाय जायो।

च) मावख' एबा बिजिरसालि : गोबां राव बुंनाय सुबुं थानाय हादराव गासैबो राव बुंग्राफोरनि गेजेराव मावख'आरि सामलायनाय एबा बिथोनफोरखौ फोसावनायाव रावसोलानायनि गोनांथिया जेब्लाबो खम नड।

छ) थुनलाइ : रावसोलायनायनि गुवारसिन थिलियानो जाबाय थुनलाइ आयदानि रावसोलायनाय थुनलाइनि गेजेरजों मुलुगनां सोमोन्दोआ गासैबो बिथिडावनो जौगानाय लाबोयो जायनि जाहोनाव रावसोलायनाया थुनलाइनि सोरजिथाइनि गेजेरजों हारिमुनि जौगासारनायखौ मुलुगनां खालामदों। रावसोलायनाया गैयामोनब्ला जोंनि हादरनिनो रामायन, महाभारत, बेद, पुराण, अर्थसास्त्रफोरखौ जों सिनायथिनो रौनाय नडमोन।

रावसोलायनाय रोखोम : रावसोलायनायनि बायदि रोखोमनि बिथिं सावरायनाय सिगां बेनि दाथायनि सोमोन्दै बुंग्रोनाया गाहाम जागोन। जों मिथिगौदि, मोनसे रावनिफ्राय गुबुन मोनसे रावसिम सोलायनाय एबा लांनायखौनो रावसोलायनाय होनना बुडे।

Samual Johnson नि बादिब्ला "To translate is to change into another language retaining the sense"

रावसोलायनायनि बे हाबानि गाहाइ सामलायगिरिया जाबाय रावसोलायनाय। दाथायारि बिथिंनिफ्राय रावसोलायनाय हाबाया एरैबादि -

क) रावसोलायनाय (translator)

ख) फुंखा राव एबा फरा (sources language)

ग) थांखि राव एबा फरा (target language)

घ) आदब एबा खान्थि (technique)

सासे लिरनाय महर रावसोलायनाया साइख'ना लानाय फुंखा रावनिफ्राय थांखि रावसिम जा खान्थि एबा आदब बाहायनायै रावसोलायनाय बेयावनो रावसोलायनाय रोखोमनि बेसेनथिया बेरखांगोन। गुबुन गुबुन लिरगिरि बिजिरगिरिफोरनि नोजोराव जाखांनाय रावसोलायनायनि रोखोमफोरखौ गाहायाव होनाय बादि सरासनस्रा सावरायनो हायो-

1. गुबै आयदानि सायाव बिथा खालामनानै रावसोलायनाय : (Subject base) : फुंखा रावनि आयदाखौ बिथा महरै लाना रावसोलायनो हायो। जैरै - गोनोखो, बिगियान खौरां, सरकारि फोसावथाय बायदि बायदि। बेफोर मोनफा मोनफा आयदानि सायाव बिथा खालामना जेबो सोलायस्ल' खालामा लासै रावसोलायनो हायो। इसे सोलायस्ल' जायोब्लानो गोरान्थि जानायनि गिनांनाय थायो।

2. थुनलाइ आदानि सायाव बिथा खालामना रावसोलायनाय : (Literary subject based translation) : थुनलाइनि गुबुन आयदा बादियै बेनि रावसोलायनायाबो गुबुन गुबुन महरै जायो। जैरै-खन्थाइ, रायथाइ, फावथाइ, सुंद' सल', सल'मा, मेथाइ बायदि बायदि। थुनलाइ रावसोलायनायाव खन्थाइ आयदाया गोब्राबसि होनना गेदेमा लिरगिरिफोरा बुंदों।

3. सोदोबारि रावसोलायनाय : फुंखा रावनिफ्राय थोंजोडै थांखि रावसिम सोदोबनिफ्राय सोदोब



रावसोलायनाय जायो । जा दं एरैनो थोंजों रावसोलायनाय बे मोनसे रोखोमा थुनलाइनि बिदै गैयै बादि । बे रोखोमनि रावसोलायनायखौ गोनोखो, सानखान्थि, आइन खान्थि, बेफार फालांगि, बिरोंदामिन आयदानि रावसोलायनायाव गोनांथि जायो, मानोना मख'नाय बैफोर आयदायाव थुनलाइनि गहेनाया जायगा गैया ।

4. सोरजिफिननाय रावसोलायनाय (adoption): सोरजिफिननाय रावसोलायनायखौ महर सोलायनाय रावसोलायनायबो बुंनो हायो । थुनलाइनि आयदा जैरै-फावथाइ, सलमा एबा सुंद'सल'नि रावसोलायनायखौ बे रोखोमै रावसोलायो । रायथाइ एबा फराय बिजाबनि फरायफारिनि खायफा गोब्राब जोथोगोनां बाथ्राफोरखौ एखनब्ला थांखि रावाव बुजिनो हानायबादि सोरजिफिननाय रावसोलायनाय जायो । थांखि रावनि गोनांथि एबा हारिमुवारि, थुनलाइ, आरो समाजारि गोरोबनायखौ नोजोर होनानै गुबै आयदानि मुं, आखल, एबा फोरमायथिखौ सोलायनो हागौ । बर' थुनलाइयाव 'अबंनि फाव' फावथाइखौ भबेन फोरोंगिरिया बांला फावथाइ 'अनन्त माहात्म'निफ्राय सोरजिफिननाय एबा महर सोलायनायनै सोरजिदों । बेयो महर सोलायनाय एबा सोरजिफिननाय रावसोलायनायनि सिरियाव गोग्लैयो ।

5. ओंथि रावसोलायनाय: (sense for sense) : सोरजिलु थुनलाइनि साबसिन रावसोलायनायनि रोखोम होनना ओंथि रावसोलायनायखौ बुंनाय जायो । बेयाव फुंखा रावनि गुबै ओंथिखौल' थांखि रावसिम सोलायनाय जायो । सरासनस्रायै साया रावसोलायनाय एबा उदां रावसोलायनायाबो ओंथि रावसोलायनाय बादिनो एखे रोखोमनि रावसोलायनाय । लिरगिरिफोरा जायफोर आयदानि सायाव साया लानानै लिरनाय होनना बुडे बैफोरबो मोनफा मोनफा रावसोलायनाय थुनलाइसो ।

6. आबुं रावसोलायनाय आरो आद्रा रावसोलायनाय: (Total/Full or partial translation) : आबुं रावसोलायनायाव फुंखा रावनि गासैबो बाहागो जैरै-आयदाफारि, खोन्दो, बाथ्रा आरो बाथ्राखोन्दो बायदिखौ

थांखि रावसिम सोलायनाय जायो । नाथाय आद्रा रावसोलायनाया बिनि उल्था । गासैबो फुंखा रावनि बाहागोफोरा थांखि रावाव गोनांथि गैयाबो जानो हागौ अब्ला गोनांथि गैयै आयदाफोरखौ नागारनानै रावसोलायनो हागौ ।

7. रावसोलायफिननाय : (Retranslation) : बबेबा मोनसे आयदानि थांखि रावसिम दानस्लायनाय उनाव बे थांखि रावनिफ्राय बिथा खालामनानै आरोबाव गुबुन थांखि रावसिम रावसोलायनायाव जोबोर गिनांगौ थायो । गिबि रावसोलायनाय गोरोन्थि जादोंब्ला रावसोलायफिनग्राया जेबो मावनांगौ थाया । आथिखालाव बर' थुनलाइनि बायदि आयदा रावसोलायग्राफोरा नैथि फुंखानिफ्रायसो गोबांखौनो हेफाजाब लानाय नुयो ।

8. जथाइ एबा हानजा रावसोलायनाय : (Group Translation) : मोनसे आयदानि सायाव गोबां सुबुडज' जानानै बाहागो खालामना गावबा गाव रावसोलायो । माब्लाबा मावबादा खुंनानैबो रावसोलायनाय हाबाखौ फोजोबो । खम समनि गेजेराव रावसोलायनां आयदाखौ फोजोबनो हानायनि थाखाय बिदि रावसोलायनायखौ फरायबिजाब एबा गिदिर बिजाब रावसोलायनाय हाबायाव बांसिन बाहायनाय नुनो मोनो ।

रावसोलायनायाव गोनांथार रोंगौथि आरो जेंना : रावसोलायनायनि जेंना आरो खान्थिफोरखौ सासे रावसोलायग्राया साबसिनै मिथियो । मानोना रावसोलायनायनि गासैबो बुब्लिखौ रावसोलायग्राया गावसो सामलायो । जैरै-दावहाथिलियाव सान्थि गाहाइया गावनि सानन्थिफोरखौ सामलायनाय बादि । रावसोलायनायनि जाफुंसार जानाय जायैया बिदिनो रावसोलायग्राफोरनि आखायाव थायो । गाहायाव रोंगौथि आरो जेंनानि बिथिंफोरखौ सुंदयै सावरायनो आवगायबाय ।

1. रावनि गियान : सासे रावसोलायग्राया फुंखा आरो थांखि राव मोननैनिबो राफोद गियान थानांगोन । रावखान्थि, बाथ्राखान्थि, दाथाइ ओंथिफोरनि गियान थायाब्ला रावसोलायनाया जाफुंसार जाया ।



2. आयदानि फारसे गियान : थांखि रावसिम सोलायनो लानाय रावसोलायग्राया आयदानि फारसे गुदि गियान दंना गैया नोजोर होनांगोन। आयदानि गुदि बाथ्राजों जेबो सोमोन्दो थायाब्ला बिनिफ्राय मोजां रावसोलायनाय हास्थायनो हानाय नड। सासे आरिमु आयदानि फरायसानो बिगियान एबा गोनोखो आयदा रावसोलायनो होयोब्ला साबसिन रावसोलायनाय फिथाइ मोननो हायाबो जानो हागौ।

3. सोरजिलु गियान : सोरजिलु गियाना सासे रावसोलायग्रानि थाखाय गोनांथार रोंगौथि। फुंखा रावनिफ्राय थांखि रावसिम सोलायनाय समाव गुबै बाथ्राया एबा ओंथिया जाहाथे एखेयैनो थायो। बेनि गियाना सासे रावसोलायग्रानाव थायोब्लासो रावसोलायनाया जाफुंगोन।

4. बायजोआरि बिथिं : सुबुं थुनलाइ, हारिमु, राजखान्थि, समाजखान्थि बेफोर बिथिं फारसे गियान थायोब्लासो सासे रावसोलायग्राया जाफुंसार जानो हागोन। थांखि एबा फुंखा रावनि बे बिथिंफोरा रावसोलायग्रानि गोसोआव थानांगोन।

5. तारमिन 'लजि एबा सोदोब बिरोंमा : सोदोब बाख्खिनि गियानजों लोगोसे तारमिन 'लजि एबा सोदोब गोजौनि थिरांथायारि सावरायनायनि अनगायै बाहायथाय रावसोलायनाय फारसे जैरै- बोनानै सावरायोब्ला रोंगौथि आरो जेंनाफोरखौ साबसिनै मिथिनो हाबावगोन। बर' थुनलाइयाव रावसोलायनाय गेजेरजों बिहोमा होनाय रावसोलायग्राफोरनि सोरजिफारसे नोजोर होयोब्ला जों रावसोलानायनि बैफोर बिथिंखौ रोखा मोननो हायो। गेदेमा रावसोलायगिरि थुनलाइगिरि ग'बिन्द' नार्जारिया बर' थुनलाइयाव रावसोलायनायनि गेजेरजों बिहोमा होगासिनो। बिथानि मुंदांखा बिहोमा जैरै- बिजाब फरायनायनि गोजोननाय, बिस गारामा, अरनि गांखं बायदि बायदि। बेफोरनि गेजेराव आब्दुल कालामनि (wings of fire) अरनि गांखंखौ रावसोलायनाय समाव जेंनाजों मोगामोगि जानांनाय सोमोन्दै बिथानि बिजाबाव रायफोदनायनिफ्राय मिन्थिना मोनो. बिथाड लिरदों-

'रावदानस्लायनाय खामानिया जोबोर गोब्राब। बेराफारसे ए पि जे आब्दुल कालाम बादि सासे गेदेमा बिगियानगिरिनि आरोदा आबुं लिरबिदांखौ बर' राआव दानस्लायनानै फोरमायनाया गोरलै खोथा नड। .... बिगियान आरो आरोदा आयदायाव सोदोब बिरोंमानि आंखाल, गावग्रा हाथेर (Missile) बादि गोदानथार आयदा, बेसाद, जायजों आंहा आसुगुर गावगासेनिबो सिनायथि गैया- बे बादि आयदानि सायाव आखाइ होनाया मिनिथावना, अनथावना आरो गोमोथावनाबो। सासे बिगियान थुनलाइगिरियासो बेनि असे बिदैखौ बख्लनो हागौमोन होननानै आं सानो।'

'सानमोखाडरि लामाजों 'नि सोरजिगिरि गेदेमा थुनलाइगिरि कातिन्द्र स्वर्गियारियाबो आब्दुल कालामनि मुंदांखा बिजाब (Ignited mind) खौ 'अर नांनाय गोसो' मुं दोननानै बर'आव रावसोलायबाय। बिथानि दानस्लायनाय बिजाबनि बुंफुरथियाव एरै लिरदों- 'बिजाबखौ दानस्लायनो लाखांनायनि उनावसो आं हमदांनो हादोंमोन- सल 'माफोरखौ बर'आव दानस्लायनायाव आं जेसेबां गोरलै मोनदोंमोन बेखौ दानस्लायनायाव एसेबांनो उल्थासो जानायसै। ... बिगियाननि गोब्राब गोब्राब सोदोबफोरनि थोंजों बर' सोदोब नायगिरनानै मोनैयाव इंराजि सोदोबखौनो लाखिनांगौ जादों।'

गोजौआव मख'ना गांनै बिजाबनि रावसोलाय-ग्रानिफ्राय जोंनि बर' थुनलाइयाव रावसोलायनायाव मोगामोगि जानाय जेंनानि सोमोन्दै मिन्थिनो मोनो। गेदेमा थुनलाइगिरि ड० अनिल बर'आ 'बिजिरसं खान्थिनि सिनायथि' बिजाबनि रायफोदनायाव एरै लिरदों- 'रावसोलायनाय समाव गोबां सोदोबनि आंखालजों मोगामोगि जानांगौ जायो रावसोलायग्रा बिथांमोनहा। बिजिरसं खान्थि बायदि आयदायाव बर' बिजाब गैफेरा। बेखायनो नांगौ बाइदि सोदोबनिबो आंखाल बे बिजाबनि बेलायावबो बे बाथ्राया रोखायै नुजाथिदों। बेनि गेजेरावबो रिपेन बर'आ हाजासे गोरलै सोदोब बाहायनानै थि ओंथि फोरमायनो हानाय बादि दानस्लायनो नाजादों।'



बिदिनो आनजादारि महरै रावसोलायनायाव गोदान बिथिं लाबोदों गेदेमा थुनलाइगिरि प्रदिप राजा ब्रह्म बिथाड। रामायनखौ रावसोलायनाय समाव बेंगलि रावनि कृत्तिबासि रामायण (kritibhashi Ramayan) बादिनो खन्थाइ खबामखौ रैखा खालामना बांलायाव थानाय सिरिफा खन्थाइयाव 14 सिरि हांखो थानायखौ नागारना बर'आव खेराइनि मोन 18 मोदाइनो बाउनायजों गोरबहोफाना 18 हांखोनि खबाम बाहायना रावसोलायदों। सोरजिफिननाय रावसोलायनायाव रोखोमनि बेयो मोनसे गोब्राब रावसोलायनायाव दानस्लायगिरिया जाफुंसार जादों।

बर'नि रावसोलायगिरि गेदेमा थुनलाइगिरि रंगिना दैमारियाबो मेक्सिम ग'किनि 'Mother' बिजाबखौ 'बिमा' मुं होनानै थांखि रावनिफ्राय फिन बर' राआव दास्लायदों। बिथाड सिमान जादोंदि, 'Mother' बिजाबा गेदेरनो (रोजा)। नाथाय लाइमोनफोरनि मुडै गुसुं आरो गोरलै महराव राव रेबस्लायना होनायनि बिजाउनाव, थामहिनबा 'transcreation' नि आखुवाव बिजाबा बयबो आजावनो हानाय बादियै उन्दै महर मोनबाय।'

साया लाना लिरनायाबो रोखोमसे रावसोलायनाय थुनलाइ होनना गोजौआव मख'बोनाय जादों। बर'नि गेदेमा थुनलाइगिरि 'बिरग्रोसिनि थुंग्रि' बिजाबनि सोरजिगिरि बिद्यासागर नार्जारिनि बावैसो असमीया राआव फोसावजानाय गुरुदेब कालिसरन ब्रह्मनि सोमोन्दै लिरनाय 'आलोकर सन्धानट गुरुदेब आरो बर' समाज' बिजाबा बर' थुनलाइनिफ्राय साया लाना लिरनाय गांसे गोजौ थाखोनि बिजाब। लिरगिरि बिथाड गावनो सिमान जादों गुरुदेबनि सोमोन्दै बिथाड संनानै 2001 मायथाइयाव बर' रावजों 'सोरांनि लामाजों' बिजाबखौ दिहुननो हादोंमोन। दानस्लायगिरि बिथाड गावनो लिरनाय बर' रावनि बिजाबनिफ्राय साया लाना गुबुन रावाव सोरजिनो हानायाव जाफुंसार जादों।

बर' रावसोलायनाय थुनलाइयाव गोदान बिथिंजों मोगा-मोगि जानाय अलिन ब्रह्मनि 'गाबोन बेबादि

जादोंमोन' मुंनि बर'आव रावसोलायनाय गोनोखोआरि सल' बिजाबा मोनसे गोदान सानसि लाबोदों। गोनोखो रावसोलायनायनि मोगा-मोगि जानाय बिथिंखौ नायसंनो बेयो खाबु जगायदों होनना बुनो हायो।

गोजौआव रावसोलायनायनि गोबां बायदि बिथिं सावरायनाय जाबाय। दायो सरासनस्रा रावसोलायग्राया मोगा मोगि जाफ्लेबाय थानाय जेंना आरो राहाफोरनि फारसे गावारि नोजोरजों सावरायनो आवगायबाय। आधिखालाव थुनलाइनि बायदि आयदा रावसोलायनायनि अनगायैबो सोलौंथाइजों लोब्बा थानाय आयदाफोरनि हुरा हुरा बर'आव रावसोलायनांगौ जाना फैदों। जैरे फराय बिजाब, हेफाजाब बिजाब, फोसावथाइ बिथोनलाइ, आनजादनि सोलु बिलाइ बायदि बायदि। बेफोर आयदायाव जों गोबां समाव गोरोन्यि जानाय अजद चुनो मोनो। सोलौंथाइजों सोमोन्दो थानाय बेफोर हाबाफोराव जोंनि थुनलाइ आफादनि बिबानगिरि, फोरोंगिरि, बिबुंगिरि, आरो खायफा फरायसाफोराबो नांथाबनांगौ जाना फैयो। बेफोर हाबा मावफुंनायखौ मोननै बाहागोआव राननो हायो।

जैरै- (1) हारसिं रावसोलायनाय आरो

(2) हानजाबादियै रावसोलायनाय।

बे मोननै रोखोमनि रावसोलायनाय हाबाखौ जाफुंहोनो थाखाय सिगां रायखांबोनाय रोखोम आरो रावसोलायनाय रोंगौथिनि गियाना थाथारनांगोन। बेनि अनगायैबो बिसोरहा थानांगोन थुलुंगा, सांग्रांथि आरो उदांसि।

सरासनस्रायै हारसिं रावसोलायनायाव बांसिन गोरोन्यि जानायनि गिनांगौआ खम जायो। नाथाय बांसिन समनि गोनांथि जायो। फरायबिजाब रावसोलायनो थाखाय हानजाबादियै हाबा मावनाय जायो। अब्ला खम समनि गेजेराव रावसोलायनाय हाबाखौ फोजोबनो हायो। बे रोखोमनि रावसोलायनायाव रावसोलायग्राफोरा गोरों एबा सांग्रां नडब्ला गोरोन्यि जानायनि गिनांगौआ रासिन जायो। बेखायनो बिदि रोखोमनि हाबाखौ सासे हानजा दैदेनगिरि साइख'नानै रावसोलायनायनि मान नायसंनो बिबान होनांगौ।



**गोरोन्थि, जेंना होस्रानाय राहा :**

(1) बयबो रावसोलायग्राया रावनि फारसे गियान थाब्लाबो रावसोलायनायनि खान्थि बाहायनो रोड। बेनि राहा लानांगौ।

(2) रावसोलायग्राया गोरसे इसिंनफ्राय गावारि थुलुंगा थानांगोन।

(3) हानजा रावसोलायनायाव दैदेनगिरिया नोजोर होनांगोनदि, साफ्रोमबो रावसोलायग्राया एखे ओंथिगोनां सोदोबखौनो बाहायो।

(4) गोरों रावसोलायग्रा एबा रोंगौसा महरै जायखौ थिसननाय जायो एबा जायनो बिबान होनाय जायो, बियो गावनि रावसोलायनाय हाबाखौ मावफुडलासै सम आरो मुखुबनि असिला लानानै गुबुननो मावहोनायनिफ्राय जानगाराव थानायखौ रोखा खालामनाय।

(5) थुनलाइ आफाद एबा सुलगसोलोंसालिनि राव बिफाना सोदोब बिरोंमा एबा थिखानाय सोदोब गोदान गोदान सोरजिनायाव गोसो होनांगौ। बेफोर थिरांखाफोरखौ बयनोबो मिथिहोनाय आरो बयबो एखे ओंथियाव बाहायनांगोन।

(6) गावारि गोसो बादियै गोदान सोदोब सोरजिनायखौ होबथानाय। जायनि थाखाय बेलेबेजे ओंथि सिखाडोब्ला फरायग्राफोरनि गेजेराव गोरोन्थि सोमजि होनायनि गिनांगौ थायो।

(7) बयबो लेखा गोरों सुबुंआनो मोजां रावसोलायग्रा

नड एबा जानो हाया। बयहाबो बे आयदायाव गोसो थायाबो जानो हागौ। बेखायनो गोसो गोनां गोरों रावसोलायग्राखौसो बेफोर हाबायाव बिबान होनांगौ।

(8) मावबादा खुंनानै गोदान गोसो गुदुं रावसोलायग्रा सोरजिनो राहा लानांगौ।

(9) रावसोलायग्रानो उदांमि होनांगौ। सोलोंथाइयारि लोबबा गोनां आयदाफोरखौ जोबोर सांग्रांथियै मावफुंनंगौ। खम समनि गेजेराव हाखु-दाखु फोजोबनो नाजानाया गोबां गोरोन्थि नुजानो हागौ। गोरोन्थिया फरायसाफोरनि सायाव जेन गज्जि गोहोम गोग्लैया बेनि राहा लानांगौ।

(10) सरकारि सोलोंथाइजों लोबबा थानाय आयदाफोरनि रावसोलायनायखौ फरायसंनो एबा फोसाबनो आरो गोरोन्थि गैयै सामलायनो थाखाय मोनसे गागि फसंथाननि आवथायाव लाबोनांगौ।

**फोजोबनाय :**

रावसोलायनायनि बायदि बिथिंखौ सोरजिलु नोजोरजों नायबिजिरनानै जों जोंनि बर' थुनलाइयाव बे आयदानि फरसे जौगानाय लाबोनो हागोन। गुबुन जौगा थुनलाइजों जुजिनो थाखाय रावसोलायनाय आयदायाव आन्जादारि बाहायनायखौ जोंनि गेजेराव बांहोनांगोन। थुनलाइयारि आयदानि रावसोलायनाय बादिनो सोलोंथाइयारि, फालांगियारि बायदि आयदानि रावसोलायनायखौ बांहोनो हाब्लासो जोंनि गियाननि बाख्रिया आबुं जागोन। □

**हेफाजाब :**

(क) अनुबाद कला : विस्वनाथ आयार।

(ख) अनुबाद कथा : आबुल लेइस।

(ग) रावसोलायनाय खान्थि : रिपेन बर'।

(घ) अनुबाद तत्व आरो प्रयोग : ड० एन.एम. बेजबरा।

(ङ) बिजिरसं खान्थिनि सिनायथि : (रा:सो:) रिपेन बर'।

(च) अरनि गांखं : (रा:सो:) गबिन्द नार्जीरि।

(छ) अरनांनाय गोसो : (रां:सो:) कातिन्द्र स्वर्गियारि।

(ज) बिमा : (रा:सो:) रंगिना दैमारि।

■ बर' लिरगिरि फोर्बोनि सावरायमेलआव फरायनाय लिरबिदां। जायगा : के.चि कलेज, चिमला, बागसा खालार : 19 आरो 20 जुन, 2016



## साहित्य अकादेमी आरो बर' थुनलाइ आफादनि सावरायमेल

### आयदा : बर' लिरगिरि फोरबो

जायगा- के.सि. फरायसालिमा, हजुवा, शिमला

जिला- बागसा, बि.टि.ए.डि, आसाम

खालार- 19 आरो 20 जुन, 2016 (देवबार, समबार)

बिश्वेश्वर बसुमतारी

#### सावरायजेन बिबुंथि

साहित्य अकादेमीआ बर' थुनलाइ आफादनो खुंनो थाखाय गनायथि होनाय बे खेबनि सावरायमेलखौ जारिमिनारि होनोब्लाबो गोरान्थि जानाय नड। "बर' लिरगिरि फोरबो" बे आयदायानो जौनि बे सावरायमेलनि गोथौथिखौ रोखायै फोरमायो। दिनैनि बे फोरबोआव जौं दिनै बर'नि गागि गागि लिरगिरिफोरखौ मोननो हादों, बेयो जौनि थाखाय जोबोद गोजोनथाव बाथ्रा।

साननैनि हाबाफारिनि थाखाय गासै मोनब्रै आयदा लानाय जादों। बेफोरनो जाबाय (1) 'आं मानो लिरो'। बे आयदायाव जौं जौनि बर'नि गागि लिरगिरिफोरा मानि थाखाय लिरो बेखौ मिथिनो थाखाय माखासे लिरगिरि हांखायनायनानै लाबोदों। बिथांमोनानो जाबाय- मासिगिरि महरै - बर' थुनलाइ आफादनि आगु आफादगिरि - ब्रजेन्द्र कुमार ब्रह्म, बाहागो लानो थाखाय हांखायहरजानायफोरा जाबाय फारियै-(क) जनिल कुमार ब्रह्म, (ख) ड° मंगलसिं हाज'वारी, (ग) अरबिन्द उजिर, (घ) बिद्यासागर नार्जरी, (ङ) धरणीधर औवारी। दिनै जौं बयबो मिथिसिमोन, बिथांमोनहा मानो लिरो।

(2) नैथिआ जाबाय, 'बर' खन्थाइगिरि जथुम'। बे आयदानि थाखाय जौं मासिगिरिखौ लाफानानै गासै साद' खन्थाइगिरि हांखाय हरदों। बेनिनो मासिगिरिआ जाबाय-अरबिन्द उजिर आरो बाहागो लागिरिफोरा जाबाय

फारियै -(क) मुस्रिमा अन्जु नारजारी, कक्राझार, (ख) ग'पीनाथ ब्रह्म, रौता, (ग) कनिष्क हाज'वारी, दरंगिरि, (घ) निनगोमा स्वरगीयारी, सालबारी, (ङ) मुस्रिमा धिर्ज्युज्य'ति बसुमतारी, सिरां। मिजिं खालामबाय, बिथांमोननिफ्राय जौं मोजां मोजां आरो गोजौ थाखोनि खन्थाइ खोनासंनो मोनगोन, लोगोसे खन्थाइनि सायाव गोथौ नोजोरनि सावरायनाय खोनानो मोनगोन।

गोजौनि बे मोननैबो हाबाफारिआनो 19 जुनखालि जागोन। नाथाय बेनि अनगायैबो बर' थुनलाइ आफादनिफ्राय जुनियायै मोनसे आरो आयदा लाफादेरनाय जायो। सिगांनिआ साहित्य अकादेमीनि गनायथि मोननायब्लाबो, उनथारनिआ नड, बेयो बर' थुनलाइ आफादनि जुनिया हाबाफारि। अकादेमीनि गनायथि गैया। बे आयदायानो जाबाय -"बर' राव सोलायनायनि सायाव सावरायनाय"। बेनि थाखाय मासिगिरि महरै हांखायहरनाय जादोंमोन- ग'बिन्द बसुमतारी, बारग' नेहाथारी, बर' थुनलाइ आफाद लोगोसे सावरायजेन बिबुंथि होनो थाखाय हांखायनाय जादों- ग'बिन्द नारजारी, बारग' नेहाथारी, बर' थुनलाइ आफाद। बिथांमोनजौं लोगोसे फुंखा सुबुं महरै लिरबिदां फरायनो थाखाय हांखायनाय जादों (क) ड० बीराहासगिरि बसुमतारी, गोरायुं, बिजनी फरायसालिमा, (ख)रिपेन बर', एस.सि.इ.आर.टि। लोगोसे लोब्बागिरि महरै थागोन बर' थुनलाइ आफादनिनो





नेहाथारि- प्रशान्त बर'आ। बेनि गेजेरजों बर'नि थुनलाइआव राव सोलायनाया मा बिफाव लादों बेखौ मिथिनो हागोन।

अखानायै 20 जुनखालि फुंनि बाहागोआव गिबि हाबाफारि महरै लानाय जादों- सुबुंनि समानथाइनि थाखाय आरो गैजारोडै, निखावरिफोरनि थाखाय थैजासिम जुजिलांनाय, रुंसारि कलागुरु बिष्णुप्रसाद राभानि थैनाय सानखौ गोसोखांनानै बिनि मुसुखायाव बिबार बाउनानै मान होनाय। बेनि बाउजेनगिरि महरै हांखायनाय जादों- समाज सिबियारि गंगाघर शारणीया गेदेमाखौ।

बेनि उनावनो थामथि आरोडायारि जथुम। बेनि आयदाया जाबाय-“सुंद'सल'लिरगिरिफोरनि जथुम”। बे हाबाफारिनि थाखाय मासिगिरि महरै- धरणीधर औवारी, बारग' आफादगिरि, बर' रेबग्रा जथुम आरो सुंद'सल' फरायनो थाखाय हांखायनाय जादों फारियै - (क) ग'बिन्द बसुमतारी, बारग' गाहाइ नेहाथारि, बर' थुनलाइ आफाद, (ख) नबीन मल्ल बर' उदालगुरि, (ग) उत्तम चन्द ब्रह्म, लांहिन, कार्बि आंलं, (घ) लेबेनलाल मोसाहारी, बर'मा बागसा। मिजिं थाबाय, बिथांमोननिफ्राय मेहेरगोनां सुंद'सल' खोनानो मोनगोन लोगोसे सुंद'सल'नि बिथिंनि सायाव एसेब्लाबो सावरायनाय खोनानो मोनगोन। बेनि उनावनो जायो ब्रैथि आरोडायारि जथुम। आयदाया जाबाय- 'बर' थुनलाइनि बायदि बोहैथि दाहार।' बे हाबाफारिनि थाखाय हांखायनाय जादों- मासिगिरि महरै- ड० अनिल बर', रिडार, गुवाहाटि मुलुग सोल्लोसालि आरो बेनि सायाव लिरबिदां फरायनो थाखाय हांखायनाय जादों फारियै- (क) ड० भौमिक बर', (फावथाइनि सायाव), कक्राझार मुलुग सोल्लोसालि, (ख) बिरुपाक्षगिरि बसुमतारी, (खन्थाइनि सायाव), कटन फरायसालिमा, (ग) ड० तुलन मोसाहारी (सुंद'सल'नि सायाव), एल. अ.के. दि. फरायसालिमा, देकीयाजुलि, श'नितपुर, (घ) ड० आदाराम बसुमतारी (सल'मानि सायाव), जनता फरायसालिमा, सेरफांगुरि, कक्राझार। बेयो थारैनो जोबोद मोगां आयदा। बेनि गेजेरजोंनो जों बर' थुनलाइनि गसिबो बिथिंनि सायाव सावरायनाय मोननो हासिगोन।

बे लिरगिरि फोरबोआव थानाय आयदाफोरा सावरायगिरि एबा लिरबिदां फरायगिरिफोरनि गेजेरजों जोंनि बर' राव आरो थुनलाइआ आथिखालाव मा महर मोनदों आरो मा थामिनआव दं बेफोरनि थि गुमुरखौ मिथिनो हासिगोन होननानै जों मिजिं खालामनो हायो।

बर' रावआ दासान्दि मोनसे Endangered Language नि फारिआव दं। बुंस'नो हाया बे रावआ मुगानि उनाव मुगा थानानै थागोन ना थाया।

मोनसे रावआ थानानै थायो मोननै राहाजों। मोनसेआ जाबाय (1) 'इसिडारि' आरो गुबुन मोनसेआ जाबाय (2) 'बाइजोआरि'।

### 1. इसिडारि

(क) रायलायनाय : मोनसे रावखौ फोथांनानै लाखिनो थाखाय गावनि रावजों रायलायनाया जोबोद गोनांथार। बे खोथाखौ गोसोआव लाखियोब्ला गाहाम जायो आरो बे गोसोआ थायोब्लासो बइबो गावनि रावजों रायलायाब्लानो थानाय नड।

(1) न'खराव रायलायनाय :

(2) बाइजोआव रायलायनाय

क (1). न'खराव रायलायनाय : बइबो मानसिआनो गावनि रावजों रायलायनाया गाहाम, अब्लासो गावनि आंगो बिमा रावआ थानानै थागोन। ड० सुनीति कु : चेटार्जीआ 1935 मायथाइआव - “मानसिआ गावनि न'आव जा रावजों रायलायो बेनो बिनि बिमाराव” होननानै बुंनाय बाश्राखौ मिथिनो मोननाय जायो। बे बाश्राखौ नायोब्ला, आं बर'ब्लाबो न'खराव हिन्दी राव रायलायोब्ला आंनि बिमा रावआ जागोन हिन्दी आरो असमीया रायलायोब्ला जागोन असमीया। बेनिखायनो गावनि रावखौ फोथांनानै लाखिनो थाखाय गावनि रावजोंनो रायलायनाया गोनांथार, बेनि थाखाय गावदि सासे बर' बे सेन्टिमेन्टआ थानांगोन, नडब्ला गावखौ औरैनो बर' होननानै बुंबाय थाब्लाल' जानाय नड। बे बेलायाव जों बेंगली मानसिनि खोथाखौ रायखांनो हायो। बिसोरो खना गफा जेरावखि थायामानो गावनि बेंगली रावखौ न'खराव

रायलायनो जेब्लाबो नागारा । बेबादि गोसोआ जॉनि गेजेरावबो थानाया गाहाम, अब्लासो जॉ जॉनि रावखौ फोथानानै लाखिनो हागोन ।

क (2). बाइजोआव रायलायनाय : जॉ माब्लाबा लामा-सामा, हाथाइ-बाजार, सोहोर-नोगोरफ्राव गावजों गाव लोगो मोनलायोब्ला गावनि रावजों रायलायनाया गाहाम । बेबो गावनि रावखौ फोथानानै लाखिनायाव हेफाजाब होगोन ।

(ख) लिरनाय : मोनसे रावखौ फोथानानै लाखिनायनि बेलायाव लिरनायाबो मोनसे गेदेर राहा । बेनिखायनो जॉ जा हायो गावनि रावजों लिरनांगौ आरो बिदिनो गावनि रावखौ फोथानानै लाखिनायाव बिहोमा होनांगौ ।

(1)थुनलाइ

(2)गुबुन गुबुन बिथिं

ख (1) थुनलाइ : आथिखालाव बर' रावआव खन्थाइ, सल'मा, सुंद सल', रायथाइ बायदिसिना गोबां थुनलाइ ऑखारनायखौ नुनो मोनदों । मोनसे रावखौ फोथानानै लाखिनायाव थुनलाइहा गेदेर बिफाव दं, बेखौ जों बयबो मिथिगौ । बे बेलायाव थुनलाइ सोरजिगिरिफोरखौ साबायखर होनांगोन ।

ख (2)गुबुन गुबुन बिथिं : थुनलाइनि अनगायैबो गुबुन गुबुन आयदा दं जायफोरनि सायावबो लिरनाय नुनो मोनो । जैरै -न'खरनि गोनांथि आगजुफोर - संग्राइ, सानद्रि, खादा, जेखाइ, खबाइ बायदिसिनाफोरखौ मा महर होनानै हेबो बेफोरखौ लिरनाय, सिफोरनि बायदिसिना आगरफोरखौ मा मा महरजों एरो बेफोरखौ लिरनानै दोननाय, मा बेरामाव मा हाग्रानि मुलि होनांगौ बेफोरखौ अजाफोरनिफ्राय सौनानै लिरनाय बायदिसिना । बेफोरखौ लिरनानै दोननाया गावनि रावखौ फोथानानै लाखिनायाव बिहोमा होनायजों लोगोसे बै आयदानि गियानबो मोननो हानाय जायो ।

(ग) फोसावनाय राहा : जॉनि गेजेराव माखासे लिरगिरि दं जायफोरनि लिरनायफ्रा फोसावजाया । बेनि जाहोन महरै जॉ मोननो हायो- (1) फोसावनायनि बिजों

गैयै, (2) रांनि आंखालाव बिजाब दिहुननो हायै । थेवबो आथिखालनि आरोंदायारि मुगायाव माखासे राहा ऑखारनायखौ जॉ नुनो मोनो आरो बेफोरनि गेजेरजों गोबां लिरगिरिफोरखौनो फोसावनायखौ मिथिनो मोनो ।

(1)बिजाब

(2)खौरां बिलाइ, लाइसि, खुगा लाइसि बायदि

(3) Internet, Twiter, Face Book, Whats App बायदि

ग (1) बिजाब : बिजाबआनो जाबाय मोनसे रावखौ फोथानानै लाखिनायनि मोनसे गेदेरथार राहा । जॉनि गेजेराव गोबां लिरगिरि दं जायफोरा गावनि रांजों नडबा गुबुन फोसावगिरिनि गेजेरजों बिजाब दिहुनो आरो बेनि गेजेरजोंनो गावनि रावखौ फोथानानै लाखिनायाव बिहोमा होयो । बे राहानि गेजेरजों मोनसे रावखौ अरायजोर खालामनानै दोननो हायो ।

ग (2)खौरां बिलाइ, लाइसि, खुगा लाइसि : लिरगिरिफोरा खाइसेआ बिजाब महरै सेबखानानै दिहुनो आरो खायसेआ हाया । जायफोरा हाया बिसोरनि थाखाय गाव लिरनायखौ फोसावनायनि राहायानो जाबाय खौरां बिलाइ, लाइसि, खुगा लाइसि बायदि बायदि । दासान्दि बर' रावनि खौरां बिलाइ दं, लाइसि दं, बोसोरफ्रोमबो गोबां लाइसि आरो खुगा लाइसि दं, बेफोराव गावनि लिरबिदांखौ हरनानै फोसावनो हायो आरो बेबादि फोसावनायनि गेजेरजोंबो गावनि रावखौ फोथानानै लाखिनायाव बिहोमा होनो हायो ।

ग (3) Internet, Twiter, Face Book, Whats App : दानि आरोंदायारि मुगायाव गावनि लिरबिदांफोरखौ फोसावनायनिबो गोबां राहा ऑखारबाय, जैरै- Internet, Twiter, Face Book, Whats App बायदि । गावनि लिरनायखौ बेफोराव फोसावनायनि गेजेरजोंबो गावनि रावखौ फोथानायाव बिहोमा होनो होयो ।

(घ) सोलोंसालिआव राव

(1) बिजों

(2) आयदा

(3) बिफान



घ(1) बिजों : बर' रावआ आसामनि गुबुन गुबुन जायगायाव गोजौ फरायसालिफोराव दासान्दि थाखो जि (X) सिम बिजों महर मोननानै दं । बेयो थारैनो बर' हारिनि मोनसे गेदेर Achivement आरो बेयो बर' रावखौ फोथानानै लाखिनायाव गेदेर बिफाव लानानै दं । बर' थुनलाइ आफादआ Higher Secondary सिम थिसननो नाजादोंब्लाबो दासिमबो हायाखै । बेनि थाखाय जों सरखारखौल' दाय होब्ला जानाय नड, जोंनिबो दाय दड', मानोना बिजाबखौनो दासिमबो राव सोलायजोबनो हायाखै, जायनि थाखाय सरखारखौ नांगौबादियै नारसिननो हायाखै । थेवबो गोजौ फरायसालिसिम जाखिनि जादों बेयो बर' रावखौ फोथानानै लाखिनायाव गोबां बिहोमा होदों ।

घ (2) आयदा : बर' रावआ दासान्दि Higher Secondary थाखोआव MIL आरो Advance आयदा महरै आरो बडलेण्ड, गुवाहाटी, डिब्रुगड आरो आसाम मुलुग सोलोंसालिनि सिडव थानाय फरायसालिमाफोराव BA थाखोआव MIL, Elective आरो Major महरै सोलिगासिनो दं । बेफोरबो मोनसे रावखौ फोथानानै लाखिनायाव गोबां बिहोमा होयो ।

घ (3) बिफान : दासान्दि बड'लेण्ड, गुवाहाटी आरो डिब्रुगड मुलुग सोलोंसालिआव बर' रावनि MA बिफान सोलिगासिनो दं । 2017 मायथाइनिफ्राय कृष्ण कान्त सन्धिकै हादरसा उदां मुलुग सोलोंसालिआवबो बर' रावनि MA बिफान खुलिसिगोन होननानै लेडइ गिसिया गेदेमा ड० हितेश देकाया खोथा होखाबाय । बे MA बिफान खुलिनायाबो मोनसे राव फोथानानै लाखिनायाव बिहोमा होयो ।

(ड) हारिनि आफादफोर : जोंनि बर'नि गेजेराव दासान्दि गोबां आफाद दं । बर' बिजोंखौ फोथानानै लाखिनायनि बेलायाव नांगौ समाव सोमावसारनायफोराव बर' थुनलाइ आफादखौ हेफाजाब होबोदों । बेनि अनगायैबो गाव गावनि बोसोरारि जथुम्माफोराव बिसम्बि आरो बिजाब दिहुनबोदों आरो बेफोरनि गेजेरजोंनो बे

आफादफोरा गावनि रावखौ फोथानानै लाखिनायाव बिहोमा होबोदों ।

(2) बायजोआरि

(क) मुलुग साग्लोबनाय - इंराजी रावनि गोहोम: आथिखालाव इंराजी रावआ मुलुग नाडैनो साग्लोबसारनानै दं । बे रावनि साग्लोबनायावनो मुलुगनि गोबां फिसा फिसौ रावफोरा थैलांबाय आरो गोबाडनो थैनायनि लामायाव । बे रावआ जोंनि बर' रावखौबो गोबां खहा खालामबाय । गोरो- गोरा गोबाडनो, गाव गावनि फिसा फिसौफोरखौ गाहाम खाबु थासेयावबो जेबो गाहाम खाबु गैयैबादि बर' बिजोंनि सोलायै इंराजी बिजोडवसो फोरोंनायखौ नुनो मोनगासिनो दं । बेल' नड, नुनो मोननाय बादियैब्ला, बर' बिजोंनि गोबां फोरोंगिरिआनो बर' रावनि सोलायै इंराजी रावनि बिजोडवसो गाव गावनि फिसाफोरखौ फोरोडे, जाय आखुआ जोंनि बर' रावखौ गोबां खहा खालामबाय । बे इंराजी बिजों थामहिनबा गुबुन बिजोडव फोरोंनायनि थाखायनो जोंनि बर' रावनि बिजोडव फरायसानि अनजिमाया जोबलानो हमदों आरो माखासे फरायसालिआ बिदिनो थैनानै थांबायबो । बिदिनो बर' रावआ गोबां खहा जालांगासिनो दं ।

(ख) हादरारि रावनि गोहोम - दासिमहालागै सरखारा हिन्दीखौ हायुडरि राव महरै फोसावआखैब्लाबो, हिन्दीआनो दा भारतनि हायुडरि राव महरै सोलिगासिनो दं । बे हिन्दीआ जोंनि रावआव इंराजीबादि गोहोम खोखलैनायखौ नोजोराव गोग्लैयाखैब्लाबो, लासै लासै सिरियै साग्लोबबोगासिनो दं । हिन्दीखौ फोसावनो थाखाय भारत सरखारआ खौथि खौथि रां बाहायगासिनो दं, जायफोरखौ जों नुनो मोनाखै । फारसेथिं बे बेलायाव इलेक्ट्रिक बिजों, सिनेमा बायदिफोरा गेदेर बिफाव लानानै दं । बे रावआबो फिसा फिसौ रावफोरखौ मन ग्लोबनो लागासिनो दं । बेनिखायनो जों बयबो सांग्रा जानानै थानाया गाहाम ।

(ग) हादरसायारि रावनि गोहोम - आसाम



हादरसायारि रावनि आयेन 1960 नि बादियैब्ला असमीया रावआनो हादरसायारि राव । नाथाय 1984 मायथाइआव बेखौ सोदांनानै बर' रावखौबो असमीया रावजों लोगोसे लोगो हादरसायारि राव महरै आसाम एसेमब्लीआव नाजावनानै लानाय जादों । बे असमीया रावआ बर'नि गेजेराव गाञ्जि रोखोमै गोहोम खोखलैनानै दं । जोंनि गोबाडनो बर'नि सोलायै असमीया राव रायलायनानैसो मोजां मोनो । गोबाडनो गाव गावनि न'खराव बर'नि सोलायै असमीया रावसो रायलायो आरो गोरों- गोरा गोबाडनो, गाव गावनि फिसा फिसौफोरखौ गाहाम खाबु थासेयावबो जेबो गाहाम खाबु गैयैबादि बर' बिजोंनि सोलायै असमीया बिजोडवसो फोरोडे । बेबादिनो असमीया रावआ बर' रावखौ खहा खालामगासिनो दं । बेनिखायनो जों गावनो गाव सांग्रं जानानै थानायनि गोनांथि दं ।

(घ) सरखारनि बिफाव - हादरारि सरखारानो जाथों एबा हादरसायारि सरखारानो जाथों गावनि आवथानि सिडव थानाय फिसा फिसौ रावफोरखौ फोथानानै लाखिनायनि गोबां बिबान दं । बेफोरबादि फिसा फिसौ रावफोरखौ माबोरै फोथानानै लाखिनो हायो बेनि थार राहा लानांगौ । नाथाय भारत सरखार आरो हादरसायारि सरखारा दासिम बेबादि जेबो राहा लानायखौ नुनो मोनाखै । फारसेथिं भारतआव सोलौंथाइनि बिबाना हादरसा सरखारनि आखाइआवसो दं । बेबादिआव आसाम सरखारा हादरसानि सिडव थानाय फिसा फिसौ रावफोरखौ फोथानानै लाखिनायनि थार राहा लानांगौ, नाथाय आसाम सरखारा दासिमहालागै जेबो थार राहा लानायखौ नुनो मोनाखै । बेनि सोलायै फिसा फिसौ रावफोरखौ फोथैनायनि राहा लानाय बादिसो नुनो मोनो । दासन्दि बर' रावआ जि थाखोसिम बिजों महरै, Higher Secondary थाखोआव MIL आरो Advance आयदा महरै, BA थाखोआव MIL, Elective आरो Major आयदा महरै आरो गंथाम मुलुग सोलौंसालिआव बर' रावनि MA बिफान

सोलिगासिनो दं । बेनि थाखाय सरखारा नांगौ फरोंगिरि होनांगौ नाथाय होआखै, नांगौ बिजाबफोरखौ समायाव दिहुननानै होनांगौ, नाथाय होआखै, न' बां होनांगौ, नाथाय नांगौबादियै होआखै । थुनलाइ आफादनिफ्राय गले गले नारसिनबाय थानाय जादोंब्लाबो मावफुंनो नागिरा, खेर खेराया । सरखारनि बेफोरबादि नेवसिनाय बिफावनि थाखायनो बर' रावनि बिजों, आयदा आरो बिफानफोरा मोजाडै सौलिनायाव हेंथा मोनगासिनो दं । बे बिफावआनो बर' रावखौ गोबां खहा खालामगासिनो दं ।

(ङ) गुबुन हारिनि आफादफोरनि बिफाव - आसामआव गोबां हारि हारिसाफोर दं । बिसोरहा गावबागाव गुबुन गुबुन आफाद दं । नाथाय रावजों लोब्बा थानाय आफादआनो जाबाय थुनलाइ आफाद । गुबुन गुबुन बे थुनलाइ आफादफोरा गोरोबनानै हाबा मावलायोब्ला, हेफाजाब होलायलायोब्ला गोग्लैसोनानै थानाय रावफोरा एसेब्लाबो हां लानायनि राहा मोनगोन । बे बेलायाव असम साहित्य सभाया असमीया रावखौ गुबुन गुबुन फिसा फिसौ रावफोरनि सायाव जाबसिननानै होनो नाजानायबादि नुनो मोनो । मानोना असमीया रावखौ "राज्यिक भाषा" होननानै फरायसालिआव बिजों महरै लाथारनांगौ होननानै दाबि खालामगासिनो दं । जानो हागौ "असम राज्यिक भाषा आइन-1960" खौदि सोदांबाय बेखौ बिथांमोनहा मिथिनानैबो मिथियैबादि खालामनानै दं । बेबादिआव फिसा फिसौ रावफोरनि थुनलाइ आफादफोरा खौसेयै ज' जानानै गसंथायाब्ला गाव गावनि रावखौ फोथानानै लाखिनायानो गोब्राब दं ।

(च) दोहोरोमनि बिफाव - आसामआव गाहइयै "नव बैष्णव धर्म" फोसावनायनि उननिफ्राय गोबां हारि हारिसाफोरानो गाञ्जि रोखोमै खहा जानांबाय । जानो हागौ बर'हानो बयनिखुइ खहा जासिनथारदों । मानो होनोब्ला बे "नव बैष्णव धर्म"आव बारस्लायनायनि उनाव बयबो गावगावनि रावखौ नागारदोंमोन । बर'फोरनि गोबाडनो



बे दोहोरोमखौ लानायनि उनाव गावनि बिमारावखौ गारदों, गारनो गोनां खालामथारदों । जायनि जाहोनाव दा - तिनचुकीया, डिब्रुगड, शिवसागरनि बर'फोरा बर' राव रायलायनो रेंलिया । लोगोसे ग'लाघाट, श'नितपुर, नगाव, मरिगाव, गोदोनि गावस्त्रायै कामरुपबादि जिलाफोरनि माखासे जायगाफोराव बर'फोरा बर' राव रायलायनो रेंलिया, बावलांजोबबाय, नागारजोबबाय, असमीया रावखौनो गावनि बिमाराव खालामनानै लाबाय । बेबादियैनो दोहोरोम बारस्लायनायनि गेजेरजों बर' रावआ गोबां खहा जाबाय ।

बेबादि गोबां जेंना दड'ब्लाबो, जों बइबो जयै

गावनि रावखौ फोथांनानै लाखिनो नाजानांसिगोन । बे बेलायाव बर' थुनलाइ आफादआ जोनोम बुब्लिनिफ्राय बिमारावखौ फोथांनानै लाखिनो नाजाबोनायनि थाखायनो दिनैनि बे महर मोनदों । दिनैनि बे बुब्लिआवबो साहित्य अकादेमीनि मद'दजों बर' थुनलाइ आफादआ शिमलानि के.सि. फरायसालिमायाव बर'नि बे लिरगिरि फोरबोखौ खुंनो लादों आरो बे बुब्लिआव बर' रावनि थाखाय गावनि लिरनायनि गेजेरजों बिहोमा होनाय बइखौबो नडब्लाबो, गोबां गेदेमा लिरगिरिफोरखौ ज' मोननो हादों । मिजिं खालामो, खोनासंग्राफोरा गावसोर नागिरनाय गोबां बाश्राखौनो बे सावरायमेलाव नागिरनानै मोनगोन ।

लेखा गोरों गोरा जाब्लाबो जेबो खामानिखौ मावनो हायो । लेखा रोडैनि खामानि मावनाय, संसार सालायनाया मेगन खाना लावधि बुग्रोमनानै आन्दाजै लामा थाबायनाय बादि ।

—गुरुदेब कालिचरण ब्रह्म



खथाइ

## बेयाव रावबो मानसि गैया

रत्नेश्वर बसुमतारी

बेयाव दा रावबो मानसि गैया  
 सोरगिदिं सिरि-सिराय  
 उन्दुलांदोल' मोदाइ हमनाय गोलाउ लामा  
 बोहैगासिनो दं हरनि दैमा  
 आघोननि सनाथि माइफोरा  
 आखाइ फायखंना लिंहरो एनजरफोरखौ  
 खेंखा-खेंखि लुं लुं गुरुंजों  
 हाजासे रोगायो माइफोरखौ  
 बिसोरनि नुस'यि बाख्रियाव  
 बिसोरखौ नुनानै सखाफोराबो  
 गरसे गरनैयै रावबबो नुस्लाबियै  
 गुन्थुथ्रिजों माइफोरखौ रोगायो  
 बिसोरनि सुन्दुकखौ मा नायनो  
 स'ना-रुफा दोन-दौलदजों बुंफबनाय  
 नाथाय  
 राजानि बाख्रिया खलंखला जाना थायो  
 रिजार्भ बेंक हाखो होयो  
 ट्रेजारियाव थाला लगायो  
 बिबारिया भिखा मोनि सम  
 मावदांसाया रेसन मोनि सम  
 गमामायै राजाया उतखौ भेटानेग्रा खालामदों  
 नखरनि ना फख्रिनि नाफोरा  
 जोबस्रांसै जोबस्रांयै  
 बेनि हेंथायै राजा लामाथिं  
 मिसिल आवगायलाडे  
 ग'साइखौ गिनाय मानसिफोरा  
 आला-माला दुखु-दाहाजों  
 अखरांसिम नायजोमना थायो

गेदेर गोलाउ मानसिफोरा उट दाउ बादि  
 बालायाव खर' गोजोमना थायो ।  
 फिसा फिसा मानसिफोरा  
 गिनायजों थनथ्र 'जायो  
 खिजानिबा राजा आरो भेटा नेग्राफोरा  
 आखाइजों बुवालासे ओंखामजों बुथारो  
 बेनिखायनो रावबो मेगन बेखेवना नाया  
 खुगा सिया  
 आखाइ दिखाड  
 बेयाव दा रावबो मानसि गैया  
 सोरगिदिं सिरि-सिराय  
 उन्दुलांदोल' मोदाइ हमनाय गोलाउ लामा  
 बोहैगासिनो दं हरनि दैमा । □

## नार्सिसास

देतसुं स्वर्गीयारी

आदम-इभआ  
 थाबायलांदों  
 मांखरसालि फारसे  
 अखाफोरनि  
 गोथै सह' बाननानै ।  
 गोबोखार बैसोमुथिया  
 जोनोम होदों  
 नार्सिसासनि ।  
 हाथरखिनि गेवलां  
 बिबारबारियाव दा  
 मरूभुमिनि हांगार । □





## महर गैयै मोनसे गाब

कानुन

सानलावरिजों आलायना दोनजानाय  
महर गैयै मोनसे गाब ।  
गोथार जौसाडव  
दोलोसे सियालफोरा  
नारा-नाथार अरलायलायदों  
जानांगौ माखौबा थोजोबैनि सिलादों ।  
नाथाय बिसोरनि गोदोनायाव दं  
गांफा-गांफा आरनाय फालि ।  
ड (6) थाखोआव फरायनाय  
अरननि फिसाज्ला एलबार्ट  
सनानि मासियाव जिरायना  
आइ-पन लाना इन्टारनेट नायदों ।  
सिबाय अनारु, मोनबारु.... ।  
नांगोल मुथि हमना अखां नादावनायावनो  
जारां साना सोनाब फैंसालियाव गोमाहैदों  
आरो सिबाय लाबारि....  
ग्लबेलाइजेसननि दाहाराव थावरिनो  
हां थोनो-थोनो जादों  
इयुनखौ नायहरना-  
बोरमा-मेन्दानि खानायखौनो  
पालारिव थांना सिदा खालामहैदों । □

## खन्थाइ आरो खन्थाइगिरि ( सनेट )

अनिल कुमार ब्रह्म

जेब्ला दिया-दखा, खना-खनला बिलात लाथानि  
जुजिथायारि गोहो बोलोआ मानसिखौ खालामो गरामि,  
खन्थाइया अब्लानो होयो बयखौबो थियारि  
आरो थिफायसनो मानसिनि गोहोनि खंथा सिमनानि ।  
जेब्ला गोहो आरो बोलोआ सेबहोयो  
मानसिनि मोनदांथि आरो सानजिलदनि आवथा,  
खन्थाइया होमब्लानो गोसोआव खोख्लैयो  
सुबुंथिनि बिथाथि जोंसारनायनि खोथा ।  
गोहोआ गुबुंले खालामो सुबुं दोहोन,  
खन्थाइया सोदाडे गुबुंनायखौ गोगो-सिखोन;  
खन्थाइगिरिहा जेबो गैयाब्लाबो दं मोनसे गोरबो  
आरो मोजां मोननाय गोथार गोसो आबुरुनः  
गांसे गुफुर लांदां लेखा बिलाइनि मायाव,  
सिथाबनानो थायो खन्थाइगिरिया खन्थाइ मदरै जेराव । □



मुट' सल'

## दाउथु बिखा

उत्तम चन्द्र ब्रह्म

आं सोलेरखौ नागारबाय । मासे गुफुर दाउथुनि सुखुथावै खेव-खेव एमब्राबाय थानायाव आं न'आवनो फुथुथ'नानै ओंखारबोबाय सोलेरनिफ्राय

-फैबाय ? दाउथुवा सोंबाय आंनिथिं नायनानै । जानो हागौ बियो फोथायाखैमोन, आंखौ ओंखार बोमारगोन साननानै, बिनिखायनो ओंखार बोखानायखौ नुखाथारनानैबो मेगनाव फोथायनायनि आंखालजों आंनाव सोंबावदों । बिनि बे बायदि सोंलुआव खेरमे-खेरमे जाखांबोनाय राहाखौ हमथाथ'नानै आं फिन होयो गुसुडै- 'औ' ।

-मानोथो एसेबां गोबाव ? -आंनि रागाखौ फोजों सिननानै बियो सोंदेर बावो ।

-हाबाब ! नों मालायखि ओंखारनो होनब्लानो ओंखार ब्रबथारनो हायो नामा सोलेर एंगारनानै ? एसे हब्राहां जादोंमोन आंनि गाराड, रागाजों !

-हाम्बायसै दे । गोखै फैदोल' आंजों । बुंनानै बियो गांखंसिबो । गोजौथिं ।

-आंलाय बोरै थांफानांगौ !

-होत् फैनायल'नाय नोडो । आथिं-आखाइ सिमावाब्ला जायो नामा ! -राखाडै बुडे दाउथुआ ।

-आंनावलाय मानि आथिं-आखाइबाव ! गोब्रासिन जादों आंनि गाराड ।

-दे-नों फैनोल' नाजा गांखंआलाय मा खालामो गोसोआबो अखां दिन्थियो !

रागाजों जाबजों आं गावखौनो नाजाफायो दाउथुजों लोगोसे दैखांफानो ।

मादि गोमोथाव- आं गावखौनो मोनफायो दाउथुनि उन-उन ! बे माब्रैहाय जाथावगौ ? सिगाडव माथो मुसे-ससेखौनो बाज्लनो हायामोन दा माथो जोमै सेर-सेर !

-सिगां नोंहा मोनसे थि मुं दंफायोमोन, सोलेरजों

लोगोसे । बे मुडनो नोंखौ माब्लाबा मिनिहोदों, बोराब होदों ! एखनब्ला खर' दैखांहायै लाजिबो फोनांदों । दा सोलेर गैला नालाय मुडबो गोमाबाय । मिथिनानै लाखा-बे मुडनो नोंखौ सम सम जुब्राबो खालामबोदों ।

दाउथुआ सिगां लांबाय थायो । बिनिनो उन उन आं सानलांबाय थायो- दाउथुआ बोरै मिथियो होमबा ! आंनि गोसोखौ !

-नै, गाहायथिं नाइहरसाय ! -दाउथुआ मिनिस्तुनानै बुडे ।

...गोलाव दैमा दिंग्राय-दिंसि । हाजो सेर सेर । दैमायाव रिफिखांदों बेसरथिलिनि गोमोगाब, गोथां अखोराडव बिरबायना गुफुर जोमै हानजायाबो गेलेफादों बेसरजों लोगोसे दैमानि बिखायाव । हायाखै थानो हाजो थिखिनियाबो एरखेनानै, बिबो थब्ल'फादों सोमखोर गाब गोबानानै । हाजो खेरफाजों ओंखारबोनाय सान गोलींआबो लाजिस्तुयैनो आबिर सारहरो दैमासे दैयाव । दाउथुनि गाडबो दैमानि गाब लादों । आं गोमोदों ।

-मोजां नडना नुथाया । -दाउथुनि रावआव आं हुस मोनफिनो ।

-नों साननो हागौ- 'आंबो गेलेफानो ।' सामोल नों बे गोरान्थिखौ दामाव, माब्लाबाबो । दाउथुआनो बुंबावदों ।

-मानो ?

-नोंनि आगान गोग्लैबानो बेसरनि बिबारा खोमानानै लागोन गावनि गाब । हाजोआ सोमखोरथिखौ, अखाड खायमाथिखौ दैमाआ बोहैथिखौ, सानआ जोंखोलथिखौ, जोमैआ गावनि खारसारथिखौ !

-माथोलाय हनै बोरमाफ्रानो फालो-फालोलाय !

-बिसोर जाबाय बोरमा । मिथिंगाया गिया जुनाथखौ नाथाय सोमखियो मुनुसनि आगानाव ।



-आंजोंथ' सोलेर गैथ'ला ना!

-सोलेरनि मोनामनाया। नोंहा दाबो खारजोबाखै!

सिंसिं बोराबनाय बायदि मोनो आं गावखौनो दाउथुनि रावआव।

-बे दैमाया बहा जोबथादों? आं सोडे।

-नों बिरलानो हाजासेमहालागै- गोजानाव!

बिब्दिनो बिरलांबाय थायो दाउथुनि उन उन। जिरायथ'नाय गैया जासे...।

-आं थांफिन नांसिगोन। माथो बेलासि लामबायसो। आं लासैनो बुंबाय।

-ए होमब्ला नों लौलिया। नोंलायमाथो अखाफोरनि फिथिखाखौ लौनायनो होन्नानैसो फैदोंमोनलाय। दाउथुआ एसे सोमोनाडे।

-नांथला नामा! सोलेराबो गोबावसै।

-नोंना बिदिनो सोलेर-सोलेर। मा दं सोलेराव। नोंनि नसुंनि नोमबाजैआ जेब्ला खाफालनि अलंबार मेगननि हाथरखिखौ खोमानानै लादोंमोन; सानसुथिरनि सिमब्रेखानाय बाराव जेब्ला रामोन्दानि उखुम मुदाया बुदलाब लांजादोंमोन- बहा दंमोन नोंनि सोलेरा। नोंनि सेलेरावदि मेगनबो गैयामोन। नों मिथियामोन नामा? खालि सोलेर सोलेर-सोलेर-मेगन जाखर जाखर दाउथुआ आंखौ नाइहाब-नाइहाब होगदावखाडे।

आं जेबो फिननो गोसो जायाखिसै। रागाया बिहाल' गैया। बाराब्ला आंबो? ' ब्दसो!

... बि जाबाय मासे दाउ-जुनार। बि बोरै मिथिनो आंदि बिसिबां मोजां मोनो -अनो आंनि सोलेरखौ। हाद्रि गुन्द्रासे, थामफै मासे बानो होआखै आं आंनि सोलेराव सान्दुं नांसि, अखा सिसि खालामबोदों आं सोलेरखौ। गानफब-जोमफब देलायफब साजायबोदों आं दैज्लां-मेसें। र'सा नांहोफैराखै हरनि सोलाव लानानै ब्लाबो। बि नेहाद दाउथु थारा मा मिथिनो- आंदि नुबोदों- आइ-आफा, बिदा-फंबाय, बिब'-बिनानाव, फिसा-फिसौ, बाय बाहागिफोरखौ। अनसाय बोदों बुथुमबोदों जेब्लाबो खैफोद-आफोद बिसोरखौ। दिनै बियो आंनि सोलेरखौ खानासो होनबाय! होन्थों-बिजों आं थांफा खाला

थांफिननोसै आंनि सोलेरनिसिम।

-ऐ! हनै लोंद' ...बाबांसिन नाइख्लें हरो आं बि दिन्थिहरनायथिं।

...उस! मादि उसिफावलांनाय अखाफोरनि फिथिखा-हाजोआव-हायेनाव, दैमायाव-हाब्राडाव, बिफाडव-दालाइयाव, अखाडव-जोमैआव, गाथोनाव। थोर-थोर मावखाडे आं लोंथ्र' हायैआव।

-बिदि माब्लाबा मोनलों फेरबायमोन नों!

-गोदो एसे- सिथ्ला गेजेराव -थइला गिजि, दाह्रा गोबाय बनानै बिलिफां समाव आबै सल' खिन्थानाय समाव।

-बिदिनो गोदै-गोथाव मोन ना?

-इसिबांमानि मोदोमफ्रु नडमोन।

-माबोरै जानो! सोलेरनि खोरखि सौसि हायाब्ला बहा मोन्नो नों अखाफोरनि आबुं महर। बुं नों थांफिन बावगोन- सोलेरनिसिम?

अखाफोरनि लुफावनाय फिथिखानि फेनायजों थोथोर बोबोर, थथ्ला-थथ्लि, फुथिहां-फुथिआहां रावजों आं बुडे- ओहो!!!

-थांफिननानै मुलामफाबो गैया। जोनोमसेनि उद्राइख'हायै दायजों आबुं नोंनि सोलेराव एम्फौ मासे थामफै मासेआबो बानोखौ गिबाय। नोंनि थोरसि सेराव नोंनि जासिबोनाय ओंखाम-बेदर जानानै देरबोनाय सैमा बांग्रायाबो नोंनि सोलेरखौ इसिबो मोनाम सुवाखै। नोंनि ओंखार बोखानायनि उनाव नोंनि सोलेरा बादुंगानि अनगायै जेबोआनो नंलिआ। नोंनि नोमा-नोमफायाल' दुहुप-आलारि सावब्ला मा जानो? गोथारनि मोदोमफ्रु बारसे बिबाराबो माथो हनै नोंनि सोलेराव सिरिदेर फैया। नोंनि सोलेरा दा सह'नि अनगा जेबोआनो नंलिआ। गोसोमनि आन्दोजों आखाइ फोलावबोनाय नोंनि सोलेरा दा नेनानै दं मुथाम खावसे गुफुर सि, मुलुगनि लाजिनायनिफ्राय मोखां खाख्लुमनो! अब्लाबो गोसोथारब्ला नों थांफिननो हासिगौ। आं हेंथा होला!

-ओहो-ओहो!! आं गोबाखरब हरो दाउथुखौ आरो फेनायजों मोथो-मोथो लोथो उन्दुलाडे बिनिनो बिखायाव! □





सुंद' सल'

## साखिनाय

अमृत खेरकातारी

गोलोम बोथोरनि बाथ्रा। न' सिडाव थब्ला सिलिडाव हायना दोननाय सिलिं फेना खर' गिंनाय बादि थादनाय गैया जासे गिदिं नांगौ। आथिखालाव गेदेर गोलावफोरा ए.सि. जाग्रा हुदा जानायलाय गोलोम बोथोराव फेननि बारखौ नाड नाड मोनो।

हरखाबै दिनै आसामनि आबाद बिफाननि मन्थ्रिया दुबुलि नायनो फेना गोलोमनायजों जाबजों जिलानि आबाद बिफाननि मावखआव हाबफैयो। हाबफैनाय लोगो लोगो बयबो सिखारना खुलुमो आरो मासि गंसे हगारना सिलिं फेनखौ थ'ब गियाराव होयो। मावखगोरा हरखाब मन्थ्रिया हाबफैनायलाय मा मावगोन मा-दांगोन जादों। बे समावनो मन्थ्रिनि पि.ए.आ मावखगोरानि खोमा गुदियाव बुदों "नोंथाड सारनो लेबु बिदैनि दै गुसु अरदार हरदो, सारआ गोलोमसो गारदों दसे थाजिम मोननानि" बाथ्राखौ खोना खानाय लोगो लोगो मावखनि केरानिखौ लिंहरदों मावखगोरा नारजारिआ। बसुमथारि केरानियाबो नारजारि बाबुनि सेराव सिरियै बुडै" मा मोन सार? "मन्थ्रि सार फेदों, माबार लिबु बिदैनि सरबद लाबो" नारजारिया बुंबाय। मन्थ्रि ब्रह्मआ गरमा बारा मोनदों मानोना बांद्राय फेननि बार जानायनि हुदा गैया। फोथार दुबुलिफोराव थानायाथ' गोजाननि बाथ्रा नाथाय आबाद मन्थ्रि जानायलाय हरखाब दानदिसेनि थाखाय फेब्रबनो गोनों जादों गिबि मन्थ्रिनि हुखुम मोननानै।

बसुमथारि केरानिया मावखनि पियन बुदांखौ लिंहरना बुंबाय "बुदां, माबार थाना लेबु बिदैनि सरबथ गुसु लाबो, मन्थ्रि सारआ जिरायना दंगासिनो" बुदाडारो हुखुम मोननाय लोगो लोगो गलानिफ्राय लेबु थाइनै आरो फ्रिंसाव दोननाय दै लिटारसेखौ बाखियाव लाबोना जगार खालामनो हमो। दाखालि साह लौनायनि आद्रा थानाय सिनिखौ सरबथाव गलायदेरना मोजाडैआयनानि गिलासाव बसुमारि केरानिनो

होना बुडे। "माबोरै जाखोबा सार" बुदाड नाथाय गावहा सिगाडवनो साखिना मोजां मोनखादों।

बसुमथारिया इसे साखि नायना मोजां ना गाज्रि आनदास खालामना नारजारि बाबुनो हैबाय। नारजारि बाबुआ सरबथखौ मोजां जादोंना गाज्रि जादों सानना साखि नायनानै मोजां मोनना मन्थ्रिनि पि.ए.नो लासै थाना खोमा गुदियाव बुंबाय "बे सरबथखौ लोंबा सारआ थाजिम मोनथारगोन" पि.ए.आ सरबथनि गलासखौ लाना मोजां गाज्रि इसे साखि नायबाय। मोजां जानाय मोननायखाय मन्थ्रि ब्रह्मनो होबाय। "सार सरबथआ लादो...आरो माबाफोर नांवावगौ नामा?" पि.ए.आ बुंबाय।

मन्थ्रि बिथाड दै गुसु लिबु बिदैखौ सानदुं गोसानि गरमाव मोनलौना जोबोर गोजोननाय मानबाय आरो पि.ए.आ बुंबाय "सरबथआ जोबोर मोजां जादों, जाय बानायदों बेनो 500 रां बकसिस हो" पि.ए.आ मन्थ्रिनिफ्राय 100 रांनि नट गांवाखौ आखाइयाव लाना 400 रांल' नारजारिनो होना बुंबाय "सारआ मोजां मोनना बकसिस होदों सरबथ बानायग्रानो होबानो जाबाया" नारजारियाबो गोसोयाव सानबाय बिसोरनो मानो 400 रां होनो। नारजारिया केरानि बसुमथारिखौ लिंहरना 300 रां आखाइ होना मन्थ्रिया बकसिं होदों होनना जाराया सरबथ बानायदों बिनो होनो थिनबाय। बसुमथारि केरानियाबो सानबाय बुदांनो मानो 300 रां होलाय नांगौ। बसुमथारिया बुदांनो 200 रां आखाइयाव होना बुंबाय मन्थ्रि सारआ अनना बकसिस होदों। 200 रांखौ मोनना बुदाड जोबोर गोजोननाय मोनो। बिजि लावगिया दा अफिसनिफ्राय फेब्ला अमा बेदर लाबोफा होननायखौ गोसो खाना अमा बेदरनि रां मोनबाय सनना जोबोर गोजोनदों। दानदिसे जिरनायना गांनैसो फाइल नायना आबाद मन्थ्रिया गुदुंखौ सहायनो हायैनि गावनि एसि गारियाव गाखोना दिसपुर फारसे सिबला लांबाय। □



## बिजाब सावरायथाइ : समनि आइराखि

खगेन रामसियारि

नैजि जौथाइनि जोबथा जिथाइ आरो नैजिसे जौथाइनि गिबि जिथाइनि मादाव सोरजिजानाय 2013-14 मायथाइयाव बर' थुनलाइ आफादनि 'रांसार' बान्था आवथायनो हानाय बीरेन्द्र कुमार बसुमतारीनि सुंद' सल' बिजाब 'अन्थाइ मोदाइ'। फंसे रावआव बे बिजाबखौ 'समनि आइराखि' बिमुंजों सिनायथि होयोब्ला बुंद्रायनाय जानाय नड नामा!

'अन्थाइ मोदाइ'

लिरगिरि : बीरेन्द्र कुमार बसुमतारी

फोसावगिरि : निलीमा प्रकाशनी, बागानपारा, बागसा

दिहुनगिबि : जुलाइ, 2008

बेसेन : 40 रां

साफायसालि : बरमा अफसेट प्रिन्टर्स, बरमा कलेज र'ड, बागसा (बड'लेण्ड)

'बे 'अन्थाइ मोदाइ' सुंद' सल' बिजाबआ आंनि नैथि सल' बिजाब। बेयाव गासै 13 सुंद' सल' दं। अदेबानि बेयाव थानाय सल'फोरा गुबुन गुबुन लाइसि, सानमा लाइसिफोराव ओंखार खांबाय। बे गुबुन गुबुन लाइसिफोराव ओंखारनाय सल'फोरखौनो जथायनानै बिजाब महर होनाय जाबाय।' -लिरगिरि बीरेन्द्र कुमार बसुमतारीया गावनो रनसायनाय सुंद' सल' बिजाब 'अन्थाइ मोदाइ'नि बागै बिदि बुंदों। बिथाड आरोबाव बुंदों- 'सुंद' सल'आ गावहानो माखासे आखुथाइ दं। बे बिजाबाव थानाय सुंद' सल'फोरा बेफोर आखुथाइयाव गोलैदोंना गोलैयाखै मिथिया। नाथाय समाजनि माखासे जाथायफोरखौ नुनानै लिरा सानब्लाबो लिरा लासिनो थानो हाया। गोसोआ थिना। बेफोरखौनो खनसायनानै आं गावनि रावजों फोरमायनो साननानै लिरो आरो सानमा

लाइसिफोराव दैथाय हरो। दा बेफोरखौनो जथायनानै बिजाब महर होनाय जाबाय।'

'अन्थाइ मोदाइ' सुंद' सल' बिजाबाव थानाय मोन 13 सल'फोरा जाबाय- (1) सिरिनाय बिबार (2) अन्थाइ मोदाइ (3) आस 'खान्दा सिमां (4) हर गेजेरनि सिख्ला (5) बालें (6) मुलि रोदा (7) सबिता आरो आं (8) गोरोन्यिया सोरनि (9) गोमो खाथ'न्था (10) नों आंजों हाबा जानो? (11) नाजानायनि फिथाइ (12) गोरबनायनि देंखो आरो (13) नेनायनि जोबथा फिथाइ।

थुनलाइगिरि हिसाबै बीरेन्द्र कुमार बसुमतारीहा बां-मोखाडारि रोंगौथि आरो हारोंथा दंब्लाबो गुबैयै सुंद' सल' लिरगिरि महरैसो बिथाड मिथिजायो; सिनाय जायो। बिथांनि गिबि सुंद' सल' बिजाब 'जावलिया सिमां' (2001) आ नलबारी जिला बर' थुनलाइ आफादनि 'थुनलाइस्री बान्था' खौ 2003 मायथाइयाव मोननो हादों। बै समनिफ्रायनो बिथांखौ सुंद' सल' लिरगिरि महरै फरायग्राफोरा सिनायमोनो आरो गनायथि होयो। बिथांनि नैथि सुंद' सल' बिजाब 'अन्थाइ मोदाइ'आ 2013-14 मायथाइयाव बर' थुनलाइ आफादनि 'रांसार' बान्था आवथायनो हानाय खोथाखौ जानो हागौ बर' थुनलाइजों लोब्बा थानाय गोबां फरायग्रायानो मिथियो।

'अन्थाइ मोदाइ'नि लिरगिरि बसुमतारीया गावनो सन्देह खालामनाय बिथांनि सुंद' सल'फ्रा सुंद' सल'नि गोबां आखुथाइनि फारियाव गोलैदों ना गोलैयाखै बेखौ बिजिरसडेब्ला फंसे रावआव बुंनो हायो दि बिथांनि सल'फ्रा थारैनो सुंद' सल'नि गोजौ थाखोआव गोलैदों। थुनलाइगिरि बसुमतारीया 'समाजनि गोबां जाथाइखौ नुनानै लिरा सानब्लाबो लिरा लासिनो थानो हाया' होननानै

लिरनाय सल 'फ्रा गमामायैनो जॉनि नोजोराव (आंनि नोजोराव ?) जोबोद समायना, गोसो मुहिनो हानाय गोजौ मासिनि जादों। बिथानि सल 'फ्रा गोरलै, गेबें आरो सुड-लाउवा, सल 'नि रावआं गोदै-मिलौदो, लिरनाय आदबा (style) समायना, फावथाइयारि (dramatic) ! सल 'नि सोदोब बाहायनाय बिथिडव बिथाड जोबोद आखाइ हमथाग्रा (economic); बाथाफ्रा सुंथाब सुंथाब। सल 'फोरखौ खेबसे फरायनो लायोब्ला नागारनो गोसो जाया एबा नागारनो गोसोआ राजि जाया। जुदिअबा बिथानि सल 'फ्रा बांसिन बर्नायलु आखुनि (Narrative style) फोरमायनाय आदबा (approach) जुनिया आखुनि जानायनि थाखाय फरायग्रानि गोसोखौ बोगथाबना लानो हायो।

'अन्थाइ मोदाइ' बिजाबनि सल 'फोरनि सल 'बिथाया (plot) बांसिन गामियारि थासारिनि- गामि हालामनि आबहावा, बारहावा, मिथिंगायारि नुथाइ, सानफ्रोमबो अजायै जाफ्लेबाय थानाय जाथाइनि मिजिं सावगारि। सावरायनो लानाय बिजाबनि गिबि सुंद' सल ' 'सिरिनाय बिबार 'आवबो बर' गामियाव जाफ्लेबाय थानाय मोनसे न 'खरारि जाथाइनि सावगारि एरनाय नुनो मोनो। गेजेर फरायसालिनि फोरोंगिरि माजेन ब्रह्मआ अबथिरा बिसि गोमाजानायनि दुखुआव जौसाइ जानानै गावनि जिउखौ सिलिंखारनि लामाजों दैथायलानानै सासेल' फिसाजो रैमांस्त्रीखौ माबोरै अलखद बिथाथियाव खोख्लैदों, आरो बिसोरनि न 'आव भारा लानानै कलेजआव फरायना जोबथा आनजाद होखांना न 'आव थानो ओंखारनाय अरना माबोरै बिफा गोमाजानाय रैमांस्त्रीनि खाराव-माराव गाबनाय आरो मोजां मोननाय रावखौ नेवसिगारनो हायैनि गोबां साननिफ्रायनो गोसोजों गोसो मोजां मोननाय जोमैस्त्रीखौ नागारना रैमांस्त्रीनि न 'आव अराय साननि थाखाय थानो गोनां जाखो- बेखौ जोबोर गोसो बोनो हानाय आदब आरो रावजों लिरगिरि बसुमतारीया फोरमायदों। अरननि बागै रैमांस्त्रीनि मोजां मोननायखौ लंथं रावजों फोरमायाबालासिनो आबुथि गोनां राव आरो फावजों

फोरमायनाय बसुमतारीनि आदबा जोबोद समायफ्लेदों, बाख्यायथाव जादों।

नैथि सल ' आरो बे बिजाबनि खर' बिमुं 'अन्थाइ मोदाइ' सुंद' सल 'खौबो गामियारि जाथाइ आरो समाजारि मोनसे गोथे फोथाइथिखौ बिथा खालामना लिरनाय जादों। सरासनसा गामि ओन्सोलनि दाब दाब जायगायाव थानाय अन्थाइ मोदाइनि थानसालियाव (मन्दिर!) मागो दानाव होंगो-दोंगो मानसि थुबुर जानाय आरो मोदाइ खुलुमनायखौ लिरगिरिया जोबोर समायनायै आखिदों। गुबुनफोर बादि जारौ बिमानि खुथार खुथार बुंनयाव जारौ बिफा आरो लोगोआव बिमा सानैबो अन्थाइ मोदाइ खुलुमनो थानाय आरो गिदिंना फैनानै जारौआ गावनिनो टिउसन खालामग्रा फोरोंगिरिजों ब्लद खारखोमा लानाय जाथाइखौ फरायोब्ला गोसोआ मानोबा बागदाव खाडे। जारौनि H.S.L.C. आनजाद उथ्रिनाया बहा आरो गोरलै बैसोआवनो जुलि लाना बाला गुदुं गानाया बहा 'अन्थाइ मोदाइ' सल 'खौ फरायोब्ला गोसोआ गाव गावनो सोमखिखाडे दायआ सोरनि- जारौनि ना जारौ बिमानि ?

बाथि सल ' 'बालें'आव कार्बि आंलंनि बिनानाव बालेंनि महर मुस्त्रिखौ जोबोर समायनायै लिरगिरिया बर्नायदों। गोमो दखना गाननाय, बाथ 'गां गाबनि ब्लाउज गाननाय, मोदोमाव गुफुर आलन लानाय, सेरे-रे मोज्लाइ जान्जि, थाराइ-लाइ बादि लाउज्रिद मोखां, नारेंसु बादि गन्थं, मै हेलेंगिनि बादि फिसा फिसा मेगन, फामे देन्था बादि आसि, साद-दान्दालि खानाइ, फावदुर-दुर खावलाइ, पलिसजों आबिर गाफबनाय आसुगुर- बेसे समायनायै बर्नायदों सल 'नि गिबि सुबुंसाइनि आखु- लिरगिरिया बिनानाव बालेंनि महर मुस्त्रिखौ! लिरगिरिया होबोनाय 'जावलिया सिमां'खौ फारसे आखाइयाव आरो गुबुन फारसेयाव खेजुर आसारनि पेकेट लानानै बर' थुनलाइ आफादनि मावसुमा, कार्बि आंलंनि आलासि सिबिसुलि बालेंआ दिनैबो लिरगिरिखौ नेगासिनो दं (जानो हागौ!) ! बे सल 'नि बर्नायथि आरो फोरमायथिया बेसेबा समायना आरो गोजौ फारिनि !



सोलोंथाइनि गियान आरो फिथाइखौ मुलि रोदाजों रिजायनानै द'थि सुंद' सल' 'मुलि रोदा'खौ सल' लिरगिरि बसुमतारीया रनसायदों, उन्दैनिफ्रायनो गाव रुवाथि थाना देरबोनाय हामबुवा गावनि फिसाज्ला रनथेंखौ लावखार दोननो माहाजोनजों बन्द'बस्ट खालामाखिसै; मानोना बियो दा गावबा गाव आरो हारि माहारि जौगानायनि मुलि रोदाखौ सोलोंथाइयावनो नुनो मोनबाय ।

बर' माहारिनि गोबां दैदेनगिरिया 'खुगाजों बुडे फंसे, मावो गुबुन मोनसे' -आखुथाइजों गोमो खाथ'न्था जानाय नुथाइखौ गुथि सल' 'गोमो खाथ'न्था'जों बसुमतारीया जोबोद समायनायै बेरखांहोदों ।

बिदि नैजि जौथाइनि उन खोन्दोआव जौनि समाजाव जाउरिखांनाय गाज्रि थासारि, थामहिनबा थिउरिया हान्जानि उदखार, बुथारग्लुंनाय, सिगि-सग' आबहावाखौ

'आस'खान्दा सिमां', 'गोरोन्थिया सोरनि' आरो 'नेनायनि जोबथा फिथाइ' सुंद' सल'नि गेजेरजों सल' लिरगिरि बसुमतारीया जोबोद समायनायै आरो रोखायै फोरमायदों । 'हर गेजेरनि सिख्ला', 'सबिता आरो आं', 'नों आंजों हाबा जानो?', 'नाजानायनि फिथाइ' आरो 'गोरोबनाय देंखो'- बेफोर मोनफ्रोमबो सल'आव मोनफा मोनफा एखुथिया सानलाउरिखौ बिथा खालामनानै थुनलाइगिरि बीरेन्द्र कुमार बसुमतारीया जाथाइ-सावगारि एरदों । जौनि नोजोराव बेफोर सल'आ सुंद' सल' हिसाबै जाफुंसार जादों; फरायग्रा, फरायसंग्रा आरो थुनलाइ बिजिरसंग्राफोरनि गोसोखौ बोनो हादों । मिजिंथियो बिथां बसुमतारीनि सुंद' सल'फ्रा अराय जोरगोन, समनि आइराखि जागोन । □

(थुनलाइगिरि, सोलोंथाइगिरि, फावगिरि, गेलेगिरि बीरेन्द्र कुमार बसुमतारीया थांनाय 13.06.2016 इं खालाराव रुं सारि जालाडो ।)

बिफाडव गाखोनो दालाइ नांगौ, हारिखौ दैखांनो लेखा नांगौ ।

—मदाराम ब्रह्म



## बर' थुनलाइ आफादनि मावफारि

कमलाकान्त मोसाहारी  
गाहाइ नेहाथारि  
बर' थुनलाइ आफाद

बर' थुनलाइ आफादनि मावफारि होनना बुडेब्ला थांनाय एप्रिल, 2016 दाननिफ्राय जुलाइ, 2016 दानसिम हमना लानाय जादों। बर' थुनलाइ आफादनि हाबाफारि-मावफारि हिसाबै हमोब्ला आफादनि बायदि दाबि-दावाफोरखौ मावफुंनो नाजानाय, बायदिसिना मावख'वारि खामानिफोर, माखासे मावथांखिफोरखौ मावफुंनो नाजानाय, मेल-जथुम, मावसावरायमा खुंनाय आरिखौ हमना लानाय जादों।

बे लेखानो थांनाय 9 एप्रिल, 2016 खालरखालि फुंनि 11-00 रिंगायाव गुवाहाटी मुलुगसोलोंसालियाव गोदान न'ब्लां बेखेवनाय आरो थागिबि हारिनि राव आरो हारिमु सोलों मिरु बेखेवनाय हाबाफारियाव बर' थुनलाइ आफादनिफ्राय बाहागो लानाय जायो। बे हाबाफारियाव बाहागो लानाय समावनो आसामनि गेदेमा राज्योबेंगिरि मुस्त्री पि. बि., आचार्य आरो मुलुगसोलोंसालिनि मानिनां लेडइ गिसिया (भि.सि.) प्रफेसार मृदुल हाज'रिकाखौ लोगो हमना बर' बिफाननि बायदि जेंना आरो आंखालफोरखौ सुफुंनायनि सायाव सावरायनाय जायो। सावरायनाय समाव गेदेमा राज्योबेंगिरि आरो मुलुग सोलोंसालिनि गिसिया (सेन्सेलार) बिथाड गुवाहाटी मुलुगसोलोंसालिनि जेंनाखौ सुम्रानायनि रहा लानांगौ होनना लेडइ गिसिया बिथांनो सुबुरुन होयो। बे सावरायनाय समाव बर' थुनलाइ आफादनिफ्राय गुवाहाटी मुलुगसोलोंसालिनि बर' बिफाननि लोगो-बिबुंगोरा आरो लेडइ बिबुंगोरानि लांदां मासियाव बिबुंगोरा थिस'ननाय

आरो आरो बर' बिफाननि न'मानि सोरगिदिं पाक्कानि इन्जुर होनाय आरो दरखं होनाय आरो नांगौ रोखोमनि बिजाब बाखिनि बिजाब बायनाय आयदाखौ सावरायनाय जायो। सावरायनाय समाव मानिनां लेडइ गिसिया बिथाड थाबैनो बर' थुनलाइ आफादजों सावरायना राहा लानाय जागोन होनना खोथा होयो। बे हाबाफारि आरो सावरायनायाव बाहागो लादोंमोन बर' थुनलाइ आफादनि लेडइ आफादगिरि मुस्त्री बिश्वेश्वर बसुमतारी आरो गाहाइ नेहाथारि मुस्त्री कमला कान्त मोसाहारिया।

बै सान खालिनो बेलासि 3-30 रिंगायाव आजारा-पाटगावआव थानाय कृष्णकान्त सन्दिक्कै हादरसायारि उदां मुलुगसोलोंसालिनि रेबथुमग्रा ड० रजत बरन महन्त बिथांखौ गावनि मावख' ख'थायाव लोगो हमना डि. एल. एड. बिमुंलाइ फरायफारिनि बिजाब आरो गुबुन गुबुन फराय आगजुनि बागै सावरायनाय जायो। सावरायनाय समाव मानिनां रेबथुमग्रा बिथाड थाबैनो फरायफारिनि बिजाबफोरखौ बर' रावआव दानस्लायनाय राह लानाय जागोन आरो बे खामानियाव बर' थुनलाइ आफादनि मदद आरो हेफाजाब नांगोन होनना फोरमायो। लोगोसे फराय बिजाब ओंखाराब्लाबो बर' बिजोंनि बिजाथिफोरा बर' रावजों लिरनो हानायनि थाखाय गासैबो मिरुसिम बिथोन हरनाय जागोन होनना फोरमायो। लोगोसे फैगौ 2017 मायथाइयाव बर' बिफाननि एस. ए. फरायफारि थिस'ननो थाखायबो लाहार-फाहार खालामगासिनो दं होनना मिथि होयो। बे सावरायनायावबो



बर' थुनलाइ आफादनि लेडइ आफादगिरि मुझी बिश्वेश्वर बसुमतारी आरो गाहाइ नेहाथारि मुझी कमलाकान्त मोसाहारिया बाहागो लायो।

बेनि उनाव थांनाय 18 एप्रिल, 2016 खालारखालि बाकसा जिलानि गरेश्वर जौसिन फरायसालिनि गेलेग्रा फोथाराव दुलाराय आसाम शरनीया कसारी फरायसा आफादआ खुंनाय बाह पुजा (औवा फुजिनाय) हाबाफारिनि मोनसे सावरायमा मेलाव गाहाइ नेहाथारिया बाहागो लानानै शरनीया कसारी हारिसाया दि बर' हारिनि मोनसे दालाइ हारि आरो बर' हारिजों गोरोबलायनाय खामानि मावनो थाखाय खावलायनाय जायो। बि.टि.ए.डि. हालामाव आथिखालव नुजानाय बर'-अबर'नि जा मोनसे थासारि सोमजिदों- बेयाव जाहाथे शरनीया कसारी हारिसाया गावखौनो अबर' होनना सानना लाया बेनि थाखाय गाहाइ नेहाथारिया खावलायो। आथिखालाव गोबां बर' सुबुंफोरा गुबुन राव-हारिमुखौ बज'बना लानो गोनां जादोंमोन। गावनि आंगो दोहोरोम बाथौ दोहोरोमखौबो गारना गुबुन खृष्टान, जयगुरु, कृष्ण गुरु, शंकरी, ब्रह्म दोहोरोम लानो गोनां जादों। थेवबो जों मोनसे फोलेरनिनो बर' हारि हिसाबै सिनायथि होबोदों होनना बिबुंधियाव मख'यो गाहाइ नेहाथारि मुझी कमलाकान्त मोसाहारिया।

थांनाय, 24 एप्रिल, 2016 खालारखालि आफादनि गाहाइ मावख' रुपनाथ ब्रह्म न'मायाव बर' थुनलाइ आफादनि मिरु बिबानगिरि आफादनि मोनसे मेल खुंनानै आफादनि मावफारि-हाबाफारिफोरखौ थियारि खालामनाय जायो। लोगोसे आसाम आरो बड'लेण्ड हालामनि बायदि थासारिनि सायाव सावरायनाय जायो। सावरायनायनि गेजेरजों आथिखालाव बड'लेण्ड हालामाव जेहादी-मौलबादी- जे. एम. बि. उदखारिफोर हाबस'नफैनाय आरो फिन हारियारि दांगाबाजि सोमजि होनो नाजानायखौ गोख्रोंयै सोंखारिनाय जायो आरो थाबैनो भारतनि गाहाइ मन्थ्रि आरो न'खर मन्थ्रिनो गोख्रों राहा लानो थाखाय दाबि खालामना गोसोखां बिलाइ दैथाय हरनो थांखि लानाय जायो।

बेनि उनाव थांनाय 25 एप्रिल, 2016 खालारखालि साननि 12-30 रिंगायाव ककराझारआव आफादनि गाहाइ मावख' आर. एन. ब्रह्म नमायाव मोनसे खौरांगिरिनि मेल खुंनानै आसाम आरो बड'लेण्ड हालामनि आयेन आरो आबुथिनि सायाव सोंखारिनाय जायो। लोगोसे बर' थुनलाइ आफादनि बायदि मावफारि आरो हाबाफारिफोरखौ फोसावनाय जायो।

बै सानखालिनो आसाम आरो बड'लेण्ड हालामाव बांलोदशी जेहादी-मौलबादी आरो जे. एम. बि. आ गोख्रोंयै साग्लोबफैनो नाजनायनि बेरेखायै गोख्रों राहा लानो दाबि खालामना भारतनि न'खर मन्थ्रि मुझी राजनाथ सिं बिथांनो गांसे गोसोखां बिलाइ इ-मेइलनि गेजेरजों दैथाय हरनाय जायो।

बै सानखालिनो मोनाबिलि 6-30 रिंगायाव गुवाहाटी-खानापारायाव थानाय बड'लेण्ड आलासि जिरायसालियाव बि.टि.सि.नि गाहाइ मानिनां मुझी हाग्रामा महिलारी आरो बर' थुनलाइ आफादनि मिरु बिबानगिरि आफादनि गेजेराव आफादनि बायदि जेंना आरो दाबि-दावाफोरखौ मावफुंनयनि सायाव सावरायनाय जायो। सावरायनाय समाव बर' थुनलाइ आफादनिफ्राय थांनाय 15 (जिबा) बोसोर मुझी तरुण गगै दैदेननाय आसाम सरकारआ मोनसेबो मावफुंलाडि दाबिफोरखौ गोदान सरकार फैब्ला मा रोखोमै मावफुंनय जागोन आरो आथिखाल बर' थुनलाइ आफादनि दुखुनांथाव रांखाउरि हालोदनि सायाव सावरायनाय जायो। सावरायनाय समाव बर' थुनलाइ आफादनिफ्राय थांनाय 15 (जिबा) बोसोरआव कंग्रेस सरकारनि आमोलाव मोनसेबो आफादनि गोनां गोनां दाबिफोरखौ सुफुंनय जायाखैसै। आसाम सरकारआ बोसोरफ्रोमबो होबोबाय थानाय बोसोरारि राडारि अनसुंथाइखौबो दाननानै होबाय। देग्लाय बोसोराव गरसेबो रां आसाम सरकारआ दिहुनना हराखैसै। जायनि थाखाय बर' थुनलाइ आफादआ 14 (जिब्रै) लाखनिबो बांसिन रां दाहार जानानै दं। बेखायनो बि.टि.सि. सरकारआ गोदान सरकार फैयोब्ला बर' थुनलाइ आफादनि दाबि-



दावाफोरखौ मावफुंनो राहा लानांगोन आरो राडारि अनसुंथाइ होना नै मदद खालामनांगोन होनना बि.टि.सि. गाहाइ बिथांखौ खावलायनाय जायो। सावरायनाय समाव बि.टि.सि. गाहाइ बिथाड बर' थुनलाइ आफादनि गोनां गोनां दाबिफोरखौ आसामाव गोदान बि.जे.पि. दैदेननाय सरकार फैयोब्ला फारियै मावफुंनो थाखाय नारसिननाय जागोन आरो बि.टि.सि. सरकारनिफ्राय राडारि अनसुंथाइखौ बांहोनाय जागोन होनना खोथा होयो। लोगोसे थाबै नो बर' थुनलाइ आफादनि रां दाहारखौ सुख'नायनि राहा खालामनाय जागोन होनना फोरमायो। सावरायनाय समाव बि.टि.सि.नि गाहाइजों लोगोसे राज्यो सभानि एम. पि. मुस्त्री बिश्वजित दैमारी, एम. एल. ए. मुस्त्री चन्दन ब्रह्म, बारग' एम. एल. ए. मुस्त्री थानेश्वर बसुमतारी, एम. एल. ए. मुस्त्री मेनश्वर ब्रह्म बिथांमोनआ बाहागो लादोंमोन। बर' थुनलाइ आफादनिफ्राय आफादगिरि ड० कामेश्वर ब्रह्म, लेडइ आफादगिरि सानै मुस्त्री दिपक कुमार बसुमतारी, मुस्त्री बिश्वेश्वर बसुमतारी, गाहाइ नेहाथारि मुस्त्री कमलाकान्त मोसाहारि, नेहाथारिमोन मुस्त्री राजेन्द्रनाथ ब्रह्म, मुस्त्री प्रसान्त बर', रांगिरि मुस्त्री काबाराम स्वर्गीयारी बिथांमोनआ।

थानाय 27 एप्रिल, 2016 खालारखालि बेलासि 2-00 रिंगायाव बर' थुनलाइ आफादनि साब्रै मिरु बिबानगिरिफोरआ गुवाहाटी बामुनीमैदामआव थानाय आसाम जौसिन फरायसालि सोलौंथाइ गुथुमनि मासिगिरि म० नबाब मामुद हुसेइनखौ लोगो हमनानै जौसिन फरायसालियाव बर' बिजों थिसननायनि थाखाय फरायबिजाब राव दानस्लायनाय आरो नांगौ रोखोमनि गनायथिनि थाखाय सावरायनाय जायो। सावरायनाय समाव मासिगिरिया फैगौ गोदान आसाम सरकारआ बिबान लानायनि दानसेनि गेजेराव आसाम सरकारनो नांगौ रोखोमनि गनायथिनि थाखाय थांखि हरनाय जागोन। लोगोसे गोदान सरकारआ बिबान लायोब्ला थामख'नायारि सावरायनाय राहा खालामनो थांखि हरनाय जागोन होनना फोरमायो। बे सावरायनायाव आसाम सरकारजों लोगोसे

बि.टि.सि. खुंथाइनि सोलौंथाइ बिफानखौबो लाफानाय जागोन होनना फोरमायो। सावरायनायाव जौसिन फरायसालि सोलौंथाइ गुथुमनि मासिगिरिजों लोगोसे नेहाथारि, मुस्त्री सन'मनि दास, लेडइ नेहाथारिफोर ड० धरनीधर ग'सवामी, मुस्त्री ज्यती कलिता आरो सोलौंथाइ नेहाथारि, मुस्त्रीमा अनुरुपा चौधुरी आरो बर' थुनलाइ आफादनि लेडइ आफादगिरि मुस्त्री बिश्वेश्वर बसुमतारि, मुस्त्री दिपक कुमार बसुमतारि, गाहाइ नेहाथारि, मुस्त्री कमलाकान्त मोसाहारि, रांगिरि मुस्त्री काबाराम स्वर्गीयारीया बाहागो लादोंमोन।

थानाय 28 एप्रिल, 2016 खालारखालि बर' थुनलाइ आफादनि मिरु बिबानगिरिफोरआ अदालगुरियाव थानाय आफादनि नेहाथारि मुस्त्री निलकान्त ग'यारीनि न'खरआव थानानै बिथांनि बेराम नायजानायनि बागै खौरां लाहैनाय जायो। बे खौरां लाहैनाय हाबाफारियाव बर' थुनलाइ आफादनिफ्राय मुस्त्री कमलाकान्त मोसाहारि, गाहाइ नेहाथारि, मुस्त्री प्रसान्त बर', नेहाथारि, मुस्त्री काबाराम स्वर्गीयारी, रांगिरि बिथांमोनआ नुजाहैदोंमोन।

थानाय 30 एप्रिल, 2016 खालारखालि फुंनि 10-30 रिंगायाव डिब्रुगड मुलुगसोलौंसालिनि लेडइ रेबथुमग्रा ड० परमानन्द स'न'वालजों मुलुगसोलौंसालियाव बर' बिफाननि आलादा न'मा लुफुंनाय आरो आलादा हानि राहा खालमनायनि सायाव सावरायनाय जायो। सावरायनाय समाव लेडइ रेबथुमग्रा बिथांआ बि.टि.सि. सरकारा आलादा हानि थाखाय लाइजाम हरोब्ला रायज्जलायनायनि गेजेरजों आलादा हानि राहा खालामनाय जागोन होनना फोरमायो। सावरायनाय समाव गाहाइ नेहाथारिजों लोगोसे डिब्रुगड जिला बर' थुनलाइ आफादनि लेडइ आफादगिरि मुस्त्री करुणाकान्त बर'आबो बाहागो लादोंमोन।

बेनि उनाव बेलासि 7-30 रिंगायाव डिब्रुगड जिला बर' थुनलाइ आफाद, नामरुप कसारि पथार दालाइ बर' थुनलाइ आफादनि मावख'आव डिब्रुगड जिला बर' थुनलाइ आफादनि बिबानगिरिफोरजों डिब्रुगड जिलानि सिडव बर' राव सोलौं मिरु गायसंनायनि सायाव सावरायनाय



जायो। सावरायनाय समाव बर' थुनलाइ आफादनि गाहाइ नेहाथारिया बाहागो लायो आरो सावरायनायाव डिब्रुगड जिला बर' थुनलाइ आफादनि आफादगिरि मुस्री बिनन्दी बर', लेडइ आफादगिरि मुस्री करुणा कान्त बर', नेहाथारि मुस्री सुसेन मेसआ बाहागो लायो।

थांनाय 6 मे 2016 खालारखालि कृष्णकान्त सन्दिक्कै उदां मुलुगसोलोंसालिनि लेडइ गिसिया (Vice Chancellor) प्रफेसर हितेश डेका बिथांजों बर' थुनलाइ आफादनि मानगोनां आफादगिरि पद्मश्री ड० कामेश्वर ब्रह्मनि दैदेननायाव सा 7 मिरु बिबानगिरिफोरआ मुलुगसोलोंसालियाव बर' बिफाननि एम.ए. फरायफारि थिस'ननाय आरो आथिखाल गुदि सोलोंथाइनि डि.एल.एड.नि आनजादआव बर' रावयै सौनाय लिरनो हौनोय फिननाय आरो फरायफारिजों लोब्बा थानाय फराय बिजाब सुजुनायनि सायाव सावरायनाय जायो।

सावरायनाय समाव मानिनां लेडइ गिसिया प्रफेसर ड० हितेश डेका बिथाडा आथिखालाव मुलुगसोलोंसालिनिफ्राय बर' आयदानि एम.ए. फरायफारि थिसननायनि थाखाय लाहार-फाहार खालामनाय जादों। नाथाय बेनि थाखाय नांगौ जानाय फरायफारि थियारि खालामनायाव एसे समनि गोनां जायो। बेखायनो 2016 मायथाइनि सोलोंथाइ बोसोराव बे फरायफारिजों लोगोसे फरायबिजाबखौ थियारि खालामनो हास्लाबनाय नड होनना मानिनां भि.सि. बिथाडा फोरमायो। बेखायनो फैगौ 2017 मायथाइनि सोलोंथाइ बोसोरनिफ्राय बर' बिफाननि एम.ए. फरायफारि थिसननाय जागोन होनना मुलुग सोलोंसालिनि लेडइ गिसिया बिथाडा फोरमायो।

लोगोसे फरायफारि थियारि खालामनाय आरो फराय बिजाब सुजुनाय खामानियाव बर' थुनलाइ आफादआ मदद आरो हेफाजाब खालामनो आरो रोंग'सा सायख'ना हरनो थांखि लानाय जायो। लोगोसे फैगौ थाम दाननि गेजेराव बर' बिफाननि सासे सोलोंथाइयारि लोब्बागिरि Academic Co-ordinator थिस'ननाय जागोन होनना फोरमायो। सावरायनायनि गेजेरजों आथिखालाव

मुलुगसोलोंसालिनि सिडव डि.एल. एड. नि गोदान फरायफारि बादियै दासिम फरायबिजाब सुजुनाय आरो राव दानस्लायनाय खामानिखौ मावफुंनो हायाखै। बेखायनो बर' रावयै फोरोंनायाव एसे हेंथा सोमजिदों। थेवबो बर' बिजोंनि फोरोंगिरिफोरा बर' रावयै सौनायनि फिननाय लिरनो हागोन आरो न'आव मावनो होखानाय बिबान (Home Assignment) खौबो बर' रावयैनो लिरनो हागोन होनना थांनाय 9 एप्रिल, 2016 खालाराव फोसावथाइ होखानाय जाबाय होनना मिथिहोयो। दा गोदान फरायफारि बादियै फरायबिजाब सुजुनाय आरो राव दानस्लायनाय खामानिनि थाखाय रोंग'सा सायख'ना हरनो थाखाय बर' थुनलाइ आफादनो बिबान होना थांखि लानाय जायो। बे खामानिखौ थाबै मावफुंनो थाखाय मुलुगसोलोंसालिनि गोरायुं- लोब्बागिरि आरो बर' थुनलाइ आफादनि बिबानगिरिफोरनो बिबान होनाय जायो। बे सावरायनायाव बर' थुनलाइ आफादनि आफादगिरि पद्मश्री बान्था मोनगिरि ड० कामेश्वर ब्रह्म, लेडइ आफादगिरि मुस्री बिश्वेश्वर बसुमतारी, मुस्री दिपक कुमार बसुमतारी, गाहाइ नेहाथारि मुस्री कमलाकान्त मोसाहारि, नेहाथारि मुस्री राजेन्द्र नाथ ब्रह्म, मुस्री प्रसान्त बर' आरो रांगिरि मुस्री काबाराम स्वर्गीयारीया बाहागो लायो।

थांनाय 9 मे, 2016 खालारखालि बेलासि 3-00 रिंगायाव दिसपुरआव थानया आसम हाउसिं बर्डआव थानाय कृष्ण कान्त सन्दिक्कै हादरसायारि उदां मुलुगसोलोंसालिनि मावख'आव थांनाय मुलुगसोलोंसालिनि प्रिन्सिपाल -क'-अरडिनेटर प्रफेसर ए. डेका बिथांजों डि.एल.एड.नि फरायबिजाब राव दानस्लायनायनि सायाव सावरायनाय जायो। सावरायनाय समाव प्रफेसर डेका बिथाडा डि.एल.ए.नि फरायबिजाबखौ बर' रावआव दानस्लायनो थाखाय गुबै इंराजी आरो असमीया बिजाबखौ बर' थुनलाइ आफादनो गथायना होयो।

बै सानखालिनो बेलासि 4-30 रिंगायाव आथिखाल सोलिबाय थानाय एन.आर.सि.फोजौखानाय हाबाफारियाव बर' रावनि थख'लाइफोरखौ कम्पिउटाराव



सोसननायनि थाखाय बर' रावनि कम्पिउटार सालायनो गोरों बिजाथिनि थाखाय उइप्र'नि सामलायगिरि मुझी तापस बेनार्जीजों सावरायनाय जायो। सावरायनाय समाव सामलायगिरि मुझी बेनार्जी' बिथाडा बर' रावनि एन.आर.सि. थख'लाइफोरखौ कम्पिउटारआव सोस'ननो थाखाय खमैबो बर' गोरों सा 50 सो बिजाथिनि गौनां जादों। बेखौ बर' थुनलाइ आफादआ बिबान लाना बिजाथिफोरखौ बुथुमना होनो खावलायो। सावरायनाय समाव गाहाइ नेहाथारिया बाहागो लानानै हानायमानि कम्पिउटार मावदांसांनि थाखाय जिला आफादफोर आरो दुलाराय बर' फरायसा आफादनिमिम बुंहरनाय जागोन होनना फोरमायो।

थानाय 16 मे, 2016 खालारखालि बेलासि 4-30 रिगायाव गुवाहाटी- गीतानगरआव थानाय एन.आर.सि.नि खारि सोस'नग्रा मिरु (NRC DATA CENTRE) आव थानानै मिरुनि लोगो सामलायगिरिफोरजों खारि एबा डाटा सोस'ननायनि बागै सावरायनाय जायो। सावरायनाय समाव बर' थुनलाइ आफादनि गाहाइ नेहाथारिया एन.आर.सि.नि बर' थख'लाइफोरखौ सोस'ननायनि सायाव फोरमायो दि, आथिखालव सा 18 सो कम्पिउटार लोगो बिजाथिफोरा खामानि मावनो मुं थिस'नदों। बेखायनो बिसोरखौ थाबैनो फोरोंथाइ होनायनि राहा लानो थाखाय मिरुनि लोगो सामलायगिरिखौ खावलायो। लोगो सामलायगिरि बिथाडा थाबैनो बिजाथिफोरखौ फोरोंथाइ होनाय जागोन होनना फोरमायो।

थानाय 17 मे, 2016 खालारखालि बेलासि 2-00 रिगायाव नलबारी जिलानि धमधमा-महिना गामियाव गावनि न'आव गोब्राब बेरामाव गोलैना थानाय मुंदांखा लिरगिरि बर' थुनलाइ आफादनि रांसार थुनलाइ बान्था मोनगिरि, गोदान दिल्लीनि मिरु हिन्दी बिथोनसालि(सि.एइस.डि.) नि बां रावारि सोदोब बिहुंनि सासे सुजुगिरि आरो नलबारी जिला बर' थुनलाइ आफादनि बारग' नेहाथारि मुझी बिरेन्द्र बसुमतारी बिथांआ गोब्राब बेरामाव गोलैना थानाय खौरांखौ मोननाय लोगो

लोगोनो बर' थुनलाइ आफादनिफ्राय सानै मिरु बिबानगिरिफोरा थानानै बिथांनि देहानि खौरां लाहैनाय जायो। बे हाबाफारियाव बाहागो लादोंमोन मिरु बर' थुनलाइ आफादनि गाहाइ नेहाथारि मुझी कमला कान्त मोसाहारि, रांगिरि मुझी काबाराम स्वर्गीयारी, नलबारी जिला बर' थुनलाइ आफादनि नेहाथारि मुझी धनेश्वर खाखलारी आरो बारग' आफादगिरि मुझी खगेन्द कुमार रामसियारि बिथांमोनआ।

थानाय 18 मे, 2016 खालारखालि 54 थि बर' थुनलाइ आफादनि "बर' बिजों सान"खौ आफादनि गाहाइ मावख' रुपनाथ ब्रह्म न'मानि दरखंआव फिरफिला दैखांन फालिनाय जायो। बे हाबफारियाव बर' थुनलाइ आफादनि फिरफिलाखौ बिरहोयो आफादनि लेझइ आफादगिरि मुझी बिश्वेश्वर बसुमतारीया आरो बाहागो लायो गाहाइ नेहाथारि मुझी कमलाकान्त मोसाहारि, नेहाथारि मुझी राजेन्द्र नाथ ब्रह्म, रांगिरि मुझी काबाराम स्वर्गीयारी, बारग' रांगिरि मुझी महिलाल बसुमतारी बिथांमोनआ।

थानाय 19 मे, 2016 खालारखालि सान खावसेनि हाबाफारिजों "बर' बिजोंनि फाइखि" उदांसि दावहारु, बर' थुनलाइ आफादनि गायसनगिरि जुथाइ नेहाथारि आरो बारग' आफादगिरि रंसारि जगेन्द्र कुमार बसुमतारीनि 96 थि जोनोम सानखौ जगेन्द्र कुमार बसुमतारी फोथायफुनजि आफाद आरो मिरु बर' थुनलाइ आफादआ सिरां जिला बर' थुनलाइ आफादनि बानजायनायाव बासुगावआव खुंनाय जायो। बे हाबाफारि लेखा फुंनि 9-00 रिगायाव बर' थुनलाइ आफादनि फिरफिलाखौ बिरहोयो आफादनि आफादगिरि पद्मश्री बान्था मोनगिरि ड० कामेश्वर ब्रह्म बिथांआ। बेनि उनाव 9-30 रिगायाव रंसारिनि मुसुखायाव बिबार बाउनाय आरो आलारि सावनाय हाबाफारियाव बिबार बाउजेनना आरो आलारि सावना बेखेवो रंसारिनि अनजाली बिसि मानिनां मुझीमा रेणु बसुमतारी बिथाडा। बेनि उनाव बेयाव बाहागो लाफैनाय साफ्रोमबो बिबार बाउनानानै रंसारिनिमिम मान बाउहरो। बेनि उनाव फुंनि 11-00 रिगानिफ्राय" बर' बिजोंनि



फाइखि ज'गेन्द्र कुमार बसुमतारी फोथायफुनजि आफादनि मावफारि" आयदानि सायाव मोनसे सावरायमेल खुंनाय जायो। सावराय मेलाव आफादगिरिनि मासि लायो बर' थुनलाइ आफादनि आफादगिरि पद्मश्री बान्था मोनगिरि ड० कामेश्वर ब्रह्म बिथांआ। सावराय मेलाव सावरायगिरि महरै बाहागो लानानै बिबुंथि लाखियो ज'गेन्द्र कुमार बसुमतारी फोथाय फुनजि आफादनि मासिगिरि बारग' बि.टि.सि.नि मावफुं सोद्रोमा मुस्त्री देरहासाद बसुमतारीया। बिथांआ गावनि बिबुंथियाव मा रोखोमै रंसारि बर' बिजोनि फाइखि ज'गेन्द्र कुमार बसुमतारीनि मुंखौ गोजोर खालामना लाखिनो हायो बेनि थाखाय फोथायफुनजि आफादआ हाबाफारि ज'थायगोन होनना फोरमायो। बेनि उनाव सावराय मेलाव बाहागो लानानै आसाम सरकारनि हायेनारि जनजाति आरो उन गोग्लैसोनाय हरि जौगाथाइ बिफाननि आजिरा मोननाय कमिस'नार-नेहाथारि मुस्त्री जितेन बरग'यारी बिथांडाबो रंसारि ज'गेन्द्र कुमार बसुमतारीनि न'खरनि असे फोलेरनि हिसाबै रंसारिनि मुंखौ अराय जुगामि खालामना लाखिनो थाखाय मोनसे बान्था फोसावनो साननाय बाथ्राखौ फोरमायो। बिथांडा बर' थुनलाइ आफाद आरो फोथाय फुनजि आफादआ रंसारिनि मुडव मा रोखोमनि बान्था फोसावो बेखौ नोजोर होनानै न'खरनि बायबाहागि आरो फोलेरनि सुबुंफोरआ जु'थाइयै राडारि मदद खालमनाय जागोन होनना फोरमायो। सावराय मेलाव ककराझार जिला बर' थुनलाइ आफादनि आफादगिरि मुस्त्री धजेन्द्र नाथ ब्रह्म, सिरां जिला बर' थुनलाइ आफादनि आफादगिरि मुस्त्री प्रानेश्वर बसुमतारीयाबो बिबुंथि लाखियो। सावराय मेलनि जोबनायाव आफादनि गाहाइ नेहाथारि मुस्त्री कमलाकान्त मोसाहारिया साबायखर बाउवो।

थानाय 22 मे, 2016 खालारखालि फुनि 11-00 रिंगायाव सालबारी जिला बर' थुनलाइ आफादनि हांखायनायाव आरो सापागुरि-ककलाबारी गुदि बर' थुनलाइ आफादनि बानजायनायाव खुंनो गोनां "बर' लिरगिरि फोरबो खुंनायनि थाखाय बानजाय आफाद

दानायनि मेलाव मिरु बर' थुनलाइ आफाद"निफ्राय सानै मिरु बिबानगिरिया बाहागो लाहैयो। 18 आरो 19 जुन, 2016 खालारआव साननैनि हाबाफारिजो साहित्य अकादेमी आरो बर' थुनलाइ आफादा जुथाइयै खुंनो गोनां बर' लिरगिरि फोर्बो ( Bodo Writers Festival) आरो बर' बिजाब दिन्थिफुं मेला खुंनायनि थाखाय सालबारि जिला बर' थुनलाइ आफादनि बानजायनायाव मोनसे बानजाय आफाद दानो थाखाय आलांगा मेल खुंनाय जायो। सालबारि जिला बर' थुनलाइ आफादनि आफादगिरि मुस्त्री सिताराम बसुमतारीनि आफादगिरि मासि लानानै खुंनाय बे आलांगा मेलाव मिरु बर' थुनलाइ आफादनिफ्राय लेडाइ आफादगिरि मुस्त्री दिपक कुमार बसुमतारी, गाहाइ नेहाथारि मुस्त्री कमलाकान्त मोसाहारि आरो रांगिरि मुस्त्री काबाराम सर्गीयारीया बाहागो लायो।

बे आलांगा मेलावनो बर' थुनलाइ आफादनि बारग' नेहाथारि मुस्त्री ग'बिन्द नार्जारीखौ आफादगिरि, मुस्त्री भवानन्द बसुमतारीखौ लेडाइ आफादगिरि, मुस्त्री दि. लाइमोन गयारीखौ हांखायगिरि, मुस्त्री चन्द्र कान्त बसुमतारी, मुस्त्री बिक्रम बसुमतारीखौ लेडाइ हांखायगिरि आरो मुस्त्री चन्द्र कान्त सर्गीयारीखौ रांगिरि महरै लानानै मोनसे गोख्रों बानजाय आफाद दानाय जायो। साननैनि हाबाफारिजो खुंनो गोनां बे बर' लिरगिरि फोर्बोआव सा 300 लिरगिरिफोर आरो सा 22 बाहागो लोगिरि फुंखा सुबुंफोरखौ हांखायहरनायजो लोगोसे गोदान गोजाम लिरगिरिफोरनि सोरजिनाय आरो सुजुनाय बिजाब-लाइसिफोरखौ दिन्थिफुंनायनि थाखाय लानाय जायो।

थानाय 23 मे, 2016 खालारखालि साननि 1-00 रिंगायाव बर' थुनलाइ आफादनि दालाइ मावख' जे. बि. हागजेर न'मायाव आसामनि थागिबि जनजाति साहित्य सभानि जु'थाइ मेलाव बर' थुनलाइ आफादनिफ्राय लेडाइ आफादगिरि मुस्त्री विश्वेश्वर बसुमतारी, गाहाइ नेहाथारि मुस्त्री कमलाकान्त मोसाहारि आरो रांगिरि मुस्त्री काबाराम स्वर्गीयारी बिथांमोनआ बाहागो लायो। बे जु थाइ मेलनि गेजेरजो आसामनि गोदानै सायख'जानाय गिबि मन्थि

मुस्त्री सर्बानन्द स'न'वालखौ बरायनाय आरो 24 मे, 2016 खालारखालि जानो गोनां समायखिरा लानाय हाबाफारियाव बाहागो लानो थांखि लानाय जायो ।

थांनाय 24 मे, 2016 खालारखालि साननि 12-00 रिंगायाव मानिनां मुस्त्री सर्बानन्द स'न'वाल बिथांआ आसामनि गिबि मन्थ्रि महरै समायखिरा लानाय हाबाफारियाव बर' थुनलाइ आफादनिफ्राय लेडाइ आफादगिरि मुस्त्री बिश्वेश्वर बसुमतारी, गाहाइ नेहाथारि मुस्त्री कमलाकान्त मोसाहारि, रांगिरि मुस्त्री काबाराम स्वर्गीयारी, आरो बाथौफुरि हारिमुवारी मावथांखिसालिनि मासिगिरि मुस्त्री जितेन बरग'यारी बिथांमोनआ बाहागो लादोमोन । थांनाय 25 मे, 2016 खालारखालि बेलसि 4-00 रिंगायाव गुवाहाटी गीतानगरआव थानाय एन. आर.सि. मिरुआव थांनानै बर' रावनि थख'लाइ (Rorm) फोरखौ कम्पिउटारआव सोस'ननाय मावफारिनि सायाव लेडाइ सामलायगिरिजो सावरायनाय जायो । सावरायनायनि गेजेरजो थाबैनो कम्पिउटारआव बर' रावनि एन.आर.सि.नि थख'लाइफोरखौ सोस'ननायनि खामानिखौ थाबैनो जागायनो थाखाय खावलायनाय जायो । सावरायनाय समाव लोगो सामलायगिरि बिथांआ थाबैनो बिजाथिफोरखौ फोरोंथाइ होनाय जागोन आरो फोरोंथाइनि समाव बिजाथिफोरनो सानसेआव 200 (नैजौ) रां होनाय जागोन होनना फोरमायो ।

थांनाय 26 मे, 2016 खालारखालि आसामनि गोदानै सायख'जानाय गिबि मन्थ्रि मानिनां मुस्त्री सर्बानन्द स'न'वालनि सरकारी थाग्रा न' ब्रह्मपुत्र आलासि जिरायसालि, उजानबाजार, गुवाहाटीयाव थांनानै आसामनि थागिबि जनजाति साहित्य सभानिफ्राय बराय बिलाइ गथाय हैनाय हाबाफारियाव बर' थुनलाइ आफादनिफ्राय गाहाइ नेहाथारि मुस्त्री कमलाकान्त मोसाहारिया बाहागो लादोमोन ।

थांनाय 28 आरो 29 मे, 2016 खालारआव बर' थुनलाइ आफादनि जौसिन फरायसालि (HSS) बर' बिजोनि फराय बिजाब राव दानस्लाय मावसावरायमाया

गरेश्वर जौसिन फरायसालियाव साननैनि हाबाफारिजो जानानै थाडो । राव दानस्लायनाय दालाइ आफादनि मासिगिरि मुस्त्री सिताराम बसुमतारी आरो हांखायगिरि मुस्त्री बिनय नार्जारी दैदेननाय आरो गरेश्वर गुदि बर' थुनलाइ आफादनि बानजायनायाव खुंनाय बे मावसावरायमायाव गासै सा 17 राव दानस्लायगिरि लोगो बिबुंगोरा-आयदा फोरोंगिरिफोरा बाहागो लायो ।

मख'जाथाव दि, बर' थुनलाइ आफादआ फैगौ 2017 मायथाइनिफ्राय जौसिन फरायसालियाव बर' बिजो थिस'ननो थाखाय आसाम सरकारखौ नारसिनबाय थानाय जादो । बे थांखियै थांनाय 27 एप्रिल, 2016 खालारखालि आसाम जौसिन फरायसालि गुथुम (AHSEC) नि मासिगिरि मः नबाब मामुद हुसेइन बिथांजो सावरायनाय जायो । बे सावरायनायाव आसाम जौसिन फरायसालि सोलोथाइ गुथुमा बर' बिजो थिसननायाव जेबो हेंथा गैया । नाथाय आसाम सरकार, बि.टि.सि. खुंथाइ आरो बर' थुनलाइ आफादआ थाम ख'नायारि सावरायनायनि गेजेरजो थिरांथा लानांगोन होनना फोरमायो । बे मावसावरायमायाव जोबथा सान 29 मे, 2016 खालाराव बर' थुनलाइ आफादनि गाहाइ नेहाथारि मुस्त्री कमलाकान्त मोसाहारी, रांगिरि मुस्त्री काबाराम सर्गीयारी, तामुलपुर जिला बर' थुनलाइ आफादनि आफादगिरि मुस्त्री निलकमल बसुमतारी, नेहाथारि मुस्त्री हरेन बर', गरेश्वर जौसिन फरायसालिनि गोरायुं मुस्त्री महिधर बर', गुवाहाटी जिला बर' थुनलाइ आफादनि बारग' लेडाइ आफादगिरि मुस्त्री लहित चन्द्र ब्रह्म, दुलाराय बर' गुदि फोरोंगिरि आफादनि आफादगिरि मुस्त्री कृष्णदास स्वर्गीयारी बिथांमोना बाहागो लायो ।

थांनाय 31 मे, 2016 खालारखालि बर' थुनलाइ आफादनि बाथौफुरि हारिमुवारि मावथांखिसालिनि फालांगियारि मावथांखिनि हा सेटेलमेन्ट खालामनायनि थाखाय दिसपुर हा-सार्कलनि मावख'गिरिया थियारि खालामनाय थांखिखौ कामरुप मेट्र' जिलानि मावख'आव गथायहैनाय जायो ।



थानाय 4 जुन, 2016 खालारखालि मोनाबिलि 5-00 रिंगायाव आफादनि दालाइ मावख' जे. बि. हागजेर न'मायाव बर' थुनलाइ आफादनि मिरु बिबानगिरि आफादनि मोनसे गोनां मेल खुंनय जायो। बे मेलावनो 5 जुन, 2016 खालारखालि जानो गोनां मिरु मावफुं आफादनि मेल आरो 6 जुन, 2016 खालारखालि आसामनि गोदानै सायख'जानाय गिबि मन्थ्रि मानिनां मुझी सर्बानन्द स'न'वाल बिथांखौ बरायनायनि सायाव सावरायनाय जायो।

थानाय 5 जुन, 2016 खालारखालि साननि 11-00 रिंगानिफ्राय बेलासि 3-00 रिंगासिम बर' थुनलाइ आफादनि मिरु मावफुं आफादनि मेलखौ आफादनि दालाइ मावख' जे.बि. हागजेर न'मायाव खुंनय जायो। आफादनि आफादगिरि पद्मश्री बान्था मोनगिरि ड० कामेश्वर ब्रह्मनि आफादगिरि मासि लानानै दैदेननाय मेलाव गोबां बर'नि थुनलाइ-आफाद-मावफारि हाबाफारि आरो दाबि दावाफोरखौ मावफुंनयनि थाखाय सावरायनाय जायो।

थानाय 6 जुन, 2016 खालारखालि बेलासि 3-00 रिंगायाव आसामनि गोदानै सायख'जानाय गिबि मन्थ्रि मानिनां मुझी सर्बानन्द स'न'वाल बिथांखौ गावनि आसाम नेहाथारिख' मावख' ख'थायाव लोगो हमनानै बर' थुनलाइ आफादनिफ्राय बरायनाय जायो आरो बर' थुनलाइ आफादनि थानाय 15 (जिबा) बोसोरआव मोनसेबो सुझांजायि आफादनि दाबि-दावाफोरखौ दानि गोदान आसाम सरकारआ मावफुंनयनि राहा लानो थाखाय खावलायनाय जायो। बे बरायनाय आरो सावरायनायाव मानिनां गिबि मन्थ्रि बिथांआ आफादनि गोनां गोनां दाबिफोरखौ मावफुंनयनि थाखाय मोनसे गोजौ थाखोनि सावरायनायनि खालार थि खालामनाय जागोन होनना फोरमायो आरो बरायनायखौ गोसो गोथारै आंजावना लायो।

बै सानखालिनो बेलासि 3-30 रिंगायाव आसामनि हाग्रा, आबहावा आरो हायेनारि जनजाति आरो उन गोग्लैसोनाय हारि जौगाथाइ बिफाननि मन्थ्रि मानिनां मुझीमा प्रमीलाराणी ब्रह्म बिथांखौबो गावनि आसाम नेहाथारिख'

मावख'आव लोगो हमनानै बर' थुनलाइ आफादनिफ्राय बरायहैनाय जायो।

बेनि उनाव बेलासि 4-00 रिंगायाव आसामनि रां, सावस्रि, सोलौंथाइ आरो गुबुन गुबुन बिफाननि मन्थ्रि ड० हिमन्त बिश्व शर्मा बिथांखौबो गावनि आसाम नेहाथारिख' मावख'आव लोगो हमनानै बर' थुनलाइ आफादनिफ्राय बरायहैनाय जायो। बे बरायनाय हाबाफारियाव बर' थुनलाइ आफादनि आफादगिरि पद्मश्री बान्था मोनगिरि ड० कामेश्वर ब्रह्म, लेडाइ आफादगिरि सानै मुझी बिश्वेश्वर बसुमतारी, मुझी दिपक कुमार बसुमतारी, गाहाइ नेहाथारि मुझी कमलाकान्त मोसाहारी, नेहाथारि मुझी राजेन्द्र नाथ ब्रह्म, आरो रांगिरि मुझी काबाराम स्वर्गीयारी बिथांमोनआ बाहागो लादोमोन।

थानाय 7 जुन, 2016 खालारखालि बेलासि 3-00 रिंगायाव कामरुप (नोगोरमा) जिलानि जिला बैंगिरि (डि.सि.) मावख'आव थानानै लेडाइ जिला बैंगिरि मुझीमा बर्नाली शर्माखौ लोगो हमनानै बर' थुनलाइ आफादनि बाथौफुरि हारिमुवारि मावथांखिसालिनि फालंगियारि मावथांखिनि हा सेटेलमेन्ट खालामनायनि सायाव सावरायनाय जायो। सावरायनाय समाव लेडाइ जिला बैंगिरि बिथाड आधिखाल गोदान आसाम सरकारनि गनायथिनि थाखाय थाबैनो थांखि दैथाय हरनाय जागोन होनना फोरमायो। बे सावरायनायाव बाहागो लादोमोन बर' थुनलाइ आफादनि गाहाइ नेहाथारि मुझी कमलाकान्त मोसाहारी आरो रांगिरि मुझी काबारम स्वर्गीयारीया।

थानाय 8 जुन, 2016 खालारखालि बेलासि 2-00 रिंगायाव गुवाहाटी भरलुमुखआव थानाय हिलप्रिन्टासआव बर' थुनलाइ आफादनि मानिनां आफादगिरि पद्मश्री बान्था मोनगिरि ड० कामेश्वर ब्रह्म बिथांआ राव दानस्लायनाय "गिबि भारतनि जारिमिन" बिजाबखौ सोदांनय आरो डि.टि.पि. स्र' (सेटिं) खालामनाय जायो। बै सानखालिनो बेलासि 3-30 रिंगायाव बर' थुनलाइ आफादनि दालाइ मावख' जे.बि. हागजेर न'मायाव एन.आर.सि.नि बर' थख'लाइ (फर्म) कम्पिउटारआव सोस'ननाय हाबायाव



थिस'नजानाय कम्पिउटार मावदांसाफोरजों सावरायनाय जायो। बे सावरायनायाव आथिखालाव एन.आर.सि.नि थख'लाइफोरखौ कम्पिउटारआव सोस'ननाय समाव मा रोखोमनि जेंनानि मोगा-मोगि जानांदों, बेनि सायाव उदिस लाना सावरायनाय जायो। सावरायनाय समाव कम्पिउटार मावदांसाफोरआ दासिम खामानिया थिगयैबो सोलिगासिनो दं। नाथाय थानाय जानाय आरो सोलिनायनि थाखाय रांनि आंखालनि बाथाखौ रायखाडे आरो थाबैनो रांखौ दिहुनना होनायनि थाखाय लोब्बा थानाय बिफाननो फोरमायनो खावलायो। सावरायनायाव गाहाइ नेहाथारि बिथांआ एन.आर.सि.नि बे थख'लाइ कम्पिउटारआव सोस'ननाय खामानिखौ आसाम सरकारआ मोनसे गावारि कम्पानीनो गथायदों। बेखायनो बेयो थोंजों सरकारजों लोब्बा गैया। थेवबो कम्पानीनि सामलायगिरिफोरजों सावरायनाय जागोन होनना फोरमायो। बे सावरायनायाव बर' थुनलाइ आफादनि रांगिरि मुस्त्री काबाराम स्वर्गीयारीयाबो बाहागो लादोंमोन।

बेनि उनाव बै सानखालिनो बर' थुनलाइ आफादनि दालाइ मावख' जे.बि. हागजेर न'मायाव आथिखालाव सिरां जिलायाव बाबा रामदेवआ गायसंनो थाखाय लाहार-फाहार खालामनाय "पतन्जली" नि मावथांखिनि सायाव मिथिना लानो थाखाय गुवाहाटीनि पतन्जलीनि मावफारिजों लोब्बा थानाय सोद्रोमाफोरजों सावरायनाय जायो। बे सावरायनायाव पतन्जलीनि जानानै मुस्त्री बाहादुर रामसियारीया बाहागो लायो आरो सुंद'यै मावथांखिनि बागै फोरमायो। उन समाव बेनि सायाव गोजौ थाखोनि बिबानगिरिफोरजों सावरायनायनि थाखाय राहा लानाय जागोन होनना फोरमायो। सावरायनायाव बर' थुनलाइ आफादनिफ्राय गाहाइ नेहाथारि मुस्त्री कमलाकान्त मोसाहारी आरो रांगिरि मुस्त्री काबाराम स्वर्गीयारीया बाहागो लायो। बै सानखालिनो मोनाबिलि 6-00 रिंगायाव आसामनि मुंदांखा मेलेमजीवि, बिसावरायगिरि-लिरगिरि ड० प्रफुल्ल महन्तनि गावनि भेटापारायाव थानाय न'आव थांनानै बिथांनि नोरजिया देहानि खौरां लाहैनाय जायो। बे हाबाफारियाव

बर' थुनलाइ आफादनि गाहाइ नेहाथारि मुस्त्री कमलाकान्त मोसाहारी, रांगिरि मुस्त्री काबाराम स्वर्गीयारीया बाहागो लायो।

थांनाय 10 जुन, 2016 खालारखालि तामुलपुर जिला बर' थुनलाइ आफादनि बानजायनायाव तामुलपुर जौसिन फरायसालियाव खुंनाय जिला आफादनि बारग' आफादगिरि रंसारि सुनिल कुमार बर'नि गोसोखां सावरायमेलाव बर' थुनलाइ आफादनिफ्राय बाहागो लाहैनाय जायो आरो मान बाउनाय जायो। बे हाबाफारिजों लोब्बा लाखिनानै खुंनाय गेवलां मेलाव बर' थुनलाइ आफादनि गाहाइ नेहाथारि मुस्त्री कमलाकान्त मोसाहारीया गाहाइ सावरायगिरि महरै बाहागो लायो। बे सावरायमेलाव बर' थुनलाइ आफादनि रांगिरि मुस्त्री काबालाम स्वर्गीयारी आरो गुवाहाटी जिला बर' थुनलाइ आफादनि बारग' लेडइ आफादगिरि मुस्त्री ल'हित चन्द्र ब्रह्मआबो बाहागो लादोंमोन।

नलबारि जिला बर' थुनलाइ आफादनि बारग' नेहाथारि, बर' थुनलाइ आफादनि रांसार थुनलाइ बान्था मोनगिरि सासे राफोद थुनलाइगिरि मुस्त्री बिरेन्द्र कुमार बसुमतारिआ थांनाय 13 जुन, 2016 खालारखालि हरनि 11-00 रिंगायाव गुवाहाटीनि हायात हस्पितालाव मोनसे गोब्राब बेरामाव गोलैना जिउ गोमानायाव बर' थुनलाइ आफादआ गोथौ दुखु मोननायखौ फोरमायदों। लोगोसे दुखुथिया नख'रनि फारसे गोथौ दुखु मोनफानायखौ फोरमायहरदों आरो रंसारिनि जिउमाया सोर्गोआव आलो गोजोन जायगा मोनथों बेनि थाखाय ग'साइनि खाथियाव आर'ज गाबनाय जायो। बिथां रंसारि बसुमतारीया 2003 मायथाइयाव नलबारि जिला बर' थुनलाइ आफादनि थुनलाइस्त्रि बान्था आरो 2013-14 मायथाइनि मिरु बर' थुनलाइ आफादनि रांसार थुनलाइ बान्था फारिथै जाउलिया सिमां आरो अन्थाइ मोदाइ सुंद' स'ल' बिजाबनि थाखाय मोननो हादोंमोन। बिथाड थांना थानाय समाव जाउलिया सिमां, अन्थाइ मोदाइ (सुंद' स'ल' बिजाब), सिलिंखार (खौरांगसे बिजाब), मोस्त्रोम



(खन्थाइ बिजाब) सेबखांजायि सोरजिना गालांदो। बेनि अनगायैबो बिथाड गोंबां लाइसि, जथायनाय बिजाब सुजुना गालांदो। बिथानि अब'थिरा जिउ गोमानायाव बर' थुनलाइयाव गोंबां खहा जाबाय। रंसारि बसुमतारी बिथाड 1986 मायथाइनिफ्राय 1988 मायथाइसिम धमधमा गुदि बर' थुनलाइ आफादनि, आफादगिरि, 1990 निफ्राय 1991 मायथाइसिम नलबारि जिला बर' थुनलाइ आफादनि नेहाथारि आरो 2003 मायथाइनिफ्राय 2006 मायथाइसिम मिरु बर' थुनलाइ आफादनि बान्था सायख' आफादनि हांखायगिरि महरै बिबान बानस'लांदोमोन। बिथाड बर' थुनलाइ आफादआ 2015 मायथाइनिफ्राय गोदानै मिरु हिन्दी बिथोनगिरिख' (Central Hindi Directorate, New Delhi) नि बानजायनायाव सुजुनो लानाय भारतारि बां-रावारि सोदोब बिहुं सुजु आफादनि सासे सुजुगिरि महरै हाबा मावदोमोन आरो लिरनाय खामानिखौ फोजोबलांदोमोन।

बर' थुनलाइ आफादनिफ्राय गाहाइ नेहाथारि मुस्त्री कमलाकान्त मोसाहारी, रांगिरि मुस्त्री काबाराम सर्गीयारी आरो गुवाहाटी जिला बर' थुनलाइ आफादनि लेडइ आफादगिरि मुस्त्री किशर कुमार बर' आ थांनाय 14 जुन, 2016 खालारखालि फुंनि 11-00रिंगायाव रंसारिनि धमधमानि महिना-सान्तिपुर गामियाव थांनानै गोथै सह'आव बिबार बाउनानै जोबथा मान बाउहैनाय जायो।

थांनाय 14 जुन, 2016 खालारनिफ्राय 17 जुन, 2016 खालारसिम ग'वालपारा दुधनै-रुम्बकपारानि मुंदांखा लिरगिरि मुस्त्री हरेश्वर बसुमतारीया "राभा संस्कृतिर धारा" बिजाबखौ "राभा हारिमुनि बिथुन" मुं होनानै बर' रावआव दानस्लायनाय बिजाबखौ दिहुननो थाखाय पानबाजार एन.एल. पाब्लिकेसन्सआव खामानि मावनाय जायो। लोगोसे बर' थुनलाइ आफादनि दानथामारि लाइसि दि बड'नि सुजुनाय आरो पुफ नायनाय खामानियाव नांथाबफाना बे गांनै बिजाबखौ दिहुननायनि राहा खालामनाय जायो।

थांनाय 19 आरो 20 जुन, 2016 खालारखालि

साननैनि हाबफारिजो बर' थुनलाइ आफाद आरो साहित्य अकादेमीया सापागुरि-ककलाबारी गुदि बर' थुनलाइ आफादनि बानजायनायाव "बर' लिरगिरि फोरबो आरो बिजाब दिन्थिफुनाय आरो फाननाय मेलखौ" के. सि. फरायसालिमा हजुवा-ककलाबारीयाव गाजा-गोमजायै खुंनाय जायो।

19 जुननिफ्राय साननैनि हाबाफारिजो सिमलानि हजुवानि के.सि. फरायसालिमायाव साहित्य अकादेमि आरो बर' थुनलाइ आफादनि जुथाइयै खुंनाय आरो सालबारि जिला बर' थुनलाइ आफादनि बानजायनाय आरो सापागुरि-ककलाबारी गुदि बर' थुनलाइ आफादनि मददआव बर' लिरगिरि फोरबो आरो बिजाब दिन्थिफुंनाय आरो फाननाय मेलानि गिबि साननि हाबाफारिया गाजा-गोमजायै जानानै थाडे। बे फोरबोनि हाबाफारि लेखा फुंनि 8-00 रिंगायाव गाहाइ लांगोनाखौ बेखेवो बि.टि.सि. नि बारग' मावफुं सोद्रोमा मुस्त्री बुद्धि नार्जारीया। 8-20 रिंगायाव जथुमसालि न'ब्लांखौ बेखेवो सालबारि जिला बर' थुनलाइ आफादनि आफादगिरि मुस्त्री सिताराम बसुमतारीया आरो 8-30 रिंगायाव लिरगिरि बादाखौ बेखेवो बर' थुनलाइ आफादनि बारग' नेहाथारि मुस्त्री उपेन चन्द्र देउरी बिथाड। बेनि उनाव 9-10 रिंगायाव बर' थुनलाइ आफादनि फिरफिलाखौ बिरहोयो आफादनि आफादगिरि ड० कामेश्वर ब्रह्म बिथाड आरो 9-30 रिंगायाव बिजाब दिन्थिफुंसालि आरो फाननाय ग'लाखौ बेखेवदोमोन मुसलपुर महकुमानि एस.डि.अ. (सिभिल) मुस्त्री हेमन्त राजकुमार बिथांआ।

बेनि उनाव 11-00 रिंगानिफ्राय फोरबो बेखेवजेननाय मेल खुंनाय जायो। बे मेलानि मासिगिरिनि बिबान लायो बर' थुनलाइ आफादनि आफादगिरि ड० कामेश्वर ब्रह्मआ आरो मेलखौ बेखेवो सापागुरि ज'थाइनि एम.एल.ए. मुस्त्री थानेश्वर बसुमतारीया। बेखेवजेननाय मेलानि बराय बिबुंथि होयो साहित्य अकादेमिनि ओनसोलारि नेहाथारि (कलकाता)नि ड० गपाल चन्द्र बर्मनआ आरो जागायजेननाय बिबुंथि होयो बर' थुनलाइ आफादनि

लेडाइ आफादगिरि मुस्त्री बिश्वेश्वर बसुमतारीया। बेखेवजेननाय मेलाव साबायख'र बाउवो बर' थुनलाइ आफादनि गाहाइ नेहाथारि मुस्त्री कमलाकान्त मोसाहारीया।

बे बेखेवजेननाय मेलावनो बानजाय आफादआ सुजुना दिहुननाय बिसम्बि खौ बेखेवदोंमोन बि.टि.सि. नि जायगानि एम.सि.एल.ए. मुस्त्री अनिप बसुमतारीया। बेनि उनाव साननि 12-00 रिगानिफ्राय गिबि जथुम खुंनाय जायो। गिबि जथुमननि आयदाया जादों - आं मानो लिरो? बे जथुमाव मासिगिरिनि बिबान लायो मुंदांखा लिरिगिरि बर' थुनलाइ आफादनि बारग' आफादगिरि मुस्त्री ब्रजेन्द्र कुमार ब्रह्मआ। बे आं मानो लिरो आयदानि सायाव बाहोगो लागिनि महरै बाहागो लानानै गासैबो साहित्य अकादेमीनि बान्था मोनगिरि बर' थुनलाइगिरिफोर फारियै- मुस्त्री जनिल कुमार ब्रह्म, ड० मंगलसिं हाज'वारी, मुस्त्री अरबिन्द' उजिर, मुस्त्री बिद्यासागर नार्जारी आरो मुंदांखा लिरिगिरि मुस्त्री धरणीधर औवारी बिथांमोना गावबा गावनि मोनदांथिदों माबायदि थुनलाइ सोरजिबोदोंमोन बेनि सायाव गुवारै सावरायो।

बेनि उनाव बेलासि 3-00 रिगानिफ्राय नैथि जथुम खुंनाय जायो। बे नैथि जथुमनि आयदाया बर' खन्थाइगिरि जथुम। बे ज'थुमाव मासिगिरिनि बिबान लादोंमोन मुंदांखा खन्थाइगिरि मुस्त्री अरबिन्द' उजिरआ। खन्थाइगिरि जथुमाव गावबा-गाव सोरजिनाय खन्थाइ आवरायो फारियै- मुस्त्री ग'पिनाथ ब्रह्म, मुस्त्री कनिष्क हाज'वारी, मुस्त्री निनगोमा सोरगियारी आरो थरायना धिर्जुजति बसुमतारीया। खन्थाइगिरि जथुमखौ दैदेनो बर' थुनलाइ आफादनि नेहाथारि मुस्त्री राजेन्द्र नाथ ब्रह्म बिथाड।

जोबथारनायाव बर' थुनलाइ आफादनि जर'खा हाबाफारि महरै बर' राव सोलायनाय आयदानि सायाव मोनसे सावराय मेल खुंनाय जायो। सावराय मेलाव मासिगिरिनि बिबान लायो बर' थुनलाइ आफादनि बारग' गाहाइ नेहाथारि मुस्त्री ग'बिन्द बसुमतारी बिथाड आरो सावराय मेलाव जागायजेननाय बिबुंथि होयो बर' थुनलाइ आफादनि बारग' नेहाथारि मुस्त्री ग'बिन्द नार्जारी बिथाड।

सावराय मेलाव लिरबिदां फरायगिरि फुंखा सुबुं महरै बाहागो लायो बिजनी फरायसालिमानि गोरायुं ड० बिरहासगिरि बसुमतारी आरो एस.एस.ए. नि राव दानस्लायगिरि मुस्त्री रिपेन बर'आ। सावराय मेलाव लोब्बागिरि महरै सावराय मेलखौ दैदेनो बर' थुनलाइ आफादनि नेहाथारि मुस्त्री प्रसान्त बर'आ।

थांन 20 जुन, 2016 खालारखालि जोबथा साननि हाबाफारि बादियै फुंनि 10-00 रिगायाव कलागुरु बिष्णु प्रसाद राभा सानजों लोब्बा लाखिनानै कलागुरुनि मुसुखायाव बिबार बाउनाय जायो। बे बिबार बाउनाय हाबाफारियाव जायगानि समाज सिबियारि मुस्त्री गंगाधर शरणीयाआ बिबार बाउजेनगिरि महरै बाहागो लायो।

बेनि उनाव बेलासि 11-00 रिगानिफ्राय थामथि जथुम खुंनाय जायो। बे थामथि जथुमनि आयदाया सुद' सल' लिरिगिरिफोरनि जथुम। बे जथुमयाव मासिगिरिनि बिबान लादोंमोन मुंदांखा लिरिगिरि मुस्त्री धरणीधर औवारीआ। जथुमयाव गावबा-गाव सोरजिनाय सुंद' सल' आवरायो फारियै- मुस्त्री ग'बिन्द बसुमतारी, बारग' गाहाइ नेहाथारि, बर' थुनलाइ आफाद, मुस्त्री लेबेनलाल मोसाहारी, बरमा, बाकसा, मुस्त्री नबीन मल्ल बर' अदालगुरि आरो मुस्त्री उत्तम चन्द्र ब्रह्म, कार्बि आंलं बिथांमोना। जथुमखौ दैदेनो बर' थुनलाइ आफादनि नेहाथारि मुस्त्री प्रसान्त बर' बिथाड। बेनि उनाव बेलासि 1-00 रिगानिफ्राय ब्रैथि जथुम खुंनाय जायो। बे ब्रैथि जथुमनि आयदाया जादों बर' थुनलाइनि बायदि बोहैथि दाहार। बे जथुमायाव मासिगिरिनि बिबान लादोंमोन मुंदांखा लिरिगिरि आरो साहित्य अकादेमी बान्था मोनगिरि ड० अनिल बर' बिथाड। जथुमायाव गावबा-गाव सोरजिनाय बेसेनगोसा लिरबिदां आवरायो फारियै-मुस्त्री आदाराम बसुमतारी, ककराझार, मुस्त्री बिरूपाक्षगिरि बसुमतारी, गुवाहाटी आरो ड० तुलन मोसाहारी, धेकियाजुलि, सनितपुर बिथांमोना। जथुमखौ दैदेनो बर' थुनलाइ आफादनि नेहाथारि मुस्त्री राजेन्द्र नाथ ब्रह्म बिथाड। बेलासि 3-00 रिगायाव बिदाय जथुम्मा खुंनाय जायो। बे बिदाय



जथुम्माखौ मासिगिरि महरै के.सि. फरायसालिमानि गोरायुं ड० रमानन्द दास बिथाड मासि लानानै दैदेनो। गाहाइ आलासि महरै बाहागो लायो बि.टि.सि. लेडाइ गाहाइ मुस्त्री खाम्फा बरग'यारी बिथाड। गाहाइ आलासि महरै होनाय बिबुंधियाव बि.टि.सि.नि लेडाइ गाहाइ बिथाड आथिखालाव साहित्य अकादेमी आरो बर' थुनलाइ आफादआ जुथाइयै बर' राव थुनलाइ जौगानायनि थाखाय लाबोनाय हाबाफारि मावफारिफोरा जोबोद बाखनायथाव जादों होनना बुडे। बिथाड आथिखालाव बि.टि.सि. सरकारआ राव थुनलाइ जौगानाय आरो बर' बिजोंनि लोगोसे बि.टि.सि हालामनि गुबुन गुबुन बिजोंनि फरायसाफोरनि थाखाय लानाय जौगाथाइयारि मावफारि आरो हाबाफारिफोरखौ फोसावो। बिदाइ जथुम्मायाव जुनिया आलासि महरै ककराझार सरकारी फरायसालिमानि आजिरा मोननाय गोरायुं आरो साहित्य अकादेमीनि राव दानस्तायनाय बान्था मोनगिरि मुस्त्री सुरथ नार्जारी बिथाड बाहागो लायो। बिदाइ जथुम्मायाव बर' थुनलाइ आफादनि आफादगिरि ड० कामेश्वर ब्रह्म बिदाइ बिबुंधि होयो। मानिनां आफादगिरि बिथाड खम समनि गेजेरावनो सालबारि जिला बर' थुनलाइ आफाद, बानजाय आफाद आरो सि.के. गुदि बर' थुनलाइ आफादआ बे फोरबोखौ गाजा-गोमजायै खुंनायनि थाखाय साबायखर बाउवो लोगोसे साहित्य अकादेमीया बे बर' लिरिगिरि फोरबोखौ खुंनो खाबु होनाय आरो बे फोरबोखौ हजुवा-सिमलानि के.सि. फरायसालिमायाव खुंनायनि खाबु होनायनि थाखाय फरायसालिमानिनो गोरायुं आरो आफादगिरिखौ मान बाउवो। बिदाइ जथुम्मायाव जायगानि सापागुरि ज'थाइनि एम.एल.ए. मुस्त्री थानेश्वर बसुमतारी बिथाडबो बाहागो लायो। बिदाइ जथुम्मायाव मासिगिरि के.सि. फरायसालिमानि गोरायुं ड० रमानन्द दास बिथाड साहित्य अकादेमी आरो बर' थुनलाइ आफादआ बे बर' लिरिगिरि फोरबोखौ सिमला-हजुवा बादि उन गोगलैसोनाय जायगानि फरायसालिमायाव खुंनायनि थाखाय जोबोर गोजोननाय फोरमायो। बिथाड आथिखाल बर' राव थुनलाइनि

जौगानायखौ नुनानै आरो मिथिनानै जोबोर बाखनायो आरो आसामाव बायदि रावफोर जैरै- कार्बि, राभा आरिनि रावफोर दड'। बेफोर रावाबो समानै जौगानांगौ आरो राव जौगानायाव जेबो हेंथा थानाड होनना बिबुंधि लाखियो। बिदाइ जथुम्मायाव बर' थुनलाइ आफादनि गाहाइ नेहाथारि मुस्त्री कमलाकान्त मोसाहारी बिथाड बे गिबि खेबनि थाखाय साननैनि हाबाफारिजों खुंफुंनाय बर' लिरिगिरि फोरबोखौ मदद आरो जाफुंसार होनायनि थाखाय सालबारि जिला बर' थुनलाइ आफाद, सि. के. गुदि बर' थुनलाइ आफाद, के.सि. फरायसालिमानिसिम साबायख'र बाउवो। बिथाड बे फोरबोखौ खुंफुंनायनि थाखाय बि.टि.सि.नि गाहाइ मुस्त्री हाग्रामा महिलारी, जायगानि एम.एल. ए. मुस्त्री थानेश्वर बसुमतारी आरो गुबुन गुबुन दानहोगिरि बिथांमोना दान होनानै मदद आरो हेफाजाब होनायनि थाखाय जुनियायै साबायखर बाउवो। लोगोसे बि.टि.सि. नि लेडाइ गाहाइ मुस्त्री खाम्फा बरग'यारी बिथाड गाहाइ आलासि महरै आरो साहित्य अकादेमी मोनगिरि मुस्त्री सुरठ नार्जारी बिथाड जुनिया आलासि महरै बाहागो लाफैनायनि थाखाय साबायखर बाउवो। जोबथारनायाव जायगानि राइजो राजाफोरनिसिम रोजा रोजा साबायखर बाउनानै मेलखौ थुंगेहोनाय जायो।

थानाय 23 जुन, 2016 खालारखालि बेलासि 1-00 रिंगायाव आसामनि मानिनां गिबिमन्थ्रि, सोल्लोथाइ मन्थ्रिजों सावरायनायनि सम बिनानै गावारि नेहाथारिनो आर'जलाइ होनाय जायो। बेनि उनाव बेलासि 2-00 रिंगायाव आसामनि हायेनारि जनजाति आरो उनगलैसोनाय हारि जौगाथाइ बिफाननि मन्थ्रि मानिनां मुस्त्रीमा प्रमीला राणी ब्रह्मखौ गावनि आसाम नेहाथारिख'नि मावख' ख'थायाव लोगो हमनानै आसामनि गिबि मन्थ्रि, सोल्लोथाइ मन्थ्रि, बि.टि.सिनि गाहाइ आरो बर' थुनलाइ आफादनि गेजेराव मोनसे थाम ख'नायरि सावरायनायनि खालार थि खालामनो थाखाय गांसे आर'जलाइ होनाय जायो। बेनि उनाव बेलासि 3-00 रिंगायाव आसाम सरकारनि पि.डब्लिउ. बिफाननि कमिस'नार आरो जुनिया नेहाथारि मुस्त्री म'हन चन्द्र बर'खौ



गावनि मावख' ख'थायाव लोगो हमनानै दानि आसाम सरकारनि गोदान रां बाउजा (बाजेट) आवनो बाथौफुरि हारिमुवारि मावथांखिसालिनि हाबग्रा गाहाइ दरखंआव आर.सि.सि. दालां लुनायनि राहा खालामनाइनि सायाव सावरायनाय जायो। सावरायनाय समाव मानिनां कमिस'नार आरो जुनिया नेहाथारि बिथाङ देग्लाय दालांखौ लुफुंनय जागोन होनना फोरमायो। बै सानखालिनो 4-00 रिंगायाव गुवाहटीनिफ्राय क'कराझारसिम फैनाय जायो।

थानाय 24 जुन, 2016 खालारखालि फुंनि 9-00 रिंगायाव बि.टि.सि. लेडाइ गाहाइ मुस्री खाम्फा बरग'थारीखौ लोगो हमना डिब्रुगड़ मुलुगसोलोंसालिनि बर' बिफाननि न'मा लुनायनि थाखाय राडारि असुंथाइ हरनायनि फाइलनि सायाव सावरायनाय जायो। सावरायनाय समाव लेडाइ गाहाइ बिथाङ फाइलखौ थाबैनो बि.टि.सि.नि गाहाइनिसिम दैथाय हरनाय जागोन होनना फोरमायो।

बेनि उनाव फुंनि 11-30 रिंगायव बि.टि.सि. नेहाथारिख' मावख'आव थानानै बि.टि.सि.नि गाहाइनि गावारि नेहाथारि मुस्री माइकले दैमारीखौ लोगो हमनानै डिब्रुगड़ मुलुगसोलोंसालिनि बर' बिफाननि न'मा लुनाय फाइल आरो बि.टि.सि.नि बायजोनि जिला बर' थुनलाइ आफादनो मावख' लुनो थाखाय हरनो गोनां राडारि अनसुंथाइनि फाइलनि बागै सावरायनाय जायो। बेनि उनाव बि.टि.सि.नि बिबान मोनथ'नाय गाहाइ नेहाथारि मुस्री रबिनसन मोसाहारीखौ लोगो हमनानै डिब्रुगड़ मुलुग सोलोंसालिनि भि.सि.नि सिम बर' बिफाननि न'मा लुनो थाखाय आलाद हा दख्लासे होनो थाखाय खावलायना गांसे लाइजाम हरनो खावलायनाय जायो। सावरायनाय समाव गाहाइ नेहाथारि बिथांआ दिनैनो लाइजामखौ लांनो हागोन होनना फोरमायो आरो भि.सि. निसिम गांसे लाइजाम दैथाय हरनाय जायो।

थानाय 27 जुन, फुंनि 10-30 रिंगायाव बर' थुनलाइ आफादनि सा 3 मिरु बिबानगिरिफोरा गुवाहाटी मुलुग सोलोंसालिनि बायदि जेंनानि सायाव लेडाइ गिसिया बिथांखौ लोगो हमना सावरायो। सावरायनाय समाव बर'

थुनलाइ आफादनिफ्राय मोनस्नि दाबिनि गांसे गोसोखां बिलाइ मानिनां भि.सि. बिथांनो गथायनाय जायो। बर' थुनलाइ आफादनिफ्राय मानिनां भि.सि. बिथांनि नोजोर बोनाय जायो दि, मुलुगसोलोंसालिनि बर' बिफाननि न'माखौ बि.टि.सि.या गावनि फुनजिनफ्राय लुफुंन होदोंमोन। नाथाय बे न'माया आथिखालाव फरायसाफोरआ बांनयनि थाखाया आरो गोदान मुगानि माखासे खाबुआ थोजासे नड। बेखायनो बर' बिफाननि न'माखौ इसे फेदेरनानै लुफुंनबावनायनि गोनांथि दं। बेखायनो आथिखालनि न'माखौ इसे फुवारनानै आरो गोजौनि थालाखौ लुफुंनानै नांगौ रोखोमनि गोदान मुगानि खाबुफोरखौ थि खालामना होनो थाखाय मुलुगसोलोंसालिनि मावफुंगिरिफोरखौ दाबि खालामो बर' थुनलाइ आफादआ।

बर' थुनलाइ आफादनिफ्राय आथिखालाव बर' बिफानाव सासे बिबुंगोरा आरो सासल' लेडाइ बिबुंगोराजों बिफानखौ सालायबाय थानाय जादों। बर' बिफानाव आरोबाव मोननै लोगो बिबुंगोरानि मासि दंब्लाबो दिनैसिम लांदां जानानै दं। बेनिनो बावयैसो मोनसे मासि सुफुंनो थाखाय बिजाथि सायख'नाय आनजाद खुंनय जादोंब्लाबो दिनैसिम बिबुंगोरा थिस'ननाय जायाखिसै। बेनि जाहोनखौ जेबो मिथिनाय जायाखै। गुबुन फारसेथिं मुस्रि बिरलां नार्जारीथा सासे हिन्जावसा फरायसा बुथारनायनि दायव गुवाहाटी गोजौ बिजिरसालियाव दायनिगिरि खालामजानानै आथिखालाव जिउनां साजा मोननानै जोबथेसालियाव जोबजानायनि थाखाय बिथांखौ साखिनिफ्राय होखारनाय जाबाय। नाथाय बिथांनि जायगायाव दासिमबो फोरोंगिरि थिस'ननायनि जेबो राहा लानाय नुनो मोनाखै। आथिखालाव फरायसाफोरनि बांबोनायनि रुजुथाइयाव फोरोंगिरि थिस'नालाबानो सानैल' फोरोंगिरिजों बर' बिफानखौ सालायबाय थानाय नुनो मोनदों। बेखायनो बर' थुनलाइ आफादनिफ्राय इउ.जि.सि.नि खान्थि बादियै खमैबो सासे बिबुंगोरा, सानै लेडाइ बिबुंगोरा आरो साब्रै लोगो बिबुंगोरानि मासि थिस'ननानै बर' बिफानखौ आबुं महर होनो थाखाय बर' थुनलाइ आफादआ दाबि दैखाडे।



बेनि थाखाय मुलुगसोलोंसालिनि मावफुंगिरि बिथांमोना गोखै राहा लानायखौ लुबैयो बर' थुनलाइ आफादआ ।

बेनि अनगायैबो बर' बिफानाव सासेबो मावख' लोगो, बिजाब बाखि लोगो आरो थोजासे ब्रैथि थाखोनि मावख' लोगो गैया । जेराव खमैबो सासे मावख' लोगो, सासे बिजाब बाखि लोगो आरो सानै ब्रैथि थाखोनि मावख' लोगो थानांगौ । नाथाय थानाय 2006 मायथाइयाव बर' बिफानखौ आलादा बिफान महरै गनायथि होनायनि उनावबो थानाय जि बोसोराव सासेल' ब्रैथि थाखोनि मावख' लोगो थिसननाय जादों । बेखायनो बर' थुनलाइ आफादनिफ्राय खमब्लाबो सासे थामथि थाखोनि मावख' लोगो, सासे बिजाब बाखि लोगो आरो सानै ब्रैथि थाखोनि मावख' लोगो थिसननो थाखाय दाबि दैखानाय जायो ।

गुवाहाटी मुलुगसोलोंसालियाव गुबुन आरोबाव माखासे जेंनानि सायाव गोखै राहा लानो थाखाय दाबि खालामो बर' थुनलाइ आफादआ । बे लेखा मानिनां लेडाइ गिसिया बिथांखौ बर' थुनलाइ आफादनिफ्राय आथिखालाव थामथि थाखो आरो ब्रैथि थाखोनि मावख' लोगो थिस'ननायाव जनजाति (S/T P) नि थाखाय थि खाखानाय मासियाव थिस'ननाय जायाखै । बेनिखायनो थाबैनो भारत सरकारनि थि बेंखन खान्थि बादियै जनजातिनि मोननांगौ मासिखौ थि खालामना बिजाथि थिस'नायनि राहा लानो थाखाय दाबि खालामनाय जायो ।

बेनि अनगायैबो आथिखालाव गुवाहाटी मुलुग सोलोंसालिनि सिडाव IDOL आव गोबां बर' फरायसाफोरा बर' बिफानाव मुं थिस'नना सोलोंथाइ लागासिनो दं । नाथाय बे बिफानखौ नायनो थाखाय सासेबो लोगो बिबुंगोरा थिस'ननाय जायाखै । बावयैसो सासे लोगो बिबुंगोरा एबा काउन्सिलर थिसननो थाखाय फोसावथाइ होनाय जादोंमोनब्लाबो नथाय दिनैसिम सासेबो बिजाथि थिस'ननाय जायाखिसै । बेखायनो IDOL आव बर' बिफानखौ नायनो थाखाय थाबैनो सासे लोगो बिबुंगोरा थिस'ननो थाखाय बर' थुनलाइ आफादआ दाबि खालामो ।

बेनि अनगायैबो आथिखालाव गोजौ फरायसालि

आरो जौसिन फरायसालिफोराव फोरोंगिरि थिसननो थाखाय बि.एड. डिग्रीखौ लाथारनांगौ आयदा खालामदों । नाथाय बि.टि.सि.नि सिडाव गुवाहाटी मुलुगसोलोंसालिनि सिडाव गंधामल' बि.एड. फरायसालिमा दं । बेनि मादाव ककराझार सि.टि.इ., गसाइगाँव बि.एड. फरायसालिमा आरो टंला बि.एड. फरायसालिमा । बे गंधाम फरायसालिमायाव सरासनसा थाखानाय बेंखन खान्थि बादियै 10% जौखोन्दो जनजाति बिजाथिखौ मुं थिस'ननायनि थाखाय राहा दं । नथाय बि.टि.सिया मोनसे दथि फारिनि उन गोग्लैसोनाय हालाम । गाहाइयै सोलोंथाइयाव जोबोद उनगोग्लैसोनाय । बेखायनो बेनि सिडाव थानाय बि.एड. फरायसालिमाफोराव खमैबो 30% जौखोन्दो जनजाति बिजाथिखौ मुं थिस'ननायनि राहा खालामनो बर' थुनलाइ आफादआ दाबि खालामो ।

बेनि उनाव बर' थुनलाइ आफादनि थान्दै हान्जाया बर' बिफाननि गाहाइ प्रफेसार भुपेन नार्जारी, प्रफेसार स्वर्णप्रभा सैनारी बिथांमोनखौ लोगो हमना बर' बिफाननि बायदि जेंना आरो आंखालफोरनि सायाव सावरायनाय जायो आरो बेखौ सुझानो थाखाय बर' बिफाननिफ्राय नांगौ रोखोमनि थांखि मुलुगसोलोंसालिनि मावफुंगिरिनि खाथियाव दैथाय हरनो थाखाय खवलायनाय जायो ।

सावरायनाय समाव लेडाइ गिसिया (भि.सि.) बिथाड जेंनाफोरनि सायाव गोखै सुझानायनि राहा लानो खोथा होयो । सावरायनाय समाव गुवाहाटी मुलुगसोलोंसालिनिफ्राय मानिनां गिसिया (भि.सि.) आरो रेबथुमगोरा (रेजिष्ट्रार) आरो बर' थुनलाइ आफादनिफ्राय लेहाइ आफादगिरि मुझी दिपक कुमार बसुमतारी, गाहाइ नेहाथारि मुझी कमलाकान्त मोसाहारी, रांगिरि मुझी काबाराम स्वर्गीयारी, गुवाहाटी जिला बर' थुनलाइ आफादनिफ्राय मुझी ल'हित चन्द्र ब्रह्म आरो मुझी किशर कुमार बर' बिथांमोना बाहागो लादोंमोन ।

थानाय 28 जुन, 2016 खालारखालि गुवाहाटी खानापारायाव थानाय बड'लेण्ड आलासि जिरायसालियाव बि.टि.सि.नि मानिनां गाहाइ मुझी हाग्रामा महिलारीखौ

लोगो हमना बर' थुनलाइ आफादनि बायदि हाबाफारि-मावफारिफोरखौ मावफुंनायनि थाखाय राडारि अनसुंथाइ होनायनि सायाव सावरायनाय जायो। सावरायनायाव बर' थुनलाइ आफादनिफ्राय फैगौ जुलाई, 2016 दाननि हाबाफारि-मावफारिफोरखौ फोरमायनाय जायो। बे लेखा आसामनि गिबि मन्त्रिजों थामख'नायारि सावरायनो खालार थि खालामनाय, डिब्रुगड़ मुलुगसोलोंसालियाव बर' बिफाननि न'मा लुफुंनायनि थाखाय राडारि अनसुंथाइखौ गनायथि होनाय आरो फैगौ 4 जुलाई, 2016 खालारनि सिगां-सिगां राडारि अनसुंथाइ गनायथि होनायनि लाइजामखौ बि.टि.सि.निफ्राय दिहुननाय, सिमेनसापरियाव बानजाय आफादनि मेल खुंनाय, 13 जुलाईनिफ्राय 17 जुलाई, 2016 सिम कलकातानि हाबाफारि, 10 जुलाई, 2016 खालारनिफ्राय 23 जुलाईसिम गोदान दिल्लीयाव जानो गोनां मावसावरायमा खुंनाय आरि हाबाफारिनि सायाव सावरायनाय जायो। सावरायनाय समाव बि.टि.सि. गाहाइ मानिनां मुझी हाग्रामा महिलारी बिथाड बैफोर हाबाफारि-मावफारिफोरखौ मावफुंनो थाखाय बि.टि.सि. निफ्राय राडारि मदद होनाय जागोन होनना फोरमायो।

थानाय 1 जुलाई, 2016 खालारखालि फुंनि 11-30 रिंगायाव बि.टि.सि.नेहाथारिख'आव थानानै बायदि मावख'वारी खामानिफोरखौ मावहैनाय जायो। बे लेखा बि.टि.सि.नि सोलोंथाइ बिफानाव थानानै बर' थुनलाइ आफादनि राडारि अनसुंथाइ होनाय फाइलनि सायाव बिफानारि मावख'गोराफोरजों सावरायनाय जायो। बेनि उनाव बि.टि.सि.नि हा-बिफाननि बिबान मोनथ'नाय नेहाथारि मुझी केरल नार्जारीखौ गावनि मावख' ख'थायाव लोगो हमना बर' थुनलाइ आफादनि गाहाइ मावख' आर.एन. ब्रह्म न'मानि हा एल'टमेन्ट होनाय फाइलनि सायाव सावरायनाय जायो। सावरायनाय समाव नेहाथारि बिथाड बर' थुनलाइ आफादनि गाहाइ मावख'नि हा-एल'टमेन्ट होनायनि फाइलखौ एल.ए.सि.आव गनायथि मोनाब्लाबो थोंजों बि.टि.सि. आनो होनो हायो। बेनि थाखायनो फाइलखौ बि.टि.सि.नि हा-बिफानाव मावफुं

सोद्रोमानि गनायथि लानाय जागोन होनना फोरमायो। बेनि उनाव साननि 1-30 रिंगायाव बि.टि.सि.नि गाहाइ मानिनां मुझी हाग्रामा महिलारीखौ बड'लेण्ड नेहाथारिख'नि मावख' ख'थायाव लोगो हमनानै डिब्रुगड़ मुलुगसोलोंसालिनि बर' बिफाननि न'मा लुफुंनायनि थाखाय राडारि अनसुंथाइ हरनो थाखाय गनायथि होनायनि थाखाय खावलायनाय जायो। बि.टि.सि.नि मानिनां गाहाइ बिथाड बै सानखालि लोगो लोगो फाइलखौ गनायथि होयो आरो गासै 3.65 कौटि रांनि मादाव कौटिसे रांखौ गिबि खोन्दो महरै दिहुनना हरनायनि थाखाय गनायथि होयो बि.टि.सि.नि गाहाइ बिथाड। बै सानखालिनो बेलासि 5-00 रिंगायाव बि.टि.सि. बिबान मोनथ'नाय गाहाइ नेहाथारि मुझी रबिनस'न मोसाहारीया डिब्रुगड़ मुलुगसोलोंसालिनि मानिनां रेबथुमग्रा आरो लेडाइ गिसियानिसिम गासे लाइजाम दिहुनना हरो।

थानाय 4 जुलाई, 2016 खालारखालि फुंनि 11-30 रिंगायाव बर' थुनलाइ आफादनि सा 6 मिरु बिबानगिरिफोरा डिब्रुगड़ मुलुग सोलोंसालिनि रेबथुमगोरा (Registrar) बिथांखौ मुलुगसोलोंसालिनि मानिनां भि.सि. बिथांनि जथुमसालि ख'थायाव सोलिबाय थानाय 2016-17 मायथाइनि सोलोंथाइ बोसोरनिफ्राय बर' एम. ए.बिफान बेखेवनायनि सायाव सावरायनाय जायो। सावराय समाव बर' थुनलाइ आफादनिफ्राय बि.टि.सि.निफ्राय मानिनां गाहाइ मुझी हाग्रामा महिलारी बिथाड थानाय 2015 मायथाइयाव फोसावनाय आरो अन्थाइ खाम्फा गायसननाय लेखा बर' बिफाननि थाम थाला न'मा लुफुंनो थाखाय गनायथि होनाय 3.65 कौटि रांनि अनसुंथाइ होनायनि गनायथि बिलाइखौ रेजिष्ट्रार बिथांनो गथायनाय जायो। लोगोसे सोलिबाय थानाय 2016-17 मायथाइनि सोलोंथाइ बोसोरनिफ्राय बर' बिफाननि एम. ए. फरायफारि बेखेवनो आरो बर' बिफाननि न'माखौ आलादा दखरसे हायाव थाबैनो लुफुंनो थाखाय दाबि खालामना मानिनां भि.सि आरो रेजिष्ट्रार बिथांमोननो गांफा गांफा गोसोखां बिलाइ होनाय जायो आरो सावरायनाय जायो।



सावरायनाय समाव रेबथुमग्रा (Registrar) ड० एम. एन. दत्त बिथाड मिथिहोयो दि, मानिनां लेडइ गिसिया (भि.सि.) बिथाड एंगारनो हायि जाहोननि थाखाय सावरायनायाव बाहागो लानो हायाखैसैब्लाबो बिथाड बर' थुनलाइ आफादजों आगोलावनो सावरायनाय बादि सोलिबाय थानाय 2016-17 मायथाइनिफ्राय बर' बिफान बेखेवनायाव जेबो अजद गैया, नाथाय बर' बिफाननि बिबुंगोरा (Professors) मासि मोनग्रोबा मोजां जायो होनना फोरमायो। सावरायाव बर' थुनलाइ आफादनिफ्राय थांनाय कंग्रेस सरकारनि आमोलाव डिब्रुगड़ मुलुगसोलोंसालिनि थाखाय बर' बिफाननि बिबुंगोरा मासि गनायथि होनो थाखाय रां बिफाननिसिम बिथांखि दैथाय हरनाय जादोंमोन, नाथाय बै समनि आसाम सरकारआ बिबुंगोरा मासिखौ गनायथि होवाखैसै। दा मानिनां मुझी सर्बानन्द सन'वालनि दैदेननायाव गोदान आसाम सरकारआ डिब्रुगड़ मुलुगसोलोंसालिनि बर' बिफाननि बिबुंगोरा मासिखौ गनायथि होनो थाखाय थाबैनो आसाम सरकार, बि.टि.सि. सरकार आरो बर' थुनलाइ आफादनि गेजेराव थाम ख'नायारि सावरायनो थाखाय नाजानाय जादों। बे सावरायनायाव आसाम सरकारखौ गनायथि होनो थाखाय नारसिननाय जागोन। बेखायनो आथिखालाव आलासि बिबुंगोरा (Guest Professor) एबा दिदोम नयि बिबुंगोरा थिस'ननायनि गेजेरजोंब्लाबो बर' बिफानखौ बेखेवथारनांगौ होनना बर' थुनलाइ आफादनिफ्राय दाबि खालामनाय जायो।

सावरायनाय समाव डिब्रुगड़ मुलुगसोलोंसालिनि रेबथुमगोरा बिथाड थाबैनो लेडइ गिसिया (भि.सि.) बिथांजों सावरायनानै नांगौ रोखोमनि राहा लानाय जागोन होनना फोरमायो। सावरायनाय समाव डिब्रुगड़ मुलुगसोलोंसालिनि जानानै रेबथुमगोरा मानिनां ड० एम. एन. दत्त आरो बर' थुनलाइ आफादआ बि.टि.सि.नि गाहाइ मानिनां मुझी हाग्रामा महिलारी बिथाड थांनाय 2015 मायथाइयाव फोसावनाय लेखा बे राडारि अनसुंथाइखौ गनायथि होनायनि थाखाय जुथाइयै साबायखर

बाउवो।

सावरायनाय समाव लेडइ गिसिया जानानै रेबथुमगोरा ड० एम. एन. दत्त, फरायसालिमाफोरनि बिथोनगिरि ड० रुपम शइकीया, लेडइ रेबथुमग्रा (सोलोंथाइ) ड० अर्जित हाजरिका, बर' थुनलाइ आफादनिफ्राय लेडइ आफादगिरि मुझी बिश्वेश्वर बसुमतारी, मुझी दिपक कुमार बसुमतारी, गाहाइ नेहाथारि मुझी कमलाकान्त मोसाहारी, नेहाथारिफोर मुझी राजेन्द्र ब्रह्म, मुझी प्रसान्त बर', रांगिरि मुझी काबाराम स्वर्गीयारीजों लोगोसे डिब्रुगड़, लक्षिमपुर, धेमाजि आरो ज'नाइ जिला बर' थुनलाइ आफादनि बिबानगिरिफोरबो बाहागो लादोंमोन।

थांनाय 5 जुलाइ, 2016 खालारखालि साननि 12-30 रिगायाव जनाइ, धेमाजि आरो लक्षिमपुर जिला बर' थुनलाइ आफादनि बानजायनायाव खुंनो गोनां 56 थि बर' थुनलाइ आफादनि बोसोरारि जथुम्मानि बानजाय आफाद आरो मिरु बर' थुनलाइ आफादनि गेजेराव मोनसे जुथाइ आलांगा जथुममा बानजाय आफादनि आफादगिरि आरो मिसिं गावखुंथाइ गुथुमनि गाहाइ मावफुंगिरि डा: रन'ज पेगु बिथांनि दैदेननायाव जानानै थाडे। जथुम्मानि थांखिखौ बेखेवो बानजाय आफादनि गाहाइ नेहाथारि मुझी ललित चन्द्र बर'आ। जथुम्मायाव मिरु बर' थुनलाइ आफादनि लेडइ आफादगिरि मुझी बिश्वेश्वर बसुमतारी आरो गाहाइ नेहाथारि मुझी कमलाकान्त मोसाहारीया फैगौ 56 थि बोसोरारि जथुम्मानि थांखि, मावफारि-हाबाफारि आरो आथिखालसिम बर' थुनलाइ आफादआ बर' राव-थुनलाइ, बर' बिजोंनि सोलोंथाइ जौगानाय आरो आसामनि थागिबि हारि-हारिसाफोरजों गोरुबनानै आसामनि गेदेर सार्थनि थाखाय मावबोनाय हाबाफारिफोरनि सायाव गोलाड बिबुंथि लाखियो। बिबुंथिनि गेजेरजों लेडइ आफादगिरि आरो गाहाइ नेहाथारि बिथांमोना फैगौ जथुम्मायाव बर' थुनलाइ आफादनि हाबाफारि आरो मावफारिया बांबोनायखौ नोजोर होनानै सानथामनि सोलाय सानब्रै खालामोब्ला सावरायनो गोनां गोबां आयदाफोरखौ हाखु-दाखु खालामा बालानो गोजोनै सावरायना हाबाफारिफोरखौ

मावफुंनो खाबु जायो होनना फोरमायो। बेनि सायाव राइजो राजा आरो बानजाय आफादखौ गुवारै सावरायनो खावलायो। बिबुंथिनि गेजेरजों बिथांमोना थांनाय 4 फेब्रुवारी खालारखालि डिब्रुगड़ मुलुग सोलोंसालियाव बर' बिफाननि एम. ए. फरायफारि बेखेवनो थाखाय बर' बिफाननि न'मा (Building) लुनो थाखाय बि.टि.सि.नि गाहाइ मुझी हाग्रामा महिलारी बिथाड 3.65 कौटि राडारि अनसुंथाइ होनायनि थाखाय गनायथि बिलाइखौ मुलुगसोलोंसालिनि रेबथुमगोरानो गथायना सावरायनाय आरो सोलिथाय थानाय 2016-17 मायथाइनि सोलोंथाइ बोसोरावनो बर' बिफानखौ बेखेवथारनो सावरायनाय बाथ्राखौ रायखाडे। बेनि अनगायैबो बर' थुनलाइ आफादआ बर' राव-थुनलाइखौ हादरनां आरो मुलुगनाडैनो गोसार होनो थाखाय लानाय हाबाफारि आरो मावफारिफोरनि सोमोन्दै गुवारै बेखेवना होयो। बेनि अनगायैबो आसामनि थागिबि गुबुन गुबुन जनजातिफोरनि रावखौ सोलोंथाइनि बिजों एबा आयदा महरै थिस'ननायनि थाखाय आरो आसामनि माखासे जोंब्लाउनाय जेंनाफोरखौ जयै सुझांनायनि थांखियै बर' थुनलाइ आफादनि दैदेनयाव थागिबि जनजाति साहित्य सभानि मोनसे जुथाइ आफाद दानानै जनजातिफोरनि गेजेराव खौसेथि लाबोनो हानायखौ गोजोननाय फोरमायो आरो फैगौ जथुम्मायाव गासैबो थागिबि जनजाति साहित्य सभाफोरनि गेजेराव मोनसे सावरायमा खुंनायनि गोनांथि दं दोनना बुडे। बेखायनो फैगौ 56 थि बोसोरारि जथुम्माया जोबोर ओंथि गोनां जागोन। बेनि थाखाय बानजाय आफादआ गासैबो राव, दोहोरोम, हारि सायख'वाजासे बयनिबो मदद लानानै बे जथुम्माखौ जाफुंसार खालामनो हागोनखौ फोथायनाय दं होनना फोरमायो। जथुम्मायाव बानजाय आफादनि जानानै मावफुं आफादगिरि मुझी मिहनिश्वर बसुमतारी, लेडइ आफादगिरि आरो मिसिं गावखुंथाइ गथुमनि लेडइ गाहाइ मुझी सुक्लेश्वर गयारी, लक्षिमपुर जिला बर' थुनलाइ आफादनि आफादगिरि मुझी नलेन मोसाहारी, मिरु बर' थुनलाइ आफादनि नेहाथारि मुझी प्रशान्त बर', लक्षिमपुर

जिला एबसुनि आफादगिरि मुझी प्रदीप बसुमतारी, धेमाजि जिला एबसुनि आफादगिरि मुझी शिबराम बसुमतारी आरो सतिश बसुमतारी बर' गेजेर फरायसालिनि बारग' गाहाइ फोरोंगिरि मुझी बिरेन्द्र ब्रह्म बिथांमोनाबो बिबुंथि लाखियो। जुथाइ जथुम्मानि गेजेरजों फैगौ 56 थि बर' थुनलाइ आफादनि जथुम्माखौ 5.6 आरो 7 फेब्रुवारी, 2017 खालाराव सानथामनि हाबाफारिजों गाजा-गोमजायै खुंनो थाखाय खालार थि खालामनाय जायो।

जोबनायाव बानजाय आफादनि आफादगिरि डा: रन'ज पेगु बिथाड फैगौ 56 थि बर' थुनलाइ आफादनि जथुम्माखौ जाफुंसार खालामनो थाखाय गासैबो हारि, रावारि आरो दोहोरोमारि राइजो-राजाफोरखौ मदद आरो हेफाजाब होनो थाखाय खावलायना जथुमखौ थुंगे होयो।

थांनाय 7 जुलाइ, 2016 खालारखालि साननि 11-00 रिंगानिफ्राय बेलासि 4-30 रिंगासिम आफादनि दालाइ मावख' जे. बि. हागजेर न'मायाव आफादनि थुबुर बाहायनायनि सानजादनि थाखाय भावसारफोरखौ स्र' खालामनाय आरो केसबुकआव थिस'ननाय खामानि मावनाय जायो। बे हाबाफारियाव आफादनि रांगिरि आरो गाहाइ नेहाथारिया बाहागो लादोंमोन।

थांनाय 8 जुलाइ, 2016 खालारखालि मोनाबिलि 7-30 रिंगानिफ्राय 9-00 रिंगासिम आसामनि हाग्रा, आबहावा आरो हायेनारि जनजाति आरो उन गोग्लैसोनाय हारि जौगाथाइ बिफाननि मानिनां मन्थ्रि मुझीमा प्रमीला राणी ब्रह्म बिथांखौ बिथानि सरकारी थाग्रा न'आव लोगो हमना बर' थुनलाइ आफादनि बायदि जेंना आरो दाबि-दावाफोरनि सायाव सावरायनाय जायो। लोगोसे थाबैनो बर' थुनलाइ आफादनि दाबिफोरखौ मावफुंनो थाखाय आसामनि गिबि मन्थ्रि आरो सोलोंथाइ मन्थ्रिजों बि.टि.सि. खुंथाइ आरो बर' थुनलाइ आफादनि गेजेराव थामख'नायारि सावरायनायनि लाहार-फाहार खालामनो थाखाय खावलायनाय जायो। सावरायनाय समाव मानिनां मन्थ्रि बिथाड बि.टि.सि.नि गाहाइजों सावरायना खालार थि खालामनाया गाहाम जागोन होनना फोरमायो।





थानाय 9 जुलाइ, 2016 खालारखालि फुंनि 9-00 रिगानिफ्राय फुंनि 10-00 रिगासिम आसामनि हाग्रा, आबहावा आरो हायेनारि जनजाति आरो उन गोग्लैसोनाय हारि जौगाथाइ मानिनां मन्थ्रि मुस्त्रीमा प्रमीला राणी ब्रह्म बिथांखौ गावनि सरकारी थाग्रा न'आव लोगो हमना आसामनि मोनफ्रोमबो थागिबि जनजाति सुबुंनि साहित्य सभाफोरनो बोसोरारि राडारि अनसुंथाइ होनाय आरो बर'-गार' बिजोनि लांदां फोरोंगिरिनि मासियाव बर'-गार' राव रोडिअसमीया बिजोनि फोरोंगिरि थिस'ननायनि बेरेखायै अजद होनानै आसामनि सोल्लोथाइ मन्थ्रिनो गोसोखां बिलाइ होनायनि कपि गांसे होनानै सावरायनाय जायो। सावरायनाय समाव मानिनां मन्थ्रि बिथाडा आसामनि रां आरो सोल्लोथाइ मन्थ्रिजो सावरायना राहा लानांगोन होनना बुडे। बै सानखालिनो साननि 11-00 रिगानिफ्राय बेलासिनि 7-30 रिगासिम बर' थुनलाइ आफ्पादनि संबिजिद सोदांनाय दालाइ आफ्पादनि गिबि मेल खुंनाय जायो। बे मेलाव बर' थुनलाइ आफ्पादनि लेडइ आफ्पादगिरि मुस्त्री बिश्वेश्वर बसुमतारी, गाहाइ नेहाथारि मुस्त्री कमलाकान्त मोसाहारी, सोद्रोमाफोर आरो लक्षीनाथ ब्रह्म, मुस्त्री लीलाधर बर' बिथांमोनआ बाहागो लायो।

बेनि उनाव आसामनि गिबिमन्थ्रि आरो सोल्लोथाइ मन्थ्रिनो गथायनो गोनां गोसोखां बिलाइ थियारि खालामनाय जायो।

थानाय 10 जुलाइ, 2016 खालारनिफ्राय 22 जुलाइ, 2016 खालारसिम गोदान दिल्लीनि बड'लेण्ड हाउसआव खुंनो लानाय भारत सरकारनि सुबुं दोहोन जौगाथाइ बिफाननि कमिसन फर साइनटिफिक एण्ड टेकनिकेल टारमिन'ल'जि (सि.एस.टि.टि.नि बिगियनारि आरो आरोदायारि सोदोब बिरोमा आय'ग)नि बानजायनाय आरो बर' थुनलाइ आफ्पादनि मददआव सोदोब माला (ग्ल'सारि) सुजुनाय सावरायमाया जोबलांबाय। हाबाफारि लेखा थानाय 10 जुलाइ, खालारनिफ्राय सि.एस.टि.टि.नि सोदोबमाला(ग्ल'सारि) पुफ नायनाय मावसारमा खुंनाय

जायो। बे मावसावरायमायाव आथिखालाव सुजुनाय राव बिगियान (Linguistics) रासायन बिगियान (Chemistry) जीव बिगियान (Biology) आयदानि बिगियानारि आरो आरोदायारि सोदोब बिरोमानि सोदोबमाला सुजुनाय मावफारिया जोबनायनि उनाव जोबथा पुउ नायनाय खामानिखौ मावसावरायमायाव मावफुंनाय जायो। बे मावसावरायमाया थानाय 17 जुलाइ, 2016 खालारखालि जोबनानै थाडे। बे मावसावरायमायाव बाहागो लादोमोन राव बिगियान आयदायाव गुवाहाटी मुलुगसोल्लोसालिनि प्रफेसार स्वर्णप्रभा सैनारि, शणितपुर जिलानि एल.अ.के.डि. फरायसालिमानि लोगो बिबुंगोरा ड० तुलन मोसाहारी, उदालगुरि फरायसालिमानि लोगो बिबुंगोरा ड० राजेन्द्र कुमार बसुमतारी आरो रासायन बिगियान, आयदायाव कामरुप जिलानि बन्दापारा गोजौ फरायसालिनि बिगियान आयदानि फोरोंगिरि मुस्त्री दिपेन्द्र नाथ बर', बरपेटा जिलानि जिलानि बाघमारा गोजौसिन फरायसालिनि बिगियान आयदानि फोरोंगिरि मुस्त्री रबिराम बसुमतारी बिथांमोनआ।

थानाय 11 जुलाइ, 2016 खालारनिफ्राय 22 जुलाइ, 2016 खालारसिम बर' थुनलाइ आफ्पादनि गुबुन मोनसे मावफारि भारत सरकारनि मिरु हिन्दी बिथोनगिरिख' (सेन्ट्रल हिन्दी डाइरेक्ट'रेट) नि बानजायनायाव आरो बर' थुनलाइ आफ्पादनि मददआव भारतनि दाइनथि फारियाव थिस'नजानाय मोन 22 रावनि बां रावारि सोदोब बिहुं सुजुनाय हाबाफारिनि गिबि पुफ नायनाय मावसावरायमा गोदान दिल्लीनि आर के पुरमआव थानाय सि.एड्स.डि.नि मावख'आव खुंनाय जायो। बे बां रावारि सोदोब बिहुं लिरजेननाय आरो सुजुनाय हाबाफारियाव सुजुगिरि महरै बाहागो लादोमोन बर' थुनलाइ आफ्पादनि लेडइ आफ्पादगिरि मुस्त्री बिश्वेश्वर बसुमतारी आरो नलबारी जिला बर' थुनलाइ आफ्पादनि बारग' नेहाथारि रंसारि बिरेन्द्र कुमार बसुमतारी बिथांमोना। नाथाय बिथां बिरेन्द्र कुमार बसुमतारी बिथाडा थानाय 13 जुन, 2016 खालारखालि हरखाब गोब्राब बेरामाव गोग्लैना रंसारि

जालाडे। बेखायनो गिबि पुफ नायनाय मावसावरायमायाव बर' थुनलाइ आफादनि लेडइ आफादगिरिजों लोगोसे नलबारी जिला बर' थुनलाइ आफादनिनो बारग' आफादगिरि मुझी खगेन्द्र कुमार रामसियारीया बाहागो लादोंमोन। बे गिबि पुफ नायनाय हाबाफारिया थांनाय 22 जुलाइ, 2016 खालारखालि जोबनानै थाडे। फैगौ अक्ट'बर, 2016 दाननि 7 खालारनिफ्राय 15 अक्ट'बर खालारसिम फिन गुवाहाटी मुलुगसोलोंसालिनि बर' बिफानाव गासैबो आयदानि जोबथा पुफ नायनाय मावसावरायमाखौ खुंनो थाखाय सि.एस.टि.टि. आरो बर' थुनलाइ आफादना थांनाय 22 जुलाइ, 2016 खालारखालि गोदान दिल्लीयाव सावरायना थिखालामदों। बे सावरायनायाव बर' थुनलाइ आफादनिफ्राय बाहागो लादोंमोन लेडइ आफादगिरि मुझी दिपक कुमार बसुमतारी, गाहाइ नेहाथारि मुझी कमलाकान्त मोसाहारी आरो नेहाथारि मुझी प्रशान्त बर'आ।

थांनाय 11 जुलाइ, 2016 खालारनिफ्राय 14 जुलाइ खालारसिम तामुलपुर जिला बर' थुनलाइ आफादनि बानजायनायाव गरेश्वर जौसिन फरायसालियाव सानब्रैनि हाबाफारिजों खुंनाय जौसिन फरायसालिनि फराय बिजाब राव दानस्लायनाय मावसावरायमायाव मिरु बर' थुनलाइ आफादनिफ्राय जागायजेननाय सानखालि बाहागो लाहैनाय जायो। बे हाबाफारियाव आफादनि गाहाइ नेहाथारि मुझी कमलाकान्त मोसाहारी आरो रांगिरि मुझी काबाराम स्वर्गीयारीया बाहागो लाहैदोंमोन।

थांनाय थांनाय 12 जुलाइ, 2016 खालारकालि बेलासि 2-30 रिगायाव गुवाहाटी आजारा पाटगावआव थानाय कृष्णकान्त सन्दिकै हादरसायारि उदां मुलुगसोलोंसालिनि मानिनां लेडइ गिसिया (भि.सि.) प्रफेसर हितेश डेका बिथांखौ गांविनि मावख' ख' थायाव लोगो हमननै बर' बिफान बेखेवनाय आरो डि.एल.एड.नि फराय बिजाबफोर राव दानस्लायनायनि सायाव सावरायनाय जायो। सावरायनाय समाव मानिनां लेडइ गिसिया मानिनां प्रफेसर.डेका बिथाड एम.ए. थाखेनि

थाखाय फरायफारि थियारि खालामनाय आरो डि.एल.एड.नि फरायबिजाब राव दानस्लायनाय खामानिखौ गोखै फोजोबनो थाखाय खावलायो।

थांनाय 13 जुलाइ, 2016 खालारनिफ्राय 16 जुलाइ खालारसिम बर' थुनलाइ आफादनि सा थाम मिरु बिबानगिरिफोरा कलकातायाव माखासे मावख'वारि खामानिफोर लानानै दावबाय हैयो। बे लेखा थांनाय 14 जुलाइ, 2016 खालारखालि साननि 12-30 रिगायाव बर' थुनलाइ आफादनि सा 3 मिरु बिबानगिरिफोरा कलकातायाव थानाय Anthropological Survey of India नि गाहाइ मावख'आव फैनानै लेडइ बिथोनगिरि (Dy. Director) ड॰ काकलि चक्रबर्ती बिथांजों बि.टि.सि. नि सिंआव क'कराझारआव बर' हारिनि हारिमुवारि आरो दोरोडारि मिरु (Bodo Community Cultural and Heritage Centre) गायस'ननायनि सायाव सावरायनाय जायो। सावरायनाय समाव लेडइ बिथोनगिरि बिथाड आथिखालाव बिथोनगिरि बिथाड आजिरा लाबाय। बिबान लाथ'नाय बिथोनगिरियाबो अफिसनिफ्राय सुटि लानानै दं। बेखायनो जेबो थिरांथा लानायनि थाखाय सावरायनो हाया। नाथाय मावथांखि (Project) नि बागै मिथिनो थाखाय सावरायजायो होनना बुडे। सावरायनाय समाव लेडइ बिथोनगिरि बिथाड बर'फोरनि दानाय-लुनाय, मोसानाय-रोजाबनाय, औवानि बायदि आयजें-आयला बानायनायनि फोरेंथाइ एबा माव सावरायमा खुंनो थाखाय राडारि अनसुंथाइ होनाय जागोन होनना फोरमायो। बेनि थाखाय बिथोनगिरिजों सावरायनो थाखाय फैगौ आगष्ट, 2016 दाननि उदांश्री साननि उनाव सावरायनो थाखाय थिरांथा लानाय जागोन होनना फोरमायो।

सावरायनाय समाव Anthropological Survey of India नि लेडइ बिथोनगिरि ड॰ काकलि चक्रबर्तीजों लोगोसे बिफानारि मावख'गोरा ड॰ उमेश कुमार, मुझी सन्त'स पाठक, बर' थुनलाइ आफादनिफ्राय लेडइ आफादगिरि मुझी दिपक कुमार बसुमतारी, गाहाइ नेहाथारि



मुस्त्री कमलाकान्त मोसाहारी आरो नेहाथारि मुस्त्री प्रसान्त बर'आ बाहागो लादोमोन।

थानाय 15 जुलाइ, 2016 खालारखालि फिन कलकातानि निउ टाउनआव थानाय एन्थ्रप'ल'जिकेल सार्भेआव इण्डियानि सानजा ओन्सोलारि मावख'नि लेडाइ बिथोनगिरि ड० काकलि चक्रवर्ती आरो बिथानि लोगो मावगोराफोरखौ लाफानानै बर' हारिनि हारिमुवारि आरो दोरोडरि मिरू (बर' कमिउनिटी कालसार एण्ड हेरिटेज सेन्टार) गायसंनायनि सायाव सावरायनाय जायो। बे सावरायनाय समाव लेडाइ बिथोनगिरि बिथाड मोनसे गोदान मिरू गायसंनाया मन्थ्रि बिफाननि हाबा। नाथाय जौनि मावख'वा माखासे आयदायाव खामानि मावनो थाखाय राडरि अनसुंथाइ होनो हायो। बेनि थाखाय साहा-सानजा ओन्सोलनि ट्राइबेल हारिनि हारिमु, समाज-सोदोमस्रि आरो दोरोडरि बेसाद, आयजै-आइलाफोरखौ सैरखा खालामनो थाखाय रां थि खाखानाय दं। बेखायनो बिथांखि मोनब्लानो जौं बेफोरनि सायाव फोरेंथाइ होनो हायो। लोगोसे बेनि थाखाय मोनसे रोखा बिथांखि एबा थांखि दैथायहरोब्ला बिफानारि मन्थ्रि बिफाननि गनायथि लानानै मावथांखिफोर लानो हायो। बेनि थाखाय मोनसे थाबैनो मावसावरायमा खुंनो आरो मिउजियामनि थाखाइ गोनां गोनां बेसाद, आयजै-आइलाफोर बुथुमनो राडरि अनसुंथाइ होनो थाखाय सावरायनायाव थिरांथा लानाय जायो।

बे सावरायनाय एन्थ्रप'ल'जिकेल सार्भे अब इण्डियानि कलकातायाव थानाय सानजा ओन्सोलारि मावख'नि लेडाइ बिथोनगिरिजौं लोगोसे बिफानारि मावख'गोराफोर मुस्त्री उमेश कुमार, मुस्त्री सन्त'स कुमार पाठक, मुस्त्री वारेल कुमार बेइन, ड० सुमिताभ चक्रवर्ती, बर' थुनलाइ आफादनिफ्राय लेडाइ आफादगिरि मुस्त्री दिपक कुमार बसुमतारी, गाहाइ नेहाथारि मुस्त्री कमलाकान्त मोसाहारी, नेहाथारि मुस्त्री प्रशान्त बर' बिथांमोनआ बाहागो लायो।

बेनि उनाव बर' थुनलाइ आफादनि मिरू

बिबानगिरिफोरा बेलसि 3-30 रिंगायाव 4 DL Khan Road, Kolkataआव थानाय साहित्य अकादेमीनि ओनसोलारि मावख' (Regional Office) आव थानानै ओनसोलारि नेहाथारि ड० ग'पाल चन्द्र बर्मनखौ लोगो हमना साहित्य अकादेमी आरो बर' थुनलाइ आफादआ जुथाइयै खुंनो गोनां हाबाफारिनि बागै सावरायनाय जायो। सावरायनाय समाव फैगौ 20 आरो 21 आगष्ट, 2016 खालाराव ग'साइगाव बि.एड. फरायसालिमायाव मुंदांखा सल'मागिरि मुस्त्री चित्तरन्जन मोसाहारीनि सल'मानि सायाव खुंनो गोनां सावरायमा मेल, फैगौ अक्ट'बर, 2016 दानाव कार्बि आंलं जिलानि रुकाचेन फरायसालिमायाव खुंनो गोनां आयजो सांग्रांथि आरो आयजो लिरगिरिनि सायाव सानसेनि सावराय मेल आरो फैगौ दिसेम्बर, 2016 दानाव लक्षिमपुर जिलानि सुबुनसिरि फसायसालिमायाव खुंनो गोनां लिरगिरिजौं मोगा-मोगि (Meet the Author) सावरायनाय हाबाफारिनि सायाव सावरायनाय जायो आरो बेफोर हाबाफारिखौ थि खालामखानाय बादिनो खुंनो थिरांथा लानाय जायो। सावरायनाय समाव ओनसोलारि नेहाथारि ड० ग'पाल चन्द्र बर्मनजौं लोगोसे हाबाफारि मावख'गोरा (Programme Officer) ड० मिहिर कुमार साहु, मुस्त्री गौतम पाल, मावख'लोगो मुस्त्री विश्वजीत राय, बर' थुनलाइ आफादनिफ्राय लेडाइ आफादगिरि मुस्त्री दिपक कुमार बसुमतारी, गाहाइ नेहाथारि मुस्त्री कमलाकान्त मोसाहारी आरो नेहाथारि मुस्त्री प्रसान्त बर'आ बाहागो लादोमोन।

थानाय 17 जुलाइ, 2016 खालारखालि कलकातानि खामानिखौ फोजोबनानै बर' थुनलाइ आफादनि साथाम मिरू बिबानगिरि बिथांमोना गोदान दिल्लीसिम माखासे हाबाफारि लानानै दावबाय लाडे। बे लेखा थां 18 जुलाइ, 2016 खालारखालि फुंनि 8-00 रिंगानिफ्राय गोदान दिल्लीनि बड'लेण्ड हाउसआव दिल्ली दावबायनायनि हाबाफारि लेखा मिरू सुबुं दोहोन जौगाखां मन्थ्रि मुस्त्री प्रकाश जाभेदकार, दिल्लीनि गिबि मन्थ्रि मुस्त्री अरबिन्द



केजरिवाल, दिल्ली मुलुग सोल्लोसालिनि लेडइ गिसिया (भिसि) आरो इउ.जि.सि. नि मासिगिरिनो गथायनो गोनां गोसोखां बिलाइखौ थियारि खालामनाय जायो ।

बेनि उनाव बेलासि 1-30 रिगायाव गोदान दिल्लीनि 62 नं साउथ एभेनुआव थानाय एम.पि.फोरनि थाग्रा सरखारि न'आव थानानै आसामनि राज्योसभानि बर' एम.पि. मुझी बिश्वजित दैमारीखौ लोगो हमनानै बर' थुनलाइ आफादआ दिल्ली दावबायनायनि हाबाफारि मावफुंनय सायाव सावरायनाय जायो । सावरायनाय समाव मानिनां एम.पि. बिथाड भारतनि मानिनां सुबुं दोहोन जौगाथाइ मन्थि मुझी प्रकाश जाभेदकार बिथांखौ 19 जुलाइ, 2016 खालारखालि गावनि मावख 'खथायाव लोगो हमनो सम थि खालामनाय जागोन होनना फोरमायो । बे लेखा मानिनां मन्थि बिथांखौ 19 जुलाइ, 2016 खालारखालि साननि 12-00 रिगायाव भारत सरकारनि पार्लियामेन्ट हाउस मावख 'ख'थायाव लोगो हमना सावरायनो सम थि खालामनाय जायो ।

बे लेखायैनो थानाय 19 जुलाइ, 2016 खालारखालि सानजौफुनि 12-00 रिगायाव गोदान दिल्लीनि पार्लियामेन्ट हाउसआव थानानै भारतनि सुबुं दोहोन जौगाखां मन्थि मुझी प्रकाश जाभेदकार बिथांखौ गावनि मावख 'खथायाव लोगो हमना आसाम मुलुगसोल्लोसालि, शिलचरनि सिडव थानाय फरायसालिमाफोराव बर' मेजर आयदा बेखेवनाय आरो एम.ए. फरायफारि थिसननाय, दिल्ली मुलुगसोल्लोसालियाव बर' बिफान बेखेवनाय आरो बेनि थाखाय नांगौ रोखोमनि गनायथि होनायनि थाखाय गांसे गोसोखां बिलाइ होनानै सावरायनाय जायो । सावरायनाय समाव मन्थि बिथाड थाबैनो इउ.जि.सि. नि सिम बिथोन हरनाय जागोन होनना फोरमायो । सावरायनाय समाव बर' थुनलाइ आफादनि लेडइ आफादगिरि मुझी दिपक कुमार बसुमतारी, गाहाइ नेहाथारि मुझी कमलाकान्त मोसाहारी, नेहाथारि मुझी प्रशान्त बर' बिथांमोनआ बाहागो लार्दोमोन । सावरायनायखौ दैदेनदोमोन राज्यो सभानि एम.पि. मानिनां मुझी बिश्वजित दैमारीया ।

थानाय 20 जुलाइ, 2016 खालारखालि फुंनि 9-00 रिगायाव गोदान दिल्लीनि मतिलाल नेहरु लामायाव थानाय भारतनि जनजाति बिफाननि मन्थि मुझी जुवेल अराम बिथानि सरखारि थाग्रा न'आव थानानै गावारि नेहाथारिखौ लोगो हमना मानिनां मन्थिजौ सावरायनो थाखाय सम बिनानै गांसे आर 'जलाइ होनाय जायो । बेनि उनाव फुंनि 10-30 रिगायाव दिल्ली मुलुगसोल्लोसालियाव थानानै दिल्ली मुलुगसोल्लोसालियाव बर' एम.ए. बिफान थिस 'ननायनि थाखाय गांसे गोसोखां बिलाइ मानिनां लेडइ गिसियानि गावारि नेहाथारिनो होनाय जायो । बै सानखालिनो साननि 11-30 रिगायाव गोदान दिल्लीनि काश्मिरी गेटआव थानाय आम्बेदकार मुलुगसोल्लोसालियाव थानानै मुलुगसोल्लोसालिनि बिबुंगोरा ड० सुरजित सरकार आरो लेडइ बिबुंगोरा ड० धरित्री नार्जरी चक्रबर्तीखौ लोगो हमना कक्राझारआव बर' हारिनि हारिमुवारि आरो दोरोडारि मिरु (Bodo Community Cultural and Heritage Centre) लुफुंनयनि मावबिथांखिनि सायाव सावरायनाय जायो । सावरायनाय समाव आम्बेदकार मुलुगसोल्लोसालिनि सानैबो बिबुंगोरा बिथांमोना सा-सानजा भारतनि बर'फोरनि हारिमु, सोदोमसि आरो दोरोडारिफोरा जोबोर मेहेर गोनां । बेखायनो बर' हारिनि हारिमु आरो दोरोडारि मिरु गायसंनया जोबोर गोनांथि दं । आधिखालाव गोदान मुगानि बर' फरायसाफोरा गोदोनि हारिमुवारि आइजे-आइला, दानाय-लुनाय, दामनाय-देनाय, आबाद मावनाय, मुवा बेसादफोरखौ बानायनो एबा दाननो रौलिया । जायनि थाखाय जौनि हारिमु, जौनि दोरोडारिफोरा गोमालांजोबसिगोन । बेनिखायनो मिडजियामआव बेफोरखौ सरैखा खालामना दोननो थाखाय हाबाफारि लानायखौ फोरमायनाय जायो ।

बेनि उनाव बेलासि 1-00 रिगायाव गोदान दिल्लीनि बाहादुर शाह जाफर र'डआव थानाय मुलुगसोल्लोसालि अनसुंथाइ आय 'ग (UGC) नि गाहाइ मावख 'आव थानानै मासिगिरिनि सिम बिथानि गावारि नेहाथारिनि मेजेरजौ



आसाम मुलुगसोलोँसालि, शिलचरनि आवथायाव थानाय फरायसालिमाफोराव बर' मेजर आयदा थिस 'ननाय आरो बेनि उनाव बर' आयदानि एम.ए. फरायफारि थिस 'ननायनि थाखाय आरो दिल्ली मुलुगसोलोँसालियाव बर' एम.ए. फरायफारि थिस 'ननाय आयदानि सायाव आफादनिफ्राय गोसोखां बिलाइ गथायनाय जायो। बैसानखालिनो बेलासिनि 2-00 रिंगायाव गोदान दिल्लीनि शाहजाह र 'डआव थानाय जुथाइ सुबुं सिबिथाइ आय 'ग (UPSC) नि मावख 'आव थानानै बर' आयदानि गोदान फरायफारि (Syllabus) खौ लानाय जायो।

थानाय 21 जुलाई, 2016 खालारखालि फुंनि 11-00 रिंगायाव दिल्ली सरखारनि गिबि मन्थ्रि मुस्त्री अरबिन्द केजरिवालनि मावख 'दिल्ली नेहाथारिख' (Delhi Secretariat) आव थानानै बिथां गिबि मन्थ्रिया दिल्लीनि बायजोआव थानो गोनां जानायनि थाखाय लोगो मोननो हायियाव बिथांनि जुनिया मावख 'गोरा (OSD) नि जोहै मानिनां गिबि मन्थ्रि बिथानो दिल्ली मुलुगसोलोँसालियाव बर' आयदानि एम.ए. फरायफारि थिस 'ननो थाखाय दाबि खालामना गांसे गोसोखां बिलाइ होनाय जायो।

बैसानखालिनो बेलासि 3-00 रिंगायाव गोदान दिल्लीनि आर.के.पुरमआव थानाय मिरु हिन्दी बिथोनगिरिख' (Central Hindi Directorate) आरो बिगियानारि आरो आरोँदायारि सोदोब बिरोंमा आय 'ग (CSTT) नि गाहाइ मावख 'आव थानानै आथिखालाव बर' थुनलाइ आफादनि मददआव सुजुनाय भारतारि बां रावारि सोदोब बिहुं सुजुनाय आरो बिगियानारि आरो आरोँदायारि सोदोब बिरोंमा सुजुनायनि खामानिखौ थाबै फोजोबनो थाखाय बिफानारि मावख 'गोराफोरजों सावरायनाय जायो। सावरायनाय समाव लोब्बा गोनां मावख 'गोरा बिथांमोनआ फैगौ अक्ट 'बर, 2016 दानाव दुर्गा फु जानि बन्दनि समावनो गुवाहाटी मुलुगसोलोँसालियाव सान 10 नि सावरायमा खुंनानै भारतारि रावनि बांरावारि सोदोब बिहुं सुजुनाय आरो

जिव बिगियान, रसायन बिगियान आरो राव बिगियान सुजुनायनि जोबथा प्रुफ नायनाय आरो नायफामनाय हाबाखौ फोजोबनाय जागोन होनना फोरमायो।

बैसानखालिनो मोनाबिलि 6-30 रिंगायाव गोदान दिल्लीनि मतिलाल नेहरु र 'डआव थानाय गावनि सरखारि थाग्रा न'आव भारतनि मिरु जनजाति बिफाननि मन्थ्रि मुस्त्री जुवेल अराम बिथांखौ लोगो हमना बर' थुनलाइ आफादनि दाबिफोरखौ सुफुंनो थाखाय मिरु सरकारनिफ्राय गोख्रों बिथोन हरनो थाखाय दाबि खालामना फिन गांसे गोसोखां बिलाइ होना सावरायनाय जायो। गाहांथै आसाम सरकारआ दासिमबो भारत सरकारनि दोरोडारि थागिबि हाग्रा मोनथाइ आयेन, 2006 खौ रोखा रोखायै बाहायनाय जायाखै। जायनि थाखाय हाग्रा हालामाव थानाय बर' आरो गुबुन थागिबि सुबुंफोरा सोलोँथाइनि मोनथाइ, गोगो दै ज 'गायनाय, सावस्रि साबखांनाय खाबुफोर, गामि पन्सायतनि जौगाथाइनि सानथांखि फोरनिफ्राय नेवसिजानो गोनां जादों होनना अजद होनाय जायो। बे सावरायनायाव बर' थुनलाइ आफादनि लेडइ आफादगिरि सानै मुस्त्री बिश्वेशर बसुमतारी, मुस्त्री दिपक कुमार बसुमतारी, गाहाइ नेहाथारि मुस्त्री कमलाकान्त मोसाहारी, नेहाथारि मुस्त्री प्रसान्त बर', मिरु मावफुं सोद्रोमा मुस्त्री खगेन्द्र कुमार रामसियारी बिथांमोना बाहागो लायो।

थानाय 22 जुलाई, 2016 खालारखालि फुंनि 11-00 रिंगायाव गोदान दिल्लीनि नेहरु भवन, 5 इण्डाष्ट्रियेल एरिया बसन्त कुन्जआव थानाय भारत हायुडारि बिजाब फोथायफुन्जि (National Book Trust of India) नि गाहाइ मावख 'आव थानानै आसामनि मुंदांखा लिरगिरि साहित्य अकादेमी बान्था मोनगिरि आरो आथिखाल बिथोनगिरि ड० रीता चौधुरीखौ गावनि मावख 'खथायाव लोगो हमनानै बर' रावनि गथ 'थुनलाइ जौगानायनि थाखाय मावथांखि लानायनि थाखाय गोसोखां बिलाइ होना सावरायनाय जायो। सावरायनाय समाव बिथोनगिरि ड० चौधुरी बिथाड एन.बि.टि.आइ.आ आथिखालाव





बर' रावनि गथ 'सा थुनलाइ जौगानायनि हाबाफारि लादों । बेनि थाखाय गिबि खेबनि थाखाय बर' रेबग्रा जथुमजों जुथाइयै ग'लाघाट जिलानि धोनस्रियाव मोनसे सावरायमा मेल खुंनाय जागोन होनना बुझे । बिथाङ लोगोसे बर' थुनलाइ आफादआ एन.बि.टि.आइ.जों लोब्बा लानानै बर' रावनि गथ' थुनलाइ जौगानायनि खामानि मावोब्ला नांगौ बादियै मदद आरो हेफाजाब होनाय जागोन होनना फोरमायो । बेनि थाखाय एन.बि.टि.आइ आ सा-सानजानि हादरसाफोरनि थाखाय थोजासे रां दं होनना फोरमायो । बेनिखायनो बर' थुनलाइ आफादआ आवगायबोनांगौ होनना खावलायो । बिथां ड० चौधुरीया बर' थुनलाइ आफाद आरो बर' रेबग्रा जथुमआ जुथाइयै बर' राव थुनलाइ जौगानायनि थाखाय खामानि मावोब्ला मोजां जायो होनना बुझे । बर' थुनलाइ आफादनिफ्राय गाहाइ नेहाथारि आरो लेङइ आफादगिरिया जेसेबां थाबै हायो बर' थुनलाइ आफादनिफ्राय एन.बि.टि.आइ.जों लोब्बा लानानै बर' गथ'सा थुनलाइ जौगानायाव मदद आरो हेफाजाब होना खामानि मावनाय जागोन होनना फोरमायो । बे सावरायनायाव बर' थुनलाइ आफादनि लेङइ आफादगिरि मुस्री दिपक कुमार बसुमतारी, गाहाइ नेहाथारि मुस्री कमला कान्त मोसाहारी नेहाथारि मुस्री प्रशान्त बर' एन.बि.टि.आइ. नि हाबाफारि मावख'गोरा मुस्री दीप शइकीया बिथांमोना बाहागो लादोंमोन ।

बेनि उनाव बेलासि 2-30 रिंगायाव गोदान दिल्लीनि आर.के. पुरमआव थांनानै सि एस. टि.टि.नि लेङइ बिथोनगिरि ड० प्रेम नारायन शुक्लाखौ गावनि मावख' खथायाव लोगो हमनानै फैगौ अक्ट'बर, 2016 दानाव गुवाहाटी मुलुगसोलोंसालियाव जानो गोनां सोदोब बिरोंमानि जोबथा प्पुफ नायनाय आरो नायफामनाय हाबाफारिनि सायाव सावरायनाय जायो । सावरायनाय समाव ड० शुक्ला बिथाङ अक्ट'बर, 2016 दानाव दुर्गा फुजानि बन्दनि समाव बे सावरायमा मेल खुंनायनि सायाव थिरांथा लानाय जायो । बेनि उनाव बेलासि 4-00 रिंगायाव गोदान

दिल्लीनि पार्लियामेन्ट ष्ट्रीतआव थानाय जिबन दीप न'मायाव ISBN नि मावख'आव थांनानै बर' थुनलाइ आफादनि बिजाबनि थाखाय ISBN लनायनि सायाव बिफानारि मावख'गोराजों सावरायनाय जायो । सावरायनाय समाव बिफानारि मावख'गोराया आथिखालाव ISBN नि थाखाय अनलाइन आर'जलाइ हरजायो होनना बुझे । सावरायनाय समाव बर'थुनलाइ आफादनि लेङइ आफादगिरि मुस्री दिपक कुमार बसुमतारी, गाहाइ नेहाथारि मुस्री कमला कान्त मोसाहारी, नेहाथारि मुस्री प्रशान्त बर'आ बाहागो लादोंमोन ।

थांनाय 25 जुलाई, 2016 खालारखालि साननि 12-30 रिंगायाव जे.बि. हागजेर न'मायाव माइसुरआव 27 जुलाई, 2016 खालारनिफ्राय 1 आगस्ट, 2016 खालारसिम बर' थुनलाइ आफादनि मानिनां आफादगिरि ड० कामेश्वर ब्रह्म बिथाङ राव दानस्लायनाय 'भारतनि गुदि जारिमिन' बिजाबनि सोदांनाय आरो नायफामनाय हाबाफारियाव बाहागो लानायनि थाखाय थाम-थिमनि सायाव सावरायनाय जायो । सावरायनाय समाव लेङइ आफादगिरि मुस्री बिश्वेश्वर बसुमतारी आरो गाहाइ नेहाथारि मुस्री कमला कान्त मोसाहारीया बाहागो लायो ।

बैसानखालिनो मोनाबिलि 6-30 रिंगायाव बेलतला-सार्भेयाव थानाय बड'लेण्ड भवनाव 56थि बर' थुनलाइ आफादनि बोसोरारि जथुम्मानि बान्जाय आफादजों सावरायनाय जायो । सावरायनाय समाव बर' थुनलाइ आफाद आरो बान्जाय आफादआ जुथाइयै आसामनि गिबिमन्थि, रां मन्थि, जनजाति जौगाथाइ मन्थि, पि.डब्लिड.डि मन्थि, सुबुं सावस्रि बिरोंदामिनारि (PHE) बिफाननि मन्थि बिथांमोनखौ आसाम आयेन आफादनि जथुम्मा सोलिबाय थानाय समाव लोगो हमना सावरायनो थांखि लानाय जायो । बे सावरायनायाव बर' थुनलाइ आफादनिफ्राय गाहाइ नेहाथारि मुस्री कमला कान्त मोसाहारी, रांगिरि मुस्री काबाराम स्वर्गीयारी, बान्जाय आफादनिफ्राय मावफुं आफादगिरि मुस्री मिहिनेश्वर



बसुमतारी, गाहाइ नेहाथारि मुझी ललित चन्द्र बर' आरो गुबुन बिबानगिरिफोर दंमोन ।

थानाय 26 जुलाइ, 2016 खालारखालि फुनि 11-00 रिगायाव आसाम आयेन आफादनि जथुमानि समाव गिबिमन्थि आरो गुबुन गुबुन मन्थि बिथांमोनखौ लोगो हमनो थाखाय बिपिएफ एम.एल.ए. हानजानि मावख'आव बर' एम.एल.ए फोरजों सावरायनाय जायो । नाथाय बैसानखालि आसाम आयेन आफादनि जथुम्मानि रां बाउजा (Budget) रां मन्थिया गथानायनि थाखाय गिबिमन्थि आरो गुबुन मन्थिखौ लोगो हमनाय हाबाफारिखौ दोनथ'नाय जायो ।

थानाय 27 जुलाइ, 2016 खालारखालि बेलासि 1-30 रिगायाव आसाम नेहाथारि मावख'आव थानानै आसामनि सोल्लोथाइ मन्थिखौ लोगो हमना गांसे गोसोखां बिलाइ होनाय जायो । बे गोसोखां बिलाइनि गेजेरजों बर' थुनलाइ आफादनिफ्राय आथिखाल सरकारआ गोदानै टेट उथ्रिनाय फोरोंगिरिफोरखौ फोरोंगिरिनि लांदां मासियाव अरायथायै थिस'ननाय समाव बर' बिजोंनि फोरोंगिरिनि लांदां मासियाव गुबुन बर' राव रोडिबिजाथि थिसननाय, बर' थुनलाइ आफादनि बोसोरारि राडरि अनसुंथाइखौ बांहोनाय आरो बर' थुनलाइ आफादनि दाबिफोरखौ मावफुंनो थाखाय मोनसे गोजौ थाखोनि सावरायनायनि खालार थि खालामनाय आयदाफोरखौ लानानै दान्दिसे सम सावरायनाय जायो । सावरायनाय समाव मानिनां सोल्लोथाइ मन्थि ड० हिमन्त बिश्व शर्मा बिथाड बर' थुनलाइ आफादजों थाबैनो मोनसे गोजौ थाखोनि सावरायनाय जागोन होनना फोरमायो । बेनि उनाव बेलासि 2-30 रिगायाव गोजौ सोल्लोथाइ बिफानाव थानानै बर' थुनलाइ आफादनि बोसोरारि राडरि अनसुंथाइनि फाइलनि सायाव बिफानारि मावख'गोराफोरजों सावरायनाय जायो । बेनि उनाव बेलासि 3-00 रिगायाव गिबि मन्थिनि मावख' आरो हा बिफानाव थानानै बाथौफुरि फालांगियारि मावथांखिनि हा सेटेलमेन्ट होनायनि सायाव बिफानारि मावख'गोरा आरो मावख'लोगोफोरजों सावरायनाय जायो ।

थानाय 28 जुलाइ, 2016 खालारखालि बेलासि 12-30 रिगायाव आसाम नेहाथारिख' मावख'नि हा बिफानाव थानानै बर' थुनलाइ आफादनि हा सेटेलमेन्ट खालामनाय फाइलनि सायाव बिफानारि मावख'गोराफोरजों सावरायनाय जायो ।

बेनि उनाव बेलासि 1-30 रिगायाव गोजौ सोल्लोथाइ बिफानाव थानानै बर' थुनलाइ आफादनि राडरि अनसुंथाइनि फाइलनि सायाव बिफानारि मावख'गोराजों सावरायनाय जायो । सावरायनाय समाव गोजौ सोल्लोथाइ बिफाननि लेडइ नेहाथारि बिथाड आसाम सरखारआ गोदान रां बाउजा (Budget) आव गासैबो जनजाति साहित्य संभाफोरनो राडरि अनसुंथाइ होनो थाखाय आलादा रां बाउजा लाखिना दोनदों । नाथाय दासिमबो बेखौ राननानै होवाखै । बेनि थाखाय दासिम फाइलनि खामानिखौ मावथ'नाय जायाखै । थाबैनो रां बाउजायाव थानाय रांखौ सोरनो बेसेबां होगोन राननाय जागोन । होमब्लानिया गोजौ सोल्लोथाइनि बिथोनगिरिया मोनसे बिथांखि दैथाय हरगोन आरो बे लेखा आसाम सरखारनि रां बिफानसिम गोजौ सोल्लोथाइ बिफानआ रांखौ गनायथि होनो थांखि हरगोन होनना फोरमायो ।

बै सानखालिनो बेलासिनि 4-00 रिगायाव आसाम नेहाथारिख'आव थानानै आसाम पि.डब्लिउ.डि नि कमिसनार आरो जुनिया नेहाथारि मुझी म'ह'न चन्द्र बर'खौ गावनि मावख'खथायाव लोगो हमनो बर' थुनलाइ आफादनि बाथौफुरियाव थानाय समाज-थुनलाइ हरिमुवारि मावथांखिसालिनि दरखंआव आर.सि.सि. दालां लुनायनि सायाव सावरायनाय जायो । सावरायनाय समाव मानिनां कमिसनार आरो जुनिया नेहाथारि बिथाड थाबैनो दालांखौ लुफुंनाय जागोन आरो बेनि थाखाय सरकारि नेमखान्थि बादिथै टेन्डार होनानै मावफुंनाय जागोन होनना बुडे ।

थानाय 29 जुलाइ, 2016 खालारखालि फिन आसाम नेहाथारिख' मावख'आव थानानै हा बिफानाव बर' थुनलाइ आफादनि हा सेटेलमेन्ट खालामनाय फाइलनि सायाव बिफानारि मावख'लोगोजों सावरायनाय जायो । बिथांआ



## बर' थुनलाइ आफाद

फाइलखौ गिबि मन्थ्रिनि मावख 'निफ्राय मोनफैयाखै होनना बुडे आरो मोनफैब्लानो थाबैनो फाइलखौ आवगाय होनाय जागोन होनना बुडे ।

बेनि उनाव बेलासि 1-00 रिंगायाव आसामनि गिबि मन्थ्रिनि नेहाथारिख 'मावख'आव थांनानै 'बर' थुनलाइ आफादनि बाथौफु रि फालांगियारि मावथांखिसालिनि हा सेटेलमेन्ट होनाय फाइलनि सायाव सावरायनाय जायो । सावरायनाय समाव बिफाननि मावख 'गोराया मानिनां गिबिमन्थ्रि बिथाडा दा बिफाननि कमिसनार-नेहाथारि बिथांनो लिरनाय बिथोननि गांसे कपि दिहुनना होयो आरो हा बिफाननि कमिसनार-नेहाथारिजों सावरायनो सुबुरुन होयो ।










बेनि उनाव बेलासि 2-00 रिंगायाव गोजौ सोलोंथाइ बिफाननि लेडाइ नेहाथारि बिथांखौ लोगो

हमना बर' थुनलाइ आफादनि बोसोरारि राडारि अनसुंथाइनि फाइल आरो डिबुगड मुलुगसोलोंसालिनि बर' बिफाननि लोगो बिबुंगोरानि मासि गनायथि होनायनि फाइलनि सायाव सावरायनाय जायो । सावरायनाय समाव लेडाइ नेहाथारि बिथाडा बोसोरारि राडारि अनसुंथाइनि फाइलखौ गोजौ सोलोंथाइ बिफाननि बिथोनगिरिखौ गोनां जानाय थांखिखौ थियारि खालामना हरनो थाखाय बिथोन होनाय जादों होनना फोरमायो । नाथाय डिबुगड मुलुगसोलोंसालिनि लोगो बिबुंगोरानि मासिनि बेलायाव दासिम आसाम सरकारआ गोदान फोरोंगिरि एबा बिबुंगिरि मासि गनायथि होनायनि थाखाय जेबो थिरांथा लायाखै होनना फोरमायो । थेवबो फाइलखौ नांगौ रोखोमै राहा लानो थाखाय बिफाननिफ्राय गोजौ बिफानारि बिबानगिरि सिम दैथायनाय जागोन होनना फोरमायो । □

जानो थाखाय, गाननो थाखाय खर 'खौ एब्रेनो थाखाय मानसिया मोजाडै जा खालामो बेनो खृष्टि, कला-खृष्टिनि मुलुग, रिंगुदामसानि मुलुग बेबो संग्रामनिनो थिलि । बेजों सुबुं जांखिथाइ लाबोनो हायो ।

—बिष्णु प्रसाद राभा

# Publications of Bodo Sahitya Sabha






थानाय 18 जुलाइ, 2016 खालारखालि गोदान दिल्लीनि पार्लियामेन्ट हाउस मावख 'आव भारतनि सुबुं दोहोन जौगाखां मन्थि मुस्री प्रकाश जाभेदेकारखौ बर' थुनलाइ आफादनि मिरु बिबानगिरिफोरआ लोगो हमना सावरायनाय समाव लानाय सावगारि।



थानाय 6 जुन, 2016 खालारखालि आसामनि रां, सावसि आरो सोलेंथाइ मन्थि ड० हिमन्त बिश्व शर्मा बिथांखौ बर' थुनलाइ आफादनिफ्राय गावनि मावख' खथायाव बरायनायनि सावगारि।

थानाय 22 जुलाइ, 2016 खालारखालि भारत सरकारनि जनजाति बिफाननि मन्थिर मुस्री जुवेल अराम जदेबा बर' थुनलाइ आफादनि मिरु बिबानगिरिफोरा सावरायनाय सावगारि।



थानाय 16 जुलाइ, 2016 खालारखालि कलकातानि निउ टाउन मावख 'आव एन्थप'ल जिकेल सार्भे अब इण्डियानि लेडाइ बिथोनगिरिखौ बर' बिजाब गथायना बरायनाय सावगारि।





थांनाय 6 जुन, 2016 खालारखालि आसामनि गोदानै सायख 'जानाय गिबि मन्थि मानिनां सर्बानन्द स'न'वाल बिथांखौ बर' थुनलाइ आफादनिफ्राय बरायनाय उनाव बायदि जेंनाफोरखौ लानानै सावरायनाय समनि सावगारि।

थांनाय 6 जुन, 2016 खालारखालि आसामनि गोदानै सायख 'जानाय हाग्रा, आबहावा आरो हायेनारि जनजाति आरो उनगोग्लैसोनाय हारि जौगाथायनि मन्थि मुष्मीमा प्रमीला राणी ब्रह्मखौ गावनि मावख 'खथायाव बर' थुनलाइ आफादनिफ्राय बरायनाय सावगारि।



थांनाय 19 आरो 20 जुन, 2016 खालाराव साननै हाबाफारिजों बर' थुनलाइ आफाद आरो साहित्य अकादेमीया खुंनाय बर' लिरगिरि फोरबोआव जागायजेननाय मेलाव बाहागो लानाय आलासि गेदेमाफोरनि सावगारि।

## BODO SAHITYA SABHA

H.O. KOKRAJHAR-783370, BTAD Sub Office : J.B. Hagjer Bhawan, Nayanpur Road, Ganeshguri, Guwahati-6,  
Ph : 0361-2203522, website : www.bodosahityasabha.org, email : bssjb@rediffmail.com